

IRA IROCAS ISANGUENATOCOQUERI JESOQUIRISITO, ATI ICANTA IRIRO CARA YOGABISAICOONTI

Ibetsatari Tiójiro.

1 ¹⁻⁴¿Aintabi Tiójiro? Yamai naninti nongomantëgotëmiri Jesoquisito. Ainta tojai aroque isanguenatocoqueri, icomantëgotëro ora icantagueque Iriro. Iniaiguëri aisati iquemaiguëri, iroro isanguenatocotaguëqueri Quirisito, iquenguitsatocoqueri. Ninibatëro isanguenare aisati nosamitasantaguequeri arota nogótcotasantiri Jesus cara iparintaca irooti yamai. Aroque nigóquero antagaisati. Yamai nagáquemiro, nocoguini pigóte catingasati obiro ora icantagueque Jesus, pigóte teni iromatobitaiguemi ira comantaiguëmi aisati ira sanguenataiguëmiro.

Ira ironomire Tosorintsi icomantëri Sacarías cara aiquenta irinaque itomi.

⁵Jirai, cara itingomibintanti Eroris cara Joreaquë, ainta saseriroti ijita Sacarías. Iriro imatsiguenga Abías. Icanquineri Tosorintsi cara oquibequë ibango. Ainta iina Sacarías ojita Isabel, aisati imatsiguenga Aarón. ⁶Iquemisanti Sacarías, aisati iina. Icantaguequineri Tosorintsi omagaro ora icocaqueri, aisati imatsiguenga iniacaninataiguëri pitirooti. ⁷Te irine itomi, sirabaronta iina. Aisati intiasiparitanë pitirooti.

⁸Aro omoncaraca cataguiteri cara icantaiguëneri Tosorintsi imatsiguenga Abías. Yametaigaro irirojegui iragáqueri paniro saseriroti iritaguëneri Tosorintsi casangajengaro. ⁹Icanqueri Sacarías irapisaserirotite:

—Yamai atsi obiro pitaguineri Atingomi casangajengaro.

¹⁰Aro icapë oquibequë ibango Tosorintsi cara Jerosarénquë. Sotoquë ainta inaignasegui tojai bototaigachari yamanaigasegui cara itaquero casangajengaro tomagui. ¹¹Iriguito iconijatompëri ironomire Tosorintsi irisaanganetsite yaringopë cara pitagani casangajengaro. Yaratianque imatepacoquë Sacarías. ¹²Cara inioberri Sacarías, iquenganeintasantobacari itsorogoberri, ¹³carari icampëri:

—Sacarías, quero pitsorogui. Tojai pamanopiantëri Tosorintsi. Aroque iquemaquemi: aiquenta ontsomaqueri otomi pijina. Pijitoberri Joan. ¹⁴Tojai pinganinabenqueri obiro, aisati inganinabentaiguëri tojai pomatsiguenga. ¹⁵Iranianinatëri iriro Tosorintsi iraguibatëri. Quero yóga obaa querootsati pairoraca cochoari. Coshoni ogasantëri Isëre Tosorintsi; cara queroquerai ini coshoni oguëri, inantasantëmari. Përosati ogamequeri. ¹⁶Inguemisantacagaiguëri tojai jorío

imatsiguenga arota intingomintaiguë mari Tosorintsi, casintari antagaisati. ¹⁷Aisati inganquimari ibega Erías, tojainta ogoqueri Isère Tosorintsi, aisati onganqueri iritosongantë tojai. Irobaqueri Atingomi, ingomantaiguëri imatsiguenga iraguaigabaqueri, inguemisantaigabaqueri Ira bocatsi aisa icanta imatsiguenga jirai iquemisantai-guëri Tosorintsi. Inganqueri sêraripague inguengasêretaguimari itomi. Irogometaiguëri tsoengatsiripague inguemisantiri Atingomi, inganquero ora caninari. Irobetsicaiguëri imatsiguenga irágacanınataigabaqueri Atingomi.

¹⁸Yosamitobëri Sacarías:

—¿Aisonori? ¿Ati nangantima nogótasantë aisonorica oca picomantënaca? Aroque nantiasipari-tanë naro, aisati ontiasiporotanë najina.

¹⁹Aro yotabitanairi irisaanganetsite Tosorintsi:

—Naro Gabriel, coshoni noguëri Tosorintsi. Igáquina nongomantëmiro oca Nibarintsica caninatatsiri.

²⁰Aiqueta omoncaraquima omagaro oca nocomantëmica, carari aroqueta pitsoinguëna, yamai nogótacaquimiro pomasantitanë, quero pinibatai rooti cara irinaque pitomi.

²¹Cara sotoquë, iquenganeintaigaca tojai jorío, yoguiaigabitacari Sacarías, icantobaca:

—Cosamani inasegui tsomagui. ¿Pairo te irisotocobite?

²²Aique isotocopai ibangoquë Tosorintsi. Te irinibataje, ijicoguiteta-sipaa. Aro igóiguë jorío, icantaiguë:

—Ainta ira iniaque tsomagui.

Sacarías mosontisonori. ²³Poro tominco intëneri Tosorintsi cara oquibequë ibango. Aique ipiganaja Sacarías irasiquë ibango. ²⁴Aique opëribatanë iina, pimánaca obangoquë.

Icarati pabocorooti manchacori te osotocaje. ²⁵Oquianca ocanque:
—Jirai nipasiquique tenta irine notomi, carari quero nipasiquiti aisati. Icabintsëna Natingomi. Iriro caninarisori.

Gabriel icomantëro Maria cara irinaque Otomi.

²⁶Aroque pogabisë 6 manchacori cara poguë Isabel iina Sacarías. Aro aisati igáqueri Gabriel Tosorintsi:

—Pijáte poeboroquë jitacha Nasaret cara Garireaquë. ²⁷Pingantiro María, iinatsari José. Iriro imatsiguenga David. Te oniobintiri sêrari carari ocogui águiri José.

²⁸Aro iátasiquero. Yoniagaparo icampëro:

—¿Aintabi, María? Naro bocatsi, naniaquemini. Nongomantëmini cara tojai inintasantimi Tosorintsi, tojai icábintsasantëmi, iniacananatëmi, coshoni yoguëmi. Pobataiguëro antagaisati basini tsinane.

²⁹Otsorogobëri María cara inibatapëro negaca. Oquianca: “¿Pairoraca ocanti oca?”

³⁰Aro icampëro aisati:

—María, quero pitsorogui. Aisonori icábintsasantëmi Tosorintsi. ³¹Iriro poguëque. Aiqueta cara iriboganaque Pitomi, pijitiri Jesus. ³²Iriro obaquengui-tsine Itingomisonorinta. Aisati Iriro Itomi Tosorintsi jonoquërintaberi. Tosorintsi inganqueri Igobeingarite jorío, imërii iragáantomento David icharine jirai. ³³Inganqueri Tosorintsi: “Notomi, përosati pintingomibintaiguëri omagaro joríojegui paniaiguënguicha Jacoboquë”. Përosati iragáantë, quero pitsonga iragáantane cara intingomibintaiguëri.

³⁴Aro María posamitobëri irisaanganetsite:

—¿Ati ongantima oca picanquenaca, terainta naniobintiri sërari?

³⁵Yotabitanëro:

—Inapëmi Isère Caninaro Tosorintsi. Aisati iritostonquimi Tosorintsi jonoquënintaberi, inapëmi isintsire aisa ocantaro pibega mingori. Iroero ora iribogaguëque Pijaniqueite, Iriro caninarisonori Itomi Tosorintsi. Ingantocoqueri: “Icaninatasanti Iriro. Te ingantaguetëmate ora te onganinate Irirota Itomi Tosorintsi”. ³⁶Aisati pomatsiguenga Isabel antiasiporo, te oque jirai, yamai opëñibatirini otomi aroque 6 manchacori ³⁷tenta ine ora comëtomotimarine Tosorintsi.

³⁸Aro ocanë María:

—Iriro Natingomi. Ongonijatomotinata pairoraca icocaquina. Ingocaquinaca nontsomaqueri Notomi cara picomantëna, aro caninataque. Irooti isaanganai ironomire Tosorintsi iátaji, te oniobairi aisati.

María piátasiquero Isabel omatsiguenga.

³⁹Aro pobetsicaca María.

Oquëtaguetanë piáque omanapague aikuero cara Joreaque. Pitonganaque ⁴⁰piátasiquero Isabel. Pareca ibangoquë Sacarías. Ocapë oniopëro Isabel, ocapëro:

—¿Aintabi? Naniaquemini.

⁴¹Oquemobëro María Isabel cara pobetsataparó, aro yosebatanaca otomi Isabel tsmagui, pinantasantaronta Isère Tosorintsi, pogomequero. ⁴²Iroero ora ocantaguëtanë, ocanque:

—Icantineintëgotacái Tosorintsi! Icabintsaguëro omagaro tsinane, carari obiro icábintsasantëmi, pobataguëro antagaisati tsinane. Aisati icábintsasantëri Pijaniqueite. ⁴³Obiro iniro Natingomi, Ira Pijaniqueite. ¿Pairoroco pipocasibiriquina naro tenta nobatëmate? ⁴⁴Naquemobëmi cara

pibetsatapëna; aito cara icaninatanë najaniqueite yosebatanaca tsmagui natsaguiquë. ⁴⁵Aisati picaninatanë obiro aroquenta piquemisantobëro ora icomantagantëmira Atingomi. Iromoncaraquemiro Irinibare.

⁴⁶Aro ocanque María:

—Nacantasëretë: “Caninarisonoriguinte Natingomi”. ⁴⁷Tojai nacinabinabentasantëri Irirota Notosorintsite, Nagabisaicoontatsirite. ⁴⁸¿Pairo icábintsabiriquina naro? Te nobate, teatisati nogóte, carari iniaquina icábintsasantëna. Iroero irinibatocotaguëquina omagaro matsiguenga yaca quibatsica cara nacinabinabentasantëri Tosorintsi. ⁴⁹Tojai itasongobenquina Irirota sintsirisonoriguinte. Itasorintsitasantotë, icaninatasantoti; te ingantaguetëmate quimingari.

⁵⁰Përosati icantaneintëgotaguëri antagaisati ira quemisantiri, ira tingomincari; icantaneintëgotaguëri omatsiguenga jiraisonori irooti yamai icantaneintëgotaguëna. ⁵¹Tojai itasongagueanti. Yoguipasiguitëri aguibataigachari ira jitaigacha iriati caninari.

⁵²Yágabitsataguëri cobeingari-pague ira tingomintaigabitachari. Carari yoguibataguëri ira te irajicaninatima iriati, inganqueri cobeingari iriro. ⁵³Yoguemagai-guëri ira tasegabetcha, iroero cantënguicha yágabitsaqueri casintaguetachari ora inomotiri. ⁵⁴Përosati Tosorintsi imitocotaguëri antagaisati omatsiguenga quemisanqueri, përosati iquengaguëri, icantaneintëgotaguëri. ⁵⁵Aroque omoncaraca Irinibare, icanquero antagaisati ora icantaiguëri Abaram jirai.

Aisati icanquero omagaro ora
 icantaiguëri imatsiguenga
 Abaram aisati inganquero
 përosati.

⁵⁶Ocari oca ocanque María. Aro
 otio moquero Isabel maba manchacori,
 aique pipiganaja asiquë obango cara
 opaniaca.

Cara inë Joan baotisantantsiri.

⁵⁷Aro omoncaraca cataguiteri cara
 otsomaaquero otomi Isabel.

⁵⁸Ocaninatasantanë. Iquemocotaiguëro
 omatsiguengajegui, icaninabentaiguëro.
 Icantaguë:

—Icantaneintëgotasantëro Atingomi.

⁵⁹Pabisanaque 7 cataguiteri.

Oquëtaguetanaï ipocasitaigapëri janequi
 arota iritotëqueri arosata omasiquë
 itegui cara yametaiga joríojegui. Aisati
 icantaigapë itimanamitane:

—Caninataque irajitima Sacarías
 irágapairotajiri iriri.

⁶⁰Orari iniro ocantaigabaquero:

—Quero ijita Sacarías; iroonti
 irajiquima Joan.

⁶¹Yotabitaiganaquero:

—¿Pairo pinintobique pijitiri Joan?
 Teni irine Joan pomatsiguengaquë.

⁶²Aro ijigotaquero Sacarías yosamitëri:

—Obiro, ¿Pairo pininti obiro irajitima
 pitomi?

⁶³Yacotacaquero iromapëneri paperi,
 isanguenataiguëneri: “Aroque ijica
 Joan”. Aro iquenganeintaigaca
 imatsiguenga. ⁶⁴Aito cara inibatagajiri
 Sacarías Tosorintsi inibatai aisati.
 Icanque:

—Icaninatasanti Tosorintsi.

⁶⁵Aro iquenganeintasanotaigacari
 matsiguenga. Antagaisati timaigatsi
 tongagaripaguequë cara Joreaque
 iquemocotaiguëri Joan itomi Sacarías.

⁶⁶Iraegui quemocotaiguëri Joan
 iquengasëretaiganacari yosamitobaca:

—¿Ati icanta ira janequirá? ¿Pairo
 inganque aiuenta?

Igóiguë cara icábintsëri Joan
 Tosorintsi. ⁶⁷Aique Isëre Tosorintsi
 pinantasantacari Sacarías, pogomequero,
 aro icanque:

⁶⁸—Caninataque omagaro

matsiguenga iraniacandinatiri
 Atingomi Otosorintstite omagaro
 eiro jorío icharineegui Isirael.

Itasongobentaigacái. Ipcasitaiga-

cái cara iragabisaicotajái. ⁶⁹Jirai

David icanquineri Tosorintsi ora

icocaquero. Yamai Tosorintsi

igáquero imatsiguenga David,

itasorintsitobianti aisati

yogabisaicoonti. ⁷⁰Icanque cara

icomantëgotëri jirai comantanta-

tsiripague: ⁷¹“Icanë Tosorintsi:

‘Nagáquemiri Ira agabisaicotai-

guëmine, aisati iragabeiri ira

quisaiaguëmine, irojocaiguëmiri.

⁷²Nangantaneintëgotaiguëri

omagaro imatsiguenga Abaram.

Quero nopeicotaro ora

nacantasantaiguëri. ⁷³Jirai

nacanquero picharineegui

Abaram: ⁷⁴“Aiuenta irinaiguë

tojai quisaigabitëmine, carari

nagabisaicotagaimi. Quero

pitsorogaigui pinguemisantaig-

gaina; pinganinabentaiguëna.

⁷⁵Noganinasëretaiguëmi querota

picantaguëti te onganinate.

Naniacandinataiguëmi, përosati

pingantaiguë ora nococaquemi

irooti cara pingamaiguë” ’’.

Ocari oca icantasantë Tosorintsi

jirai. ⁷⁶Yamai, notomi, irogótoco-

quemi matsiguenga obiro

comantëgotërine Tosorintsi

jonoquërintaberi. Pobetsiquineri

Atingomi arota irágacandinataiga-

baquero matsiguenga. Pobaquero

Atingomi obiro, pingomantai-

guëri pomatsiguenga irobetsicai-ganaquema, iraganinasëretai-guema, iragueiri Atingomi boquënguitsine, irágacanınataigabaqueri. ⁷⁷Aisati pogometaiçuëri pomatsiguenga irogóigue ati ingantima iragabisaicotaigairi Tosorintsi irojocajineri ora icantaguëti te ongomeite arota quero iquengaineri aisati. ⁷⁸Pingomantaiguëri aisonori inintasantacái Tosorintsi, tojai icantaneintëgotacái. Cara icondetapë paba, oquëtaguetanai, pabisanaque tsitiniri. ⁷⁹Aisa ocanta cara iribocapë Atingomi cara Jonogaguitequë, irosanguëguitetocotaigacái eiro cantaguëtatsi te onganinate, iragabisaicocái arota anganinabentaiguëri antimaigue caninasati. Quero otsorogajiro agamane.

Aroque icanquero oca Sacarías.

⁸⁰Aro yogabisë tojai irosarinite Joan, iquibianë. Aiquero iquemisantanëri Tosorintsi. Ijocanëri imatsiguenga itimaque cara tera ontimingani irooti cara cataguëteriquë cara iparintaca iquenguitsatomotaiganaquëri imatsiguenga.

Cara inë Jesus.

(Mt. 1.18-25)

2 ¹Cara aroque inë Joan, ainta cobeingari Iromasati ijita Sésar Agósito. Itingomibintaiguëri omagaro quibatsisati. Icanque cara irisanguenatë gotaguequima antagaisati matsiguenga arota iripë nabintiri quirequi impositeso. ²Te irisanguenatëgotima jirai. Icanquero cara Quirinio itingomi cara Siriaquë. ³Aique iáiguë omagaro cara iboëborotequë imatsiguenga jirai, isanguenatocotaigaca. ⁴Itimi José canta

poëboroque jítacha Nasaret cara quibatsiquë jítacha Garirea. Aique iáque itonganaque cara Berénquë cara itimaque David imatsiguenga jirai. Berén pini cara Joreaquë. ⁵Yáganëro María iina itsibatanacaro pëmbaunque ontsomaaque. ⁶Cara pinasegui Berénquë, aroque omoncaraca cataguëteri cara ontsomaaque. ⁷Icogabepa José pongotsi, carari tojai matsiguenga iagaigaparo pongotsipague. Aro icanaque cara ibangoquë ibiraegui, cara otsomaaquëri María Ira oguibare Otomi. Oponatancari manchaguëntsisite, poguinaríaquëri cara cajónquë ora yapantaiga ibiraegui.

⁸Ainta inagasegui aroniatiquë Berén ira omisantaiguëri iroishate tsitiniriquë cara yapaitiro tobarisi. ⁹Iroquito poguëtaguëtocotasantaiguëri irosanguëguitere Tosorintsi. Aisati yoniagaigapari ironomire Atingomi. Itsorogasantanaque ira omisantasiri. ¹⁰Icampëri irisaanganetsite Tosorintsi:

—Quero pitsorogaigui. Nipocasique nongomantaigapëmi Caninaro Nibarintsi ora pinganinasëretantima aisa inganinasëretaiquë omagaro matsiguenga cara inguëmaigabaquero. ¹¹Yamai iboguë cara iboëborotequë David Ira agabisaicotaigaimine. Irianti Quiriso Atingomi. ¹²Iroro pigóontëmari Janequi: cara pijáiguë piniaigapëri oponatancari manchaguëntsisite, inariaca cara yapantariquë ibiraegui.

¹³Iroquito yoniagaigapari itsibataigapari arosónori basini ironomire Tosorintsi, ipaniaigaca Jonogaguitequë, icantaigapë:

—Icaninatanoti Tosorintsi ¹⁴Ira timatsi Jonogaguitequë. Intsome aniaiguëri caninarisonoriguënte. Yaca quibatsica Tosorintsi ingábintsaiguëri iromagoriasëre-

tagaiguëri antagaisati
matsiguenga cantaiguëro ora
icocagaiguëri, inganqueri
intimacagobaguima caninasati.

¹⁵Aique cara iáigai irisaanganetsite
Tosorintsi Jonogaguítequë aisati,
icantobaca ira omisantaiguiri iroishate:

—Intsome cara Berénquë anetsaiguëri
Ira Agabisaicoontatsiri icomantagantë
gotacái Atingomi.

¹⁶Aito cara iáiganaque omanapague
iniaigapëri José aisati María aisati
Otomi inariaca cara yapantariquë
ibiraegui. ¹⁷Cara iniaigapëri
icomantëgotëri Janequi omagaro
icantaiguëri irisaanganetsite Tosorintsi.

¹⁸Aro iquenganeintasantaigabacari
antagaisati quemaigabaqueri. ¹⁹Ora
María tojai oquengasëretapininquero
ora icomantaigapë, te omaguisantiro.

²⁰Aique ipigaigaca omisantiri iroishate,
icantaiguë:

—Aisonori icaninatasanoti Tosorintsi.
Ocaninati omagaro ora icomantacái;
pabisanaque irooti cara yoniagaigacái.
Caninari ini Tosorintsi.

Itoquengani Jesus.

²¹Cara yogabisanë Jesus 7 cataguiteri,
oquëtaguetanai itoquengani cara
yametaiga joríojegui. Aisati ijitaiguëri
Jesus, cara icanquero María irisaangane-
tsite Tosorintsi jirai.

Yáganëri Jesus oquibequë ibango Tosorintsi.

²²Jirai Tosorintsi isanguenatacaqueri
Moisés cara ontsomaaquerica tsinane
otomi, 40 cataguiteri ontimaque
obangoquë; quero piáti oconoitari
quemisantatsiri. Aro imoncaraquero José
isanguenare Moisés: cara omoncaraca 40
cataguiteri, yágaiganaqueri Jesus cara
Jerosarénquë arota imëri Tosorintsi cara
oquibequë ibango, icanque:

—Jerica notomi obatatsi. Pairoraca
pingocaqueri, nocogui ingantimiro.

²³Ocari oca icanque Tosorintsi
isanguenatacaqueri Moisés:

Ira obatatsi otomi tsinane irianti
irasi Atingomi, intomintëmari.

²⁴Aisati piáque María omëri Tosorintsi
ira icoicoque Iriro Sanguenariquë: pite
sompaguita queroca pite paroma.
Omoncaraca omagaro ora ocanque
Sanguenari.

²⁵Ainta itimi Jerosarénquë sërari ijita
Simeón. Iquemisantasanterì Tosorintsi

aisati itimi caninasati aisati yoguiaqueri
Ira Agabisaicoontatsiri, Ira aganinasëre-
taiguërine antagaisati joríojegui
imatsiguenga. Pinancari Simeón Isère
Caninaro Tosorintsi, iquemisantasan-
tëro. ²⁶Aroque poniaguëri Isère
Caninaro cara quero icami irooti cara

iraniobëri Quirisito, Ira iragáque
Atingomi. ²⁷Piátacaqueri Simeón Isère
cara ibangoquë Tosorintsi. Ainta, cara

icanaque José aisati María inganquineri
Jesus ora icoicoque Tosorintsi
Sanguenariquë. ²⁸Iniobëri Jesus Simeón,
iátasiqueri, itsomaabëri, icanqueri
Tosorintsi:

²⁹⁻³⁰—Picaninatasanoti, Natingomi,
casintina. Yamai naniaqueri Ira
Agabisaicoontatsiri Ira
picantocoquina. Aroque yamai; te
naninte nantime yaca aisati. Yamai
caninataque najáque Obiroquë.

³¹Aisonori, pigáqueri iragabisaico-
taigairi omagaro matsiguenga-
pague. ³²Irosanguëguitetocotai-
guëri iraugui cagari jorío,
irogótacaqueri ora aisonori; aisati
iraganinataiguëri joríojegui ira
quemisantaiguëri.

³³José aisati María iniro Jesus
iquemaiguëro ora icantocoqueri Jesus
Simeón, iquenganeintasantaiganaca.

³⁴⁻³⁵Icantocobentaiguëri pitirooti:

—Nocogui ingábintsaiguemi
Tosorintsi.

Aisati icanquero María:

—Ica Pitomi igáque Tosorintsi
iragabisaicotaiguëri tojai jorfo
quemisanquerine, carari ainta tojai
inguisaneintaiguëri iritsoenguiri;
iratsipiriacagaiguëri Iriro. Ipocasique
iragabisaicotaiguëri omagaro, carari
ingonagaiguëma matsiguenga. Ainta
inganinabentaigabaqueri, ira basini
iripëgatsataigabaquimari: Iriro
ogonijatomoquerine ora iquengaiga
matsiguenga. Aiquenta tojai
piraicoqueri Pitomi.

³⁶Aisati ainta cara tsinane
comantantatsiri ojita Ana. Iroero irisinto
Panoel imatsiguenga Aser itomi Jacob
jirai. Ontiasiporotasantanë;
otimacaqueri ojime 7 osarini cara
icamaque; ³⁷yamai pinasitaa ora
ogamaimentaga 84 osarini basini.
Përosati pamanocotiri Tosorintsi cara
ibangoquë. Tojai ocaninabenqueri
cataguiteriquë aisati tsitiniriquë. Te
onguengero operi.

³⁸Aique pipoque Ana, oniopëri Jesus,
ocarasiatocoqueri Tosorintsi. Aisati
ocantocoqueri omatsiguenga
Jerosaresati aguaiguëri Agabisaicoonta-
tsiri. ³⁹Cara imoncarataiguë José aisati
María ora icanque Atingomi
Sanguenariquë, ipigaiganaja Garireaquë
cara poeboroquë jitacha Nasaret.

**Ipiganaja Jesus oquibequë
ibango Tosorintsi.**

⁴⁰Aro iquibianë Jesus, isintsitanë,
aiquero iátanëtigue igótasantanë,
yabisaiguëri basini irapijaneguite. Aisati
tojai icábintsasanoqueri Tosorintsi.

⁴¹Yametaiga José aisati María
iátopiantaiguë omagaro osarini cara
Jerosarénquë, imoncaraquero
cataguiteri Pásicoa cara jirai

yabisanaque jonoquë ironomire
Tosorintsi, yogabisaicotaiguëri jorfo
cara Ejípitoquë. ⁴²Cara yogabisë Jesus
12 osarini, itsibatari casintari
Jerosarénquë cara yametaiga jorfo.
⁴³Aique cara pabisanaque jiesita, ora
Pásicoa, ipigaiganaja tojai imatsiguenga
carari përosati inë Jesus cara
Jerosarénquë. Te irogóte casintari;
⁴⁴ijitaigabitaca itsibataigaari basini
imatsiguenga. Patiro cataguiteri
yanëiiguë. Cara ochapinitanë
icogaigabitacari, ⁴⁵te iraneiri.
Oquëtaguetanë ipigaiganaja
Jerosarénquë icogaigabitacari. ⁴⁶Maba
cataguiteri te iraniajiri Jesus, aique
iniaigairi isobiaque oquibequë ibango
Tosorintsi. Itsibataigari ira ogomeantiro
isanguenare Moisés, iquemisantaiguëri
cara yogomeantaguëti, aisati
yosamitaiguëri pairoraca. ⁴⁷Antagaisati
ira quemaiguëri iquenganeintasantaiga-
cari tojainta igótasanti aisati caninasati
yotabitaiganaqueri ogomeantatsiri ora
comëtaru.

⁴⁸Cara iniaigapëri José aisati iniro,
iquenganeintasantacari. Ocanqueri
iniro:

—Notomi, ¿Pairo picantobitaiguëna
negaca? Nocogaigabitëmi naro aisati
piri nogasëretocoquemi.

⁴⁹Yotabitanëro Jesus:

—¿Pairo picogobiquina? ¿Teco pigóte
caninataque nantineri Pabati yaca
ibangoquëca ora icocaquina Iriro?

⁵⁰Carari te inguemaigue ora
icantabecari. ⁵¹Aique iátaji itsibataiga-
najari cara Nasarequë. Përosati
iquemisanqueri iriri aisati iniro, te
iripëgatsatëmatimari. Ora iniro
oquengasëretëgotacari Otomi antagaisati
pigótocoqueri. ⁵²Aiquero iátanëtigue
Jesus igótasantanë, iquibianë. Tosorintsi
icábintsasantëri icaninabenqueri, aisati
icaninabentaiguëri matsiguengajegui.

Iparintaca iquenguitsatomotagueantë**Joan baotisantantsiri.***(Mt. 3.1-6; Mr. 1.1-8; Jn. 1.19-28)*

3 ¹Jirai ainta cobeingari jitacha Tiberio Sésar ocarati 15 osarini icobeingabintaiguëri Iromasatijegui; igáantëri basini itingomipague: ainta Pontsio Pirato itingomi Joreasati; Eroris itingomi Garireasati; Jeripe, ireinti Eroris, itingomi Itoreasati aisati Taraconitesati; Irisania itingomi Abirenesati; ²ainta itingomi saseriroti-jegui Anás aisati Caijás. Ainta icaegui itingomi, cara inibatë Tosorintsi icanqueri Joan itomi Sacarías:

—Pijáte pinguenguitsatomotaiguëri pomatsiguenga.

³Aro iquemisanqueri Joan, iquenagueque cara Joriránquë aisati aronisati, yotsatengaiguëri imatsiguenga icantaiguëri:

—Pingantaigaima yacaqueroca, pijocajiro ora picantaguetabeca te onganinate, pomasinatitaje, quero picantaja pibega jirai. Pomaotisatima. Aro irojocajimiro Tosorintsi ora picantagueti te onganinate, iromaguisanquero, quero iguisaneintajimi.

⁴Imoncaraquero Joan ora jirai isanguenatocoqueri Isafás comantantsiri:

Ainta ira cajemaquenguitsine cara te ontimingani, inganque: “Coraguetaque Atingomi, págacaninatobëri; pinguemisantsantobëri, piganinatiro paneingomento pibega cara pobetsicoboguitineri irabo itingomi, pigatingatiro. ⁵Pijaguiro otininapague; quero pimánantaro pairoraca. Pinguiguero tongagaripague. Pigatingatajirora cara pitigontigoiboguiti abatsi.

Pobetsicaineri Atingomi caninasati. Pijocajiro ora picantagueti quimingaro, pobetsicasëretima caninasati arota inganinatapë. ⁶Aique omagaro matsiguenga iraniaigabaqueri Agabisaicoontantsiri Ira igáque Tosorintsi”.

Aro negaca isanguenague Isafás.

Iquenguitsatagueque Joan.*(Mt. 3.7-12; Mr. 1.7-8)*

⁷Aique iátasitaiguëri Joan tojai matsiguenga imaotisatiguëmame. Carari icanque Joan:

—Te pinganinataigue, obirojegui aisa picantaigacari marangue. ¿Pairi comantaiguëmi pisigopitanëmaro cara iratsipiriacagaiguëmi Tosorintsi cantaca maranguepague cara isigopitaigacaro pamari? ¿Pijitasitimame aroca nomaotisatiguëmimo quero iguisaiguimi Tosorintsi? ⁸Pinintica nomaotisatiguëmi, aro caninataque pingantagueti caninasati, pintimaigue caninasati, arota nogótimi pijocasantë roca ora te ongomeite, piquemisantsantiri Tosorintsi. Pinetsaiguëri iraegui matsiguenga cagari jorío. Iranintiroca Tosorintsi, imiaguetiri imatsiguenga Abaram, carari quero yabisaicoonta irironta imatsiguenga Abaram.

Querootisati pabisaicoonta obiatinta imatsiguenga; quero iroro iniacaninataguëtaiguëmi. ⁹Carari yamai pënibaque inguisaiguëmi Tosorintsi. Picantaigacaro pibega ancho te ine oguitso; iritotëro casintaro, irojoquero tsitsiquë. Aisa picanta obiro te pinguemisantiri Tosorintsi, te pingantineri, irojocaguëmi Sharincabeniquë.

¹⁰Aro yosamitapinintaiguëri iraegui quemaiguëri:

—¿Pairoraca picogui nangantaigue naroequi?

¹¹Yotabitaiguëri Joan:

—Aitica pite piguitsagare, pomagarantiri coguitiachari patiro. Aitica tojai poperi, pomagarantiri aisati coguitiario. Pingábintseri.

¹²Aisati iátasaitaiguëri Joan coigotantatsiri iguirequite imatsiguenga ipagantiri igobeingarite (Sésar) canta Iromaquë. Ipcasique imaotisaitaiguëma, icantaigapëri ira Joan:

—Ogomeantatsiri, ¿Pairoraca nangantaiguë naró?

¹³Yotabitaigabaqueri Joan:

—Quero picoicotasitari iguirequite pomatsiguenga, irianti páguiri pomoncaratiro ora icanquemi Iromasati.

¹⁴Aisati yosamitaigapëri soraropague icantaiguëri:

—Narogui, ¿Pairoraca nanganque naró?

Yotabitaiguëri Joan:

—Quero págabitsatiri pairoraca yasinta basini aisati quero picantiri: “Queroca popabaquinaro, nanguisëmi”. Quero pinebetari quirequi, quero picantocotaguetasitari matsiguenga arota pomitsorogui imëmiri quirequi. Ira quirequi ipë nabintimi pitingomi, antagaini; quero picogui basini.

¹⁵Yoguaiguëri Quirisito matsiguenga botoibiritaigari Joan, yosamitobaca:

—¿Iriroco Joan Agabisaicoontatsiri?

¹⁶Iriro cantënguicha Joan icantaiguëri:

—Naro nobaotisaitaiguëmi nijaaquë, carari pëñibaque iribocapë basini teni aisa ingantina nibega naró. Ibaquina Irirota Natingomisonori, nitsongaa naronta cantaca iromeraro Iriro. Cara iribocapë Iriro irogaiguëmiro Caninaro Isëre inasërequimi oganinasëretëmi; carari ainta obirojeguiquë tsoengatsiri iragátaiguëri Sharincabeniquë. ¹⁷Cara iribocapë Quirisito irapatoitaiguëri quemisantatsirijegui aisati ingasiriconia-

tiqueri. Ingantaiguëri cantaca casintaro arosa osamataga inganquero. Irapatontë maro oguitso intianquero, iriboteguitëro, irojoquero omasiqui iritaguëro, iroonti oguitso iroquero cara yogantaroriquë. Aisa icanta Quirisito, iráganëri quemisantatsiri Jonogaguitequë, carari iragáqueri tsoengatsiri iritaguëma përosati Sharincabeniquë, iratsipirique përosati cara pini tsitsi pamari ora te otsibacanete.

Yomianqueri Joan Eroris.

(Mt. 14.3; Mr. 1.18-20; 6.17)

¹⁸Aro tojai Joan icomantapinintaiiguëri matsiguenga ora Caninaro Nibarintsi atiraca ongantima iragabisai-coqueri Tosorintsi. ¹⁹Aisati Joan icamanaaqueri Eroris itingomi, icanqueri cara icantaguetiro te onganinate cara yágabitsaqueri ireinti iina jitacha Erorías. Aisati isintsitsaqueri cara icantaguetiro tojai basini ora te onganinate. ²⁰Aique iguisaneintanëri Eroris yágagantëri Joan yomianqueri, aikuero iátanëtigue icantaguetanë quimingaro.

Ibaotisataca Jesus.

(Mt. 3.13-17; Mr. 1.9-11; Jn. 1.31-34)

²¹Teraiquerai irominguengani Joan, cara ibaotisaitaiguëri tojai matsiguenga, ibaotisatëri Ira Jesus aisati. Iroontita yamanasegui Jesus, pasirianaca Jonogaguite ²²pamasobingopëri Caninaro Isëre Tosorintsi paguëpëri ocampari ibega sompaguiti, pinampari Jesus. Aisati oquemaquengani Irinibare Tosorintsi jonoquë icanque:

—Obiro Notomi, nanintasanotëmini. Tojai nacaninabentasanotëmi.

Ora iripajiroppague imatsiguenga Jesus.

²³Aroque yogabisë Jesus 30 osarini cara iparintaca iquenguitsatomotai-

guëri imatsiguenga. Ijitaigabitari itomi José carari Irianti itomitsari José. Jesos imatsiguenga Erí. ²⁴Erí itomi Matat. Matat itomi Irebí. Irebí itomi Mériqui. Mériqui itomi Jana. Jana itomi José. ²⁵José itomi Matatías. Matatías itomi Amós. Amós itomi Naom. Naom itomi Esiri. Esiri itomi Nagai. ²⁶Nagai itomi Maat. Maat itomi Matatías. Matatías itomi Semei. Semei itomi José. José itomi Jorá. ²⁷Jorá itomi Joanán. Joanán itomi Iresa. Iresa itomi Sorobabé. Sorobabé itomi Saratieri. Saratieri itomi Neri. ²⁸Neri itomi Mériqui. Mériqui itomi Ari. Ari itomi Cosam. Cosam itomi Erimaram. Erimaram itomi Er. ²⁹Er itomi Josoé. Josoé itomi Erieseri. Erieseri itomi Jorim. Jorim itomi Matat. Matat itomi Irebí. ³⁰Irebí itomi Simeón. Simeón itomi Jorá. Jorá itomi José. José itomi Jonam. Jonam itomi Eriaquim. ³¹Eriaquim itomi Merea. Merea itomi Mena. Mena itomi Matata. Matata itomi Natán. Natán itomi David. ³²David itomi Isaí. Isaí itomi Oberi. Oberi itomi Bos. Bos itomi Saramón. Saramón itomi Nasón. ³³Nasón itomi Aminarab. Aminarab itomi Aram. Aram itomi Arani. Arani itomi Esiromo. Esiromo itomi Baris. Baris itomi Jorá. ³⁴Jorá itomi Jacob. Jacob itomi Isac. Isac itomi Abaram. Abaram itomi Taré. Taré itomi Nacoro. ³⁵Nacoro itomi Seroco. Seroco itomi Iragao. Iragao itomi Parec. Parec itomi Eberi. Eberi itomi Sara. ³⁶Sara itomi Cainán. Cainán itomi Arapasat. Arapasat itomi Sem. Sem itomi Noé. Noé itomi Iramec. ³⁷Iramec itomi Matosará. Matosará itomi Enoc. Enoc itomi Jaret. Jaret itomi Marereri. Marereri itomi Cainán. ³⁸Cainán itomi Enós. Enós itomi Set. Set itomi Arán. Tosorintsi yobetsiquëri ira Arán jiraisonorí.

Icogabeca camagari irantacaquerime

Jesos ora te onganinate.

(Mt. 4.1-11; Mr. 1.12-13)

4 ¹Cara ibaotisataca Jesos, pipocasiqueri Isëre Tosorintsi pinantasantapari. Aro ipaniaca nijaaquë Jorirán piátacaqueri Isëre cara tera ontimingani. ²Ocarati 40 cataguiteri itimaque cara, te irapëmate. Páguëri oquibe itasegane. Aro ipocasipëri camagari icogabeca irantacaquerime Ira Jesos ora te onganinate. ³Icampëri:

—Obirosonorica Itomi Tosorintsi, pomeguiro oca mopëca pan, popero.

⁴Yotabitanëri Jesos:

—Quero nacantiro. Ocanti Sanguenari jirai isanguenaquero comantantatsiri:

Te patiro intimantimaro pan matsiguenga, carari aisati intimantëmaro cara inguemisanquero omagaro Irinibare ora icanque Tosorintsi.

⁵Aique yáganëri Jesos camagari jonoquë oquibequë oguitoja. Ijigotëneri omagaro quibatsi cara igáanti itingomipague, icantabecari:

⁶—Pinetsero intapague, omagaro nasi. Pinintiroca, nangantaiguëri antagaisati quibatsisati intingomintimi irágacaninatëmi. Irironta nasiati, nomëri pairiraca naninti. ⁷Aroca pobaticagueritotasi-quina, pintingominquina naro, aro nanganqueri intingomintaiguëmi Obiro omagaro intaeguí. Antagasiati irianti pasi.

⁸Yotabitanëri Jesos icanqueri ira camagari:

—Ocanti Sanguenari:

Pintingomintimari paniro Atingomi Irironta Pitosorintsite. Paniro Iriro pomanocoqueri pinguemisantiri.

⁹Aique yáganëri camagari
Jerosarénquë, yoguëri jonoquë oquibe
pongotsi irasi Tosorintsi. Icanqueri:

—Obiroca Itomi Tosorintsi, atsi
pomatsecanë osobinta quibatsiquë.

¹⁰Pinguengero ocanti Sanguenari:

Tosorintsi iragáquemiri irisaangane-
tsitepague iromisanquemi.

¹¹Irágaigabaquemi arota quero
poparigui mopëquë.

¹²Aisati yotabitanëri camagari Jesus,
icanqueri:

—Quero picantiri Tosorintsi ora
inganque; posamitiri ora icogui
inganque. Ocanti Sanguenari:

Quero piniantari Pitingomi Irianti
Pitosorintsite.

¹³Cara itsonque camagari irantacaque-
rime Jesus ora te ongomeite, igóque
tiguëti ingantiri, ijocanëri iátaji. Carari
iripigaima aiquenta, iragatsitairo.

Ipiganaja Jesus Garireaquë.
(Mt. 4.12-17; Mr. 1.14-15)

¹⁴Aro ipiganaja Jesus Garireaquë,
pinancari Isëre Tosorintsi, piátacaqueri.
Omanapague iquemocotaiguëri iraegui
timaigatsi canta. ¹⁵Yogomeantapë
pongotsipaguequë cara yapatoitaiga
joríojegui. Icaninabentaigabaqueri.

Te iranintaiguëri Jesus Nasaresati.
(Mt. 13.53-58; Mr. 6.1-6)

¹⁶Aique íaque Jesus Nasarequë,
iboeborotequë cara iquibiaque jirai.
Cara yameta, cara sábaroquë icanaque
pongotsiquë cara yapatoitaiga jorío,
yaratianque arota irinibaquineri
matsiguenga Irinibare Tosorintsi. ¹⁷Ipëri
isanguenare Isaías comantantatsiri.
Yaquipariaquero, iniaquero cara
isanguenaque:

¹⁸Pinanquina Isëre Tosorintsi,
ipasitënaró. Pigáquina
nongomantaguetiri coguitiachari

atiraca ongantima iragabisaicotai-
guëri Tosorintsi. Aisati pigáquina
Isëre Tosorintsi nangantocobin-
tairi antagaisati irasi camagari
nagabisaicotajiri, quero intagui
quimingari aisati. Aisati
pagobiacaquina naganinasëretai-
guëri iraegui agasëretachari.
Aisati pigáquina pagobiacaquina
naniacagaigairi comarajari. Aisati
nagabisaicotajiri iraegui
atsipiriaigatsi. ¹⁹Aisati pigáquina
nongomantaguetiri matsiguenga
ingábintsaiguëri Atingomi.

²⁰Aro itsonquero Jesus yapinaguiri-
quëro Sanguenari, yoguipigairi ipëri,
isobiaque. Inetsaiguëri omagaro
botoitachari. ²¹Jesus icantaiguëri:

—Yamai nomoncaraquero oca
Sanguenarica piquemaiguëca.

²²Iniacaninataiguëri ira quemaiguëri,
iquenganeintacaro ora caninatsaro
irinibare. Yosamitobaca:

—¿Teco iriro itomi José?

²³Aisati icantaigairi Jesus:

—Aiquenta pingantaiguëna:
“Agaguibegantatsiri, pigaguibegajima
Obiro aisati pomatsiguengasonori.
Poguibegaigairi matsiguenga cara
Caperinaoquë. Atsi yamai pitasangante
aisati yaca poboeborotequëca”.

²⁴Përosati icanqueri Jesus:

—Aisonori nangantaiguëmi
pitsoingaguiri pomatsiguengasonori
quinguitsatimiro Irinibare Tosorintsi,
carari ira timaigatsi parigotiquë
pinganinabentaigabaqueri. Naro
nacantari Erías jirai. ²⁵Pigóiguë ainta
pinasegui tojai ogamaimentaga jorío
aguebatsitequë cara icomantanque Erías
comantantatsiri jirai, cara yamanaque
cara quero oparigui angani maba osarini
aisati basini aganguisati, cara
itasegaiguë matsiguengajegui, ²⁶carari
te iragátngani Erías iromitocotaiguero

tsinane jorío ogamaimentaga, iroonti igáqueri Tosorintsi cara poeboroquë jitacha Sarépita cara Sirónquë imitocoquero tsinane inabitacha canta, cagaro omatsiguenga. ²⁷Aisa nacantari Eriseo comantantatsiri. Cara itimi iriro ainta tojai jorío iribatsasetaga, carari te iragaguibegajiri iriro Eriseo. Paniro yogaguibegajiri Siriasati jitacha Naamán, basiniati matsiguenga cagari jorío.

²⁸Ocari oca iquemaiguë botoitachari-jegui, iguisasitaigacari Jesus, icantaiguëri:

—¿Picanti cara Tosorintsi te iraninte iromitocotaiguena?

²⁹Icabiritaigaca, yágaiiguëri Jesus, yágaiiganaqueri sotoquë Nasaret cara otserabatsaquë cara pini iboeborote, icogaigabitaca iromiongaiguërimo osobinta. ³⁰Carari tiguëti ingantima irotsagatajiri basini; aro iquenaque aganguisatiquë irirojegui, iátaji.

Ipiganaja Jesus Caperinaoquë.

(Mr. 1.21-28)

³¹Aique ipiganaja Jesus Caperinaoquë, cara Garireaquë. Cara sábaroquë yogometaiguëri matsiguenga.

³²Iquemaigabaqueri iquenganeintasantacari yogometaiguërinta aisa icantari ibega itingomi ogóasantatsiri. ³³Cara yapatoitaiga jorío ainta inasegui sërari inancari camagari quimingari. Catsigue icaimasantëri Ira Jesus:

³⁴—¡Ongainta! Quero picantaiguina, Jesus Nasaresati. ¿Aroco pipocasique yamai pitsipiriacaiguëna? Nigóquimi Obiro, Ira caninari Itomi Tosorintsi.

³⁵Isintsitsaqueri Jesus, icanqueri: —Pomairete. Pijátotipairi sërarica.

Aro yotëanëri sërari quibatsiquë aganguisatiquë botoitachari, isotogopitanëri, te paio ingantëmatiri.

³⁶Antagaisati itsorogasantë

iquenganeintasantacari, inibatobaca, icantaiguë:

—¿Pairo ojita oca? Patiro inibatëri camagari iquemisanqueri iátaji. Tojai itingomitasanti, tojai itasonganti.

³⁷Aro omagaro timaigatsi cara Garireaquë iquemocotaiguëri Jesus.

Jesus yoguibegajiro iraguiro Peroro.

(Mt. 8.14-15; Mr. 1.29-31)

³⁸Aique isotocanë Jesus pongotsiquë cara yapatoitaiga jorío, icanaque ibangoquë Simón. Ojanaitë iraguiro Simón, ocatsiringaeguisigui. Yamanaigabaqueri:

—Pigaguibeganairo.

³⁹Yotsitiparo Jesus, icanque:

—Aro omeganaimata ogatsingaeguire. Aito cara pibeganaa, ocabiritanaa opaguetaiguëri iraperi.

Yoguibegaigairi arosonori janaitatsiri.

(Mt. 8.16-17; Mr. 1.32-34)

⁴⁰Cara icanaque paba, yamaigapëneri Jesus tojai janaitatsiripague, pairoraca óguëri. Aro yoguëneri ibaco iguitoquë paniropague, yogaguibegajiri. ⁴¹Aisati ainta inantaigacari camagari. Cara yomisotocajiri icaimaiguëri camagari igótinta Iriro Agabisaicoontatsiri icantaiguë:

—Obiro Itomi Tosorintsi.

Carari Jesus yomisotocagairi camagari, yoguimairentaiguëri tenta iraninte ingomantëgotiri.

Yogaganaca Jesus cara Joreaquë.

(Mt. 4.23; Mr. 1.35-39)

⁴²Oquëtaguetanë iáque Jesus cara tera ontimingani. Aique icogaiguëri matsiguenga, iniaigairi, icantaiguëri; —Quero piáti. Pintime yaca naroeiguica.

⁴³Carari icantaiguëri Jesus:

—Quero nini yaca. Caninataque najáte. Igáquina Tosorintsi

nongomantaguetiri matsiguenga poeboropaguequë cara intingomintai-guemari Tosorintsi pënibaquenta orequima iragántane.

⁴⁴Aro iátagueque Jesus iquenguitsata-guetanëro Caninaro Nibarintsi pongotsipaguequë cara yapatoitaiga joríojegui cara Joreaquë.

Yágaiguëri tojai sima.

(Mt. 4.18-22; Mr. 1.16-20)

5 ¹Basiniquë cataguiteri Jesus iquenguitsatomotaiguëri matsiguenga cara onamijaquë angaare jítacha Jenesaret (aisati ojita Garirea). Arosonorinta matsiguenga itsinatsinaito-baca, aisati itsinatsinataiguëri Ira Jesus. ²Iniaque Jesus pite pitotsi cara onamijaquë angaare, carari yaguëtaiganaque casintaro ira siriatsitiri iquibaigairo isiritite. ³Aro yotecaro Jesus ibito Simón, icanqueri ingomate arosata. Aro isobiaque pitotsiquë cara angaarequë, yogometaiguëri botoibiritaigabacari onamijaquë. ⁴Cara itsonquero Jesus irogomeantane, icanqueri Simón:

—Intsome cara aganguijaquë pisiriate.

⁵Yotabitanëri Simón:

—Ogometinari, nasiriataigabitaca omagaro naraningui, te náguëmate sima, carari Obironta cantëna, naniantaimaro aisati.

⁶Aro imiongaigairo irisiriamo yágasantaigairi sima inosiquëgotaguëri tojaisonorí. Iacaró isiritite pënibaque iribëshëgotanë. ⁷Icaimaiguëri basini pitotsiberi yacotaiguëri arota iribocaigapë iromitocotaiguëri. Yaretocotaigapa, yotetaiguëri sima pite pitotsiquë, jagaca, pënibaque otsitiganë.

⁸Ocari oca iniaque Simón Peroro, iquenganeintasantaca, yobaticagueritotasicari Jesus, icanqueri:

—Natingomi, caninataque pijátaje. Te nanganinate naro, nacantagueti te ongoemeite; teni onganinate pintsibatina.

⁹Itsorogasantaguë Peroro aisati omagaro itsipa cara iniaiguëri tojai sima yágaiguë. ¹⁰Aisati itsorogaiguë Santiago aisati Joan, itomi Sebereo, itarobacaatacaqueri Simón. Aique icanqueri Simón Jesus:

—Quero pitsorogui. Aisa pinganquima cara pisiriati sima, nocogui yamai pinguemisantacagaiguenari basini matsiguenga, Naronta agabiamine.

¹¹Aro yaretocotaigaa onamijaquë, ijocaiganaquero ibito, irisiriamo, omagaro, yoguataiganaqueri Jesus.

Jesus yogaguibegajiri iribatsasetaga.

(Mt. 8.1-4; Mr. 1.40-45)

¹²Cara icanaque Jesus poeboroquë, iniobëri sërari iribatsasetasantaga. Ibatsaguetanë omagaro, pitsonqueri. Aro yobaticagueritotasipari, yamanopëri icanque:

—Natingomi, pinintica, piguëtetaninaro nobatsagoro pigaguibegajina.

¹³Aro itimagonaguitanaca ibaco Jesus yotsagaqueri, icanqueri:

—Nocogui yamai; nagabisaicotajimi.

Aito cara opeganaa ora iribatsagoro, iquëtetanai. ¹⁴Igáqueri Jesus:

—Quero pairi picomantëmati. Pijáte saserirotiquë, poniaguimari irogóontëmi cara pabisëgotai. Pingantiro ora icanque Moisés: páganëneri saseriroti pobira, iritaguineri Tosorintsi. Aro irogótotaiguëmi matsiguenga aroque pabisëgotai piquëtetanai.

¹⁵Carari aiquero piátanëtigue cara icomantëgotaguiri Jesus. Ipcasitai-guëri tojaisonorí matsiguenga inguemisanquero irogomeantane Jesus aisati arota iragaguibegaigairi janaitatsiripague. ¹⁶Aro iáque Jesus canta tenta

ontimingani, yamanaqueri Iriri
inibatëri.

Yoguibegajiri emëngari Jesus.

(Mt. 9.1-8; Mr. 2.1-12)

¹⁷Basiniquë cataguitëri iroontita
yogomeanti Jesus pongotsiquë, ainta
isobicaiguë iquemaiguëri bariseopague
aisati ira ogameantiro isanguenare
Moisés ipaniaguetaigaca Garireaquë,
Joreaquë, aisati Jerosarënuë. Aisati
Jesus yogaguibegaigairi janaitagueta-
tsiri itasorintsitequë, yagobiaquerinta
Tosorintsi. ¹⁸Aique ipocaiquë
sëraripague yanatocoigapëri sërari
emëngari te iranëibintsataje. Icoigaigabi-
taca iráganëri tsomagui cara inasegui
Jesus. ¹⁹Tiguëti inguenacaqueri cara
ingaaganëri iacaronta pongotsi
matsiguenga. Aro itaganëri jonoica
pongotsi yomorganëro yoguëantaiga-
cari jatasintsi aisati sogatsa catingasati-
quë cara inasegui Jesus. ²⁰Jesus
igótaiguëri cara yoguiaiguëri
iragaguibegajiri emëngari, icabëri:

—Yamaica, nomatsiguenga,
nasetajimiro ora picantaguëti te
onganinate; quero iguisëgotaimiro
Tosorintsi, quero iquengaimiro.

²¹Ira ogameantiro isanguenare Moisés
aisati bariseo iquenganeintaigaca
icantobaganaca:

—¿Pairo ijica Iriati Ica icantocotague-
tasitari Tosorintsi negaca? Quero pairi
setaguëtirone ora te onganinate, paniro
Tosorintsi. Ijitosorintsitasitaca Ica.

²²Igónijnica Jesus ora iquenganeintai-
gaca; yotabitaiganaqueri:

²³—¿Pairo piquenganeintobitaiga
najitosorintsitasitaca? Te ongomëtare
nanganqueri: “Nojocajimiro ora
picantaguëti te onganinate,
nomaguisantocotimiro”, carari comëtaru
nanganqueri: “Pingabiritima, págairo
pijatasi panëitanae”. Aroca nanganque:

“Pingabiritima panëitanae”, queroca
yanëiti, pisërontobitaiguëna.
¿Aisonorico? ²⁴Yamai nogaguibegajiri
janaitatsiri arota nogótacagaiguemiro
cara icanquena Pabati: “Pijocajineri ira
cantaguëtiro te onganinate; aique quero
aguisëgotëtajari”. Nagabeiro Naronta
paniacha Jonogaguëtequë nomatsigüe-
ngatapë cara niboguë yaca quibatsica.

Aro icanqueri emëngari:

—Atsi pingabiritima, págairo pijatasi,
pijåtaje pobangoquë.

²⁵Aito cara iniaiguëri icabiritanaca,
yágairo iatasi, iátaji ibangoquë,
icanque:

—Aisonori, icaninatasanoti Tosorintsi.

²⁶Iquenganeintasantaiganaca omagaro
botoitachari, itsorogasantagaiganaque
aisati, icantaiguë:

—Caninarisonori Tosorintsi. Yamai
aniaiguëro ora te oneingani jirai.

Irebí (aisati ijita Mateo) yoguiatëri Jesus.

(Mt. 9.9-13; Mr. 2.13-17)

²⁷Cara isotocaji Jesus pongotsiquë,
iniopëri Irebí, icoicotaguëtiro
imatsiguenga iguireguite, ipagantiri
cobeingari Iromaquë. Icampëri:

—Intsome, piguiatanëna.

²⁸Aro yapabaquëanëro cara
isanguenatocotaguequeri quirequi,
icabiritanaca, yoguiatanëri Jesus.

²⁹Aique iáque Irebí ibangoquë
yapaaguëri Jesus. Aisati icaimaiguëri
tojai coigotantatsiripague aisati basini
imatsiguenga. Yapaagaiguëri
antagaisati. ³⁰Aro iniaigapëri
bariseopague aisati ira ogameantiro
isanguenare Moisés, yabentaigaca,
yosamitaigapëri irogomere Jesus:

—¿Pairo pitsipabiritaigacari
coigotantatsiripague aisati cantaguean-
tatsiripague? ¿Pairo papaagobiqueri
aisati pairo pógagobitaigacari?

³¹Yotabitaiganaqueri Jesus:

—Ira cajigatatsi te ingoguiri jompiantatsi, carari ira janaitatsi iriro coguiri. ³²Te iroro nopocasite nangaimaguetiri caninatatsiri, irianti nangaimagueque ira cantaguetiro te onganinate arota irojocajiro, ingantaigaima yacaqueroca.

Icomantë Jesus paio te iritibiritima irogomere.
(Mt. 9.14-17; Mr. 2.18-22)

³³Icantaigapëri Ira Jesus:

—Ititopiantaiga irogomere Joan aisati irasi bariseo. Ititaiga, yamanocotaiguëri Tosorintsi. Carari pasi pogomere yapaigui aisati yógaiga. ¿Pairo te iritibiritima?

³⁴Yotabitaigabaqueri Jesus:

—Pigóiguë ora ametaiga cara iráque iina sërari: ingaimaiguëri imatsiguenga inganinataiganaque omagaro. Cara iraretaiguëma, ¿Aroco irititaigapëma? Quero itita iroontita intsibatëmari ira ágantatsi. ³⁵Carari cara iriátë jaanta ira águërone iina, aisati iriáiguë igaimane, aro iragasërequima, irititaiguëma. Aisati Naro, iroontita natsibataigari nogomere, ¿Pairo natitacagobiquimari? Carari cara nangamaquenica, nojocanëri nogomere, aro iragasëretocoquina, irititaiguëma.

³⁶Aique yosiacagantancari Jesus quingabaguientsi ora paniacha ora yametaiga matsiguenga carari pogomeque basiniati aisati:

—Te ongameite pinguemisantagaran-tiro ora yogometaiguimi bariseoegui aique pingonaguëro nasi nogomeantane. Pigóiguë cara pigabitëro inaga piguitsagare, páguëro inagasite manchaguintsisite. Aroca pigabitantimaro iroraisite, cara ámanaquima ontisaraanairo oquibe ora inagasite piguitsagare. ³⁷⁻³⁸Aisati pigóiguë ametaiga eiro ogüëro irorai oja oba cara iriraimasiquë oisha. Cara

onguëchotanë obaa iritopiganëma imasi, quero paparaata. Quero pairi ogantarone oja oba irinagamasiquë. Igóque cara onguëchotanë oja oba intonganë irinagamasi, oparaatëma obaa, aisati iraparaquima imasi.

³⁹Aisati pairiraca óguëmarone obaa inagaa quero icogui yógaro iroraia. Inganque: “Ora inagaa caninajaro, pabisiro ora iroraia”. Aisa ocanta quero piconaguero nogomeantane aisa irasi jirainisati. Nogometaiguëmi ora irorai carari ainta te iranintobëro, icanque: “Nameitacari irogomeantane omatsiguenga jirai, iroonti caninaro”.

Yogometocoquero sábaro Jesus.
(Mt. 12.1-8; Mr. 2.23-28)

6 ¹Aro basiniquë sábaro iáiguë Jesus aisati irogomerejegui cara panguirintsiquë. Ira irogomere yágaiguëro oguitsoterei tirigo imitoquero ibacoquë yapaiguëro oguitso. ²Iniaiguëri bariseopague, icantaiguëri ira irogomere:

—¿Pairo picantobitaiguëro yamai ora te onganinate? Teni ongameite pobiguitantimaro sábaro.

³Yotabitanëri Jesus:

—¿Teco pinibatapinintiro Sanguenari ora comantëgotaiguëri David aisati itsibatari cara págaiguëri itasegane? ⁴Aiti pan cara ibangoquë Tosorintsi, ora yobetsiquineri Tosorintsi oguëngani catinasatiquë Iriro. Ora pan iroonti iraperi saseriroti, te iranintacaguiri basini iraperi. Carari icanaque David cara ibangoquë Tosorintsi, yáguëro ora pan ipëri saseriroti, yapëro iriro aisati ipaiguëri ira icarataiguira, yapaiguëro. ⁵Nopaniaca Naro Jonogaguitequë, nomatsiguengatapë cara niboguë yaca quibatsica. Iroro nocomantëgotaguë quero pairoraca anganque sábaroquë.

**Cara sábaroquë Jesus yogaguibegajiri
ira camabocori.**

(Mt. 12.9-14; Mr. 3.1-6)

⁶Basiniquë sábaro, icanaque Jesus cara pongotsiquë cara yapatotaiga jorío, yogomeantapë. Ainta inasegui sërari camabocori ibacosonori, te osebatima.

⁷Aintasati bariseopague aisati ira ogameantiro isanguenare Moisés, inetsaiguëri Ira Jesus aroca iragaguibe-gajiri sábaroquë. Icoagaiguë ingantocotaiguëri Jesus: “Itarobacaaque Jesus sábaroquë, te inganinate”. ⁸Igóque Jesus ora iquengaigaca bariseopague. Aro icanqueri ira camabocori:

—Atsi paratingue yaca aganguisatiquë cara iraniaiguëmi omagaro.

Aro icabiritanaca, yaratianque.

⁹Icantaiguëri Jesus:

—Yamai nosamitaiguëmi: ¿Pairo isanguenaque Moisés caninatatsi angante sábaroquë? ¿Teco pininte pingantiro ora caninaro oraco te ongomeite? ¿Teco pininte pigauibegajiri janaitatsiri, pinintinico ingame?

¹⁰Inetsaiguëri omagaro Jesus. Aique icanqueri sërari:

—Pintimagonaguitima.

Aro itimagonaguitaca. Aito cara pibeganaa ibaco. ¹¹Iraegui ogameantiro Sanguenari aisati bariseoegui iguisasantaiganaca, yosamitobaca:

—¿Pairo anganqueri Jesus, agamaguëri?

Icoigaiguëri irogomere Jesus.

(Mt. 10.1-4; Mr. 3.13-19)

¹²Basiniquë cataguiteri iáque oguitojaquë irinibaqueri Tosorintsi. Omagaro tsitiniri yamanasegui.

¹³Iquëtaguetëgotë, icaimaiguëri ira aguiataiguëri, icoigaiguëri irogomere icarati 12, aisati ijitaiguëri iragátane.

¹⁴Ijitaiga: Simón (aisati ijiqueru Peroro);

aisati Antiris ireinti Peroro; Santiago; Joan; Jeripe; Baritoromé; ¹⁵Mateo; Tomás; Santiago itomi Arijeo; Simón ira nintasantiro ibafsite; ¹⁶Joras itomi Santiago; aisati Joras Cariotisasi ira ágagantërine Jesus.

Yogomeanti Jesus aisati yoguibeganti.

(Mt. 4.23-25; 12.15-21; Mr. 3.7-12)

¹⁷Yanongopaa, yaratingopë cara caninaguiteroquë. Ainta itsibataigari tojai irogomere aisati arosonori matsiguenga Joreasati, Jerosaresati, aisati ira paniaigacha Tiroquë aisati Sirónquë cara onamijaquë oquibe angaare. ¹⁸Ipocasitaiguëri inguemisan-taigabaqueri aisati icogaiguë iragaguibegajiri janaitatsiripague. Yoguibegaigari. Aisati yomisotocaigari camagaripague yapabaquëacagaigari tojai matsiguenga. ¹⁹Antagaisati cogaiatsi irotsagatiri Ira Jesus iniaiguërinta yagobeiro yogaguibegajiri omagaro janaitaguetatsiri.

**Jesus icomantëgotaiguëri ira
iraganinasëretaiguë Tosorintsi.**

(Mt. 5.1-12)

²⁰Aro inetsaiguëri irogomere, icantaiguëri:

—Iraganinasëretaiguëmi Tosorintsi obiro te pasintima pigóiguinta te pigabisaicotajima obiati. Pintingomin-taiguemarica, aro intingomibintaiguëmi obiro. ²¹Cara pitasegaiguë yamai, pinganinatë cara popë pinguemaquema aiquenta. Aisa pingantima, picogasantaguëca pingantaigue caninasati, iraganinasëretaiguëmi, iragabiauquemi cara pintimaiguë caninasati, iromitocoiguëmi, inguemasë retacaquimi. Iraganinasëretaiguëmi Tosorintsi obiro aragaigacha yamai aroquenta pogasëretaigaca. Picabaiguë aiquenta. ²²Iraganinasëretaiguëmi

Tosorintsi cara inguisëgotaiquëmi matsiguenga, cara irojocaiquëmi cara yapatotaiga, cara ingantocotaguetasitëmi, cara iromaintaiquëmi aroquenta piquemisantaiguëna Naro, Naronta paniacha Jonogaguitequë nomatsiguengatapë cara niboguë yaca quibatsica. ²³Jee, pinganinasëretasantaiguë: imaiquëmi Tosorintsi ora caninaro cara Jonogaguitequë, iraganinasëretëmi aisa icanta yoganinasëretaiquëri comantantatsiri jirai cara iguisaiquëri imatsiguenga, ipaiquëri iriro Tosorintsi.

Icomantëgotëri ira atsipiraiaguënguitsine.

²⁴Aisati icantaiguëri Jesus:

—Carari obirojegui casintaguetasantacha, pitsipiraiaguë, aroque páguëro pasiasi: picaninabentiro pasinta yamai. Carari aiquenta quero ipimiro pairoraca Tosorintsi, pitsipiraiaganaque. ²⁵Aisati pitsipiraiaganaque obiro piquemaigaca yamai; aiquenta pitasegaiguë. Yamai pijique: “Te nongoguitemaro pairoraca”. Aiquenta pingoque ingábintsaiquemi Tosorintsi carari quero imitocotimi. Yamai pitsipiriasitaiga cara picabataigui picaninabentaiguëro ora inatsi quibatsica. Yamai picabataiguë; aiquenta piragaiguëma cara iratsipiriacagaiguëmi Tosorintsi. ²⁶Aroca iraniacaninataiguëmi omagaro matsiguenga yamai, pitsipiraiaguë aiquenta. Aisa icanta iniacaninataiguëri jirai iraugui comantantatsiri matobiantatsiri.

“Pinintaiguëri iraugui quisaiquimi”.

(Mt. 5.38-48; 7.12)

²⁷Aisati icantaiguëri Jesus:

—Carari nangantaiguëmi obiro quemisantaiguënari: pinintaiguëri iraugui quisaiquimi, pingantaiguëri caninasati ira quisaneintaiguëmine, ²⁸potabitanëri caninasati ira cantëgot-

guetasiquimi, pomanocotaiguëri arota ingábintseri Tosorintsi. ²⁹Aroca iripasaboroquimi poboroquë, quero pipëgatari pinintacaguri iripasaborotimi cara querora aisati. Aroca irágopitëmiro pobasitoro, quero piguisiri, pinintacaguri iráganëro piguitsagare aisati. ³⁰Aroca iromanaquemi pairoraca, aro pomeri. Aroca irágopitëmiro ora pasinta, quero picocotiri aisati. ³¹Aroca pingoque ingábintsaiquemi matsiguenga, aro pingábintsaiquëri iriro. ³²Aroca pingábintsëri paniro ira cábintsëmi, ¿Pijiqueco iraniacaninatëmi Tosorintsi, ingantocobentëmi? Quero. Igóque cara tsoengatsiri te inguemisante inintaiguëri aisati ira nintiri iriro. ³³Aroca pinganqueri caninasati ira cantëmiro caninasati, ¿Pijiqueco ingábintsëmi? Quero. Aisa icanta icanquero cantagueantatsiri. ³⁴Aroca picogui irauguipigaimiro ora popirisitaquëri basini, ¿Pijiqueco imëmiro pairoraca Tosorintsi? Quero. Aisa icanta icantaiguë tsoengatsiri: ipirisitaquëri ira aguipigairine aisati. ³⁵Carari obirojegui, pinintiri ira quisaneintaiguimi; pingantiri caninasati; pomirisitatiri coguitiachari quero pogueiri irauguipigaimiro; aro iraniacaninatëmi Tosorintsi jonoquënantaberi, imasantëmiro ora caninaro, intomintaiquëmi, aisati pingantaiguëmari Ira timatsi jonoquë, icábintsaiquëri iraugui te ingarasiatiri aisati iraugui te ingomeite. ³⁶Pingantaneintëgotaguëtiri basini aisa icanta Pabati Tosorintsi icantaneintëgotaguëtiri.

Obitsita comantëgotënguichane.

(Mt. 7.1-6)

Përosati yogomeantë Jesus:

³⁷—Quero picantari joes. Quero picomantëgotiri pomatsiguenga: “¿Pairo

icantobiquero negaca? Icantaguetiro ora te onganinate”. Queroca pinibatëgotiri negaca, quero icomantëgotimi Tosorinti: “Aiti picantaguëti obiro”. Quero picantocotaguetasitari basini; aro quero icantocotaguetasitimi obiro. Pijocajineri ora icantaguetimi, pomaguisantineri, aro irojocajimiro obiro Tosorinti ora picantaguetomotiri Iriro iromaguisantimiro. ³⁸Pomeri coguitiachari, aro imëmi Tosorinti ora coguitiomotimi. Quero imichati Iriro, imagantasanotëmi. Aroca arosata pingábintsëri basini, pomabaqueri arosata, aisati arosata ingábintsëmi obiro. Carari aroca tojai pingábintsasan-tëri basini, aro tojai ingábintsasantëmi obiro.

³⁹Përosati yogomeantë Jesus. Inibatantaro quingabaguirentsi: —¿Aroco ingatsatanëri comarajari ira basini comarajari? Quero. ¿Queroco iparigaigui omoroquë pitirooti? ⁴⁰Aisati icanta, ira irogomere te irobatiri ira ogometiri, te irabisiri. Aroca irogótasananë tojai aisati inganquimari ibega ira ogometiri. ⁴¹Nosiacagantëmiro: aitica pairoraca otiomijani iroquiquë pomatsiguenga, aitisati oquibe pasi piroquiquë, ¿Pairo piniobiquero irasi cara te pigótima aiti oquibe pasi piroquiquë? ¿Pairo piguisëcobiritari pomatsiguenga cara icantaguëti, carari te pigóte pabisiri obiro picantaguetasanti? ⁴²¿Pairo picantobitiri: “Majire pine náguëtajimirota ora piroquiquëti”, carari quero pineiro aítinta anchapoa pasiquë piroqui? ¡Pamatobiantë! Pijitabeca picaninatasanti pabisirime pomatsiguenga. Obitsita obetsiquengui-chane, pijocajiro anchato ocomarajata-caquemi, aique piniasantanë cara páguëtajineri basini arosata ora iroquiquëti.

Ora anchato caninano aisati ira matsiguenga caninari.

(Mt. 7.15-23; 12.33-37)

⁴³Aiti basini yosiacagantaiguëneri matsiguenga Jesus, icanque:

—Ora caninano anchato tiguëti ongantima onguimingatë oguitso. Aisati ora anchato te ongomeite tiguëti ongantima onganinatë oguitso. ⁴⁴Antagaisati anchato oniantagani oguitso. Aroca aneiro oguitso anchato aro ogóquero ati ocanta anchato aroca caninari. ¿Aroca picogui pamaqui, aroca pijáque porontsiquë? Quero piáti pigóquenta te ine oguitso porontsi. Querootisati pobiguitiro oba cara jirinaquë. Ora anchato onguitsotanë asi poguiro. ⁴⁵Aisa icanta, ira caninari sërari iquengasëretapinintiro caninano, iroro icantaguëtiro ora caninano. Ira te ingomeite iquengasëretapinintiro ora te onganinate; iroro icantaguëtiro ora te onganinate. Pairoraca iquengasëretaca matsiguenga, irootisati irinibaque. ⁴⁶¿Pairo picantasibiriquina “Natingomi, Natingomi” carari te pinguemisantiro ora nacantaiguëmi?

Icantocoqueri Jesus ira quemisantasantiri.

(Mt. 7.24-29)

⁴⁷Aisati icantaiguëri Jesus:

—Yamai nosiacagantëmiro ati icanta quemisantinari. Iquemaquero nanibare, icanquero ora nacanqueri nogomequeri. ⁴⁸Aisati icantari ibega sërari obetsiquero ibango. Iquigasiquero tso magui coshobatsari-quë irooti cara yarecaro oquibe mopë osobi. Aro yáguero pongotsipoa yobatiaquero, yomianquero mopëquë yoguëshotancaro. Aro opariaque angani, pipoque jarini omotoncaatapa, posibitasantëro pongotsi, carari te

áganëro coshorinta pongotsi. ⁴⁹Ira quemëro nanibare carari te inguemisantinaro aisati icancari ibega sérari obetsiquëro ibango sibitabatsari-quë, te iritijasantiro pongotsipoa tso magui. Pipoque jarini omotoncaatapa, posibitasantëro pongotsi, potëanëro páganëro te iraniajiro ibango.

Jesos yoguibegajiri ironomire capitán.
(Mt. 8.5-13)

7 ¹Itsonque Jesos iquenguitsatomotai-guëri matsiguenga, aique iáque Caperinaoquë. ²Aro ainta soraro Iromasati cagari jorío. Iriro capitán, itingomi 100 soraro. Ijanaitasantë ironomire ira ininti capitán, pënibaque ingamaque. ³Cara iquemocoqueri Jesos capitán, igátaiguëri obatacagui joríopague iriátasitaiguëri Jesos iromanocotiri ironomire iragaguibegajiri. ⁴Yaretaigaca jorío yamanopiantai-gapëri Jesos:

—Caninataque pijátasitiri capitán irironta caninari. Piguibegajineri ironomire. ⁵Inintaigacái eiro jorío; yobetsicacái obango cara apatoitaiga.

⁶Aique iáque Jesos yoguiataigana-queri. Pënibaque irarequima cara itonguibocari basini iragátane capitán. Icomantapëri:

—Icanque nagapitante: “Natingomi, quero pitsipiriobitina popoque yaca nobangoquë. Nitsoingaa naro, tenta aisa nangantimi pibega Obiro. Obiro caninari, naro te. ⁷Iro te najátasita-guëtími. Nocogui pinibatë, irooti piguibegantaimari nonamire. ⁸Aintasati agátinari, aisati ainta soraro ira nagátaiguë naro. Aroca nagáqueri nosorarote: ‘Pijáte’, aro iriátë. Aroca nanganqueri basini: ‘Popoque’, aro iribocapë. Aisatica nagáqueri nomeraro: ‘Pingantiro oca’, aro

inganquero. Aisa picanta pibega Obiro. Omoncaraquima pairoraca pinibatë.”

⁹Iquemobëri Jesos, iquenganeintacari, icantaiguëri iraegui aguiataiguëri:

—Nangantasantaiguëmi: tojai iquemisantasantë capitán, yabisaigana-queri antagaisati joríojegui quemisantatsi.

¹⁰Aique ipigaiganaja iragátane capitán. Cara yaretaiganajaro pongotsi, iniaigapairi ironomire aroqueque ibeganaa, tegotsitatsi.

Jesos yoganiatairi otomi ogamaimentaga.

¹¹Aique basiniquë cataguiteri iáque Jesos cara poeboroquë jitacha Naín, aisati yoguiataiguëri irogomere aisati basini tojai matsiguenga. ¹²Cara yaretaigaca aitoniatí, itonguibocari matsiguenga yanatocotaigapëri igamaga iritijërinime. Irianti otomi paniro ogamaimentaga. Itsibataiganacaro tojaisonorí otimanamítane icantaneintë gotaigacaro. ¹³Iniopëro Jesos Atingomi, icantaneintëtogëro aisati icampëro:

—Quero piraga.

¹⁴Yotsitiparo ora págantancari yotsagaquero. Aro yaratingaiguë ira ágaiganaqueri. Icanque Jesos:

—Oboina, nanganquimini, pingabiritima.

¹⁵Aro icabiritanaa isobiaque ira camabitënguicha, inibatë. Aro icanquero iniro Jesos:

—Jerica pitomi, caniari.

¹⁶Iniaigabaqueri matsiguenga, itorogasantagaanaque, icaninabentai-guëri Tosorintsi, icantaiguë:

—Icaninatasanti Tosorintsi. Igácáiri comantantatsiri irogomecái Irinibare. Aisonorí itasongobencái Tosorintsi, icábintsaigacái cara aquemisantaiguëri.

¹⁷Aique omagaro timaigatsi Joreaquë aisati omagaro Garireasati iquemocotai-guëri Jesos.

Ira Joan baotisantatsiri igátaiguëri irogomere irosomipëri Jesus.

(Mt. 11.2-6)

¹⁸Aisati irogomere Joan icomantëgo-taiguëri Jesus ora itasonganque aisati yogomeantë. Aro Joan icaimaiguëri pite irogomere, ¹⁹igáqueri Atingomiquë icanqueri:

—Pijátasitiri Jesus, posamitapëri: “¿Obiroco Agabisaicoontatsiri Ira boquënguitsine, basiniatico naguiaiguë?”

²⁰Aro íaiguë irogomere Joan, icantaigapëri Ira Jesus:

—Igátaiguëna Joan baotisantatsiri nosamitëmi: “¿Obiroco Quirisito Agabisaicoontatsiri Ira nagamaca iriboquë, basinico naguiaque?”

²¹Aito cara irooti cataguiteri Jesus yogaguibegaiguëri tojai janaitagueta-tsiri; ijocaiguineri ira inancari camagari yogabisaicotajiri; aisati iniacagajiri tojai comarajatabetachari. ²²Aique yotabitaigabaqueri Jesus:

—Popiganajima, pingomantaiguëri Joan omagaro oca piniaque nacanque aisati ora piquemaquena. Pingantiri cara iniaana comarajatabetachari; yanëitanai carancaratatsi; ibeganaa iribatsasetaga iquëtetanai; iquemaiganaji maguemitari; icaniatanai camabitachari; iquemisantaigabaquero Caninaro Nibarintsi iraequi te irasintima, yogabisaicotaigairi Tosorintsi. ²³Yoganinasëretaiguëri Tosorintsi iraequi quemisantaigana-quina, te ingomëtina te iritsoenguina.

Jesús icantocoqueri Joan:

“Icaninatasanti”.

(Mt. 11.7-15)

²⁴Cara ipiganaja irogomere Joan, aique Jesús inibatëgotëri iriro. Icantaguëri matsiguengajegui quemaiguëri:

—Cani piátaiguë cara tera ontimingani, piquemisantaiguëri Joan baotisantatsiri. ¿Pairo piábiritaiguë? ¿Pigóiguërintaco iriro caninari sërari, iquemisantasantërinta Tosorintsi? Isintsisëretë. Cagari iriro cantaro choco cara posebatiro coguentima aiquero yaca aiquero cara. ²⁵¿Pairo piátasitaiguë? ¿Pinaquerico iquitsagaca caninasati? Teni. Pigóiguë cara ira quitsagatacha iguitsagare caninaro sibirato itimaigui cara ibangoquë itingomi. ²⁶¿Pairo piábiritaiguë? ¿Teco pigóiguëri iriro comantanquero Irinibare Tosorintsi? Aisonori nangantaiguëmi ibataiguëri basiniegui igomantantatsirite Tosorintsi. ²⁷Irirori sanguenatëgotënguicha jirai cara icantocopëna Naro:

Icanë Tosorintsi: “Notomi, aiquenta nagáqueri ira obatacaqueminé, ingomantaigapëri imatsiguenga: ‘Aique naro, coraque Atingomi. Piganinataiguëneri paneingomento’”.

²⁸Nangantasantaiguëmi ora aisonori, ainta tojaisionori comantantatsiri, carari noguibatëri Joan. Irironta ogótasantëri Tosorintsi, ibataiguëri basini matsiguenga. Carari antagaisati imaguëmari Tosorintsi, intingomintasantaguëmari, irobataiguëri ira Joan, irogótasantanëri Tosorintsi.

Caninasati inibatëgotëri Joan Jesús.

(Mt. 11.16-19)

²⁹Aisati icanque Jesús:

—Antagaisati quemisantaiguëri Joan aisati iraequi coigotantatsiri ibaotisatagaca icantaiguë: “Aisonori, icaninatasanti Tosorintsi cara icocagaiguëna nojocajiro ora nacantaguetaiguë te ongomeite, nomaotisataguëma”. ³⁰Carari irianti bariseoegui aisati iraequi ogomeantiro

isanguenare Moisés te iranintaigue ingantineri Tosorintsi ora icocagaiguëri. Teatisati iriátasitaiguëri Joan imaotisatiguëri. ³¹¿Pairoraca nosiacagantanquemi? ¿Ati picanta obirojegui? ³²Aisati picantaigari janequipague imaguimpitaigui saateriquë icanqueri basini: “Natamporatabeca carari te piguiataiguena; nosoncatabitaca carari teatisati piguiatina; nomaninquetabeca carari te pijáigue. Nacántatabitaca nogasëretomemegabitaca, carari teatisati piragasëretaiquema”. ³³Pinetse. Picogaigabitaca ingantaiguerome pomatsiguenga pairoraca picocaqueri. Piniagaabaqueri Joan baotisantantsiri itica aisati te iróguima piari, aro picantocotaguetasitaigari: “Oo, inancari Joan camagari, iroro ititaguëca”. ³⁴Aro nopaniaca Naro Jonogaguetequë, nomatsiguengatapë; te natitima, aisati nógaro piari. Aro picantocoiguëna: “Tojai yapasanti Iriro, aisati Iriro singuitachari, imatsiguengatacari ira coigotantatsi naguireguite aisati itsibataigari ira cantaguetaigatsi ora te onganinate”. ³⁵Carari igóque Tosorintsi cara icanque Joan caninasati aisati nacanque Naro caninasati antagaisati icocaquena; aisati omagaro quemisanquenane, irogóguë caninaro ora icocaquena Pabati.

Ora tsinane pitiriqueri iguitiquë Jesus cara ibangoquë Simón.

³⁶Ainta bariseo jitacha Simón, icaimëri Ira Jesus iribocapë ibangoquë, irapajaqueri. Aro icanaque, yogasobico-bëri mesaquë, yapaiguë. ³⁷Aintasati tsinane antagueantatsiri cara poeboroquë. Oquemocoqueri Jesus cara yapi ibangoquë bariseo, piátasiqueri, páigotanëneri casangajengaro. Ora pinanta pobetsicagani aribásitoro.

³⁸Paratingopë itapiiquë Jesus. Piragasantaca, oparintaca oquibantacari ora osengaja oroqui iguitiquë, aro oseguitiantacari oguisi. Pasaraguititanacari aisati pitiriantacari casangajengaro iguitiquë.

³⁹Iniobëro bariseo, ira pajaqueri Jesus, iquianca: “Irirome comantantsiri iragátane Tosorintsi, irogótobëro oca tsinaneca iroonti antagueantatsiri quimingaro, poguimingatëri cara potsagaqueri”. ⁴⁰Aro icanqueri bariseo Jesus:

—Simón, aiti ora nanganquemi.

Yotabitanëri bariseo:

—Atsi pinibate, Ogometinari.

⁴¹Icanqueri Jesus:

—Nosiacagantëmiro. Ainta sërari ipirisitataguetiri matsiguenga quirequi. Ainta paniro irebetëri 500 tenario; basini irebetëri 50 tenario. ⁴²Cara te irinaje iguireguite iripënabentairi ibatorote, aro isetaigaineri pitirooti ora irebetaigui. Yamai nosamitëmi: ¿Pairiraca nintasantiri ibatorote, yabisëri basini?

⁴³Yotabitanëri Simón:

—Irirojengari irebetabitacari tojai.

Icanque Jesus:

—Aisonori. Caninasati potabitanëna.

⁴⁴Aro yapisitanaca Jesus inetsëro tsinane, carari përosati inibatëri Simón:

—Carani nacapë yaca pobangoquëca, te págacananatobëna. Te

pomabaquinaro nija nanguibantëmaro naguiti. Piniacquero oca tsinaneca.

Oquibantëmaro osengaja oroqui naguiti, oseguitiantëmaro oguisi. ⁴⁵Te pasaraborotina cara nametaiga naroeugu jorío, carari oca pasarapiantacaro naguiti cara narepa irooti yamaica. ⁴⁶Te pishaguëantinaro asaiti naguitoquë, orari oshaguëantëna naguitiquë casangajengaro. ⁴⁷Iroro ora nongomantaguëquemi: aroquenta

onintasantëna, poniagaca cara aroque isetajinero Tosorintsi ora ocantagueta-santi tojai te onganinate. Carari basini cantatsi: “Te nangantaguete tojai”. Iroso te iranintaguëtina tojai.

⁴⁸Aiquero icanquero tsinane Jesus:

—Aroque nojocajimiro ora picantagueti te onganinate, yomaguisanquemiro Tosorintsi.

⁴⁹Aro ira igaimanejegui iparintaigaca yosaminatobaca:

—¿Pairiraca ijica Ica cara icanque: “Nojocajimiro ora picantagueti te onganinate, yomaguisanquemiro Tosorintsi”? ¿Iriroco jitacha Tosorintsi?

⁵⁰Jesus icanquero tsinane:

—Aroquenta piquemisanquina, yogabisaicotajimi Tosorintsi. Yamai pijáte pinganinasëretanë pomagoriasëretanë.

**Poguiataiguëri Jesus tsinane
omitocotopiantaiguëri.**

8 ¹Aique iquenaquenaiguë Jesus aisati irogomere poeboropaguequë.

Iquenguissatomotaiguëri matsiguenga ora Caninaro Nibarintsi, icomantëgotëro ati ocanta cara igáanti Tosorintsi.

²Aisati poguiataiguëri tsinanepague ora ijocajine ogamagarite aisati yogaguibegajiro cara ojanaitagueti.

Ainta María aisati ojita Magararasato, inabitacaro ogamagarite icarati 7;

³aintasati Sosana aisati Joana iina Cosa. Ira Cosa imitocoqueri Eroris cobeingari, yomisantineri iguireguitë aisati iromeraro aisati ibango. Aintasati basini tsinane poguiataiguëri Jesus. Aintanta oguireguitë, omitocotaiguëri Jesus aisati irogomere; opaiguëri ora icogaiga.

Jesus icomantëgotëri panguitatsi tirigo.
(Mt. 13.1-9; Mr. 4.1-9)

⁴Yapatoibiritaiganacari Jesus tojai matsiguenga paniaigacha

poeboropaguequë. Aro yosiacagantai-guëneri quingabaguirentsiquë, icanque:

⁵—Iáque panguitatsiri imiongaguitague-
quero oguitsopague tirigo iritoganequë.

Opariguitapë arosata oguitso onamiquë abatsi. Yagatiquëro matsiguengapague, aisati ipocaigapë tsimiripague, yapaigapëro oguitso. ⁶Basini tirigoguitso opariguitë cara mopësiquë, piabitanaca; aique pisiguiricanë tenta ine nija, ocamaque. ⁷Aiti basini opariguitapë cara totseisiquë. Piabitanaca tirigo aisati totsei, carari ora totsei pogamaguëro tirigo.

⁸Basini opariguitapë caninabatsariquë quibatsi, pianë, piquibianë caninasati, oguitsotasantanë. Aiti 100 oguitso patiro panguirintsiquë.

Cara itsonquero quingabaguirentsi, icanque Jesus catsigue:

—Aitica piguemitã ora piquemanta, pinguemisantiro ora nacantaiguëmi.

**Païro yogomebirique Jesus
quiringabaguirentsiquë.**

(Mt. 13.10-17; Mr. 4.10-12)

⁹Aique yosamitaiguëri irogomere:

—¿Païro ocanti ora posiacagantacái carani?

¹⁰Yotabitaiganaqueri Jesus:

—Nocogui pigóigue ati icanta Tosorintsi cara igáanti, ora te ogotingani jirai, carari ira matsiguengapague quero nocogui igóigui. Iroso nogomeantacari quingabaguirentsiquë nosiacagantëneri tenta iraninte irogóigue. Inetsabetaigaca carari te iranee, iquemaigabitaca carari te inguemaigue, te irogótaigabaquero ora nacantaigabitari.

**Igótacagaiguëri irogomere ora ocanti
quiringabaguirentsi.**

(Mt. 13.18-23; Mr. 4.13-20)

¹¹Aique icantaiguëri irogomere Jesus:
—Yamai noniagaiguëmi ati ocanti quingabaguirentsi irasi panguitatsiri.

Ora oguitso aisati ocantaro Irinibare Tosorintsi. ¹²Ora pariaquenguitsi abatsiquè ocantari ibega matsiguenga iquemaigabitacaró Irinibare, carari omanapague ipocasitaiguèri camagari yágabitsaqueri ora iquemabeca, yomaguisantacaqueri. ¹³Ora pariaquenguitsi mopèsiquè aisati ocantari matsiguenga quemaigabitáro Nanibare. Icaninabentabecaro carari iquemisantabecaro arosata. Cara icogui camagari irantacaguiri ora te ongomeite, opomirintsitomocari Nibarintsi, ijocajiro. ¹⁴Ora pariaquenguitsi totseisiquè aisati ocantari matsiguenga quemaigabitáro Nanibare, iquemisantabecaro arosata. Carari cara iquengasantanèro pairoraca inaguetatsi yaca quibatsica, iquengasantanèri iguireguitte inintasantiri, iquengasantanèro inganinabentiro pairoraca icogui inganque, aro yomaguisantanairo Irinibare Tosorintsi, te inguemisantanaíro. Te ine oguitso; te ingante caninasati. ¹⁵Ora pariaquenguitsi caninabatsaroquè quibatsi, otojaiganaque, iroonti aisati ocantaigari matsiguenga iraugui quemisantantobèro ora nogometiri. Pèrosati iquemisantaneña, icogui inganquero omagaro ora icocaqueri Tosorintsi. Icantaguèro pairoraca caninaro, icaninabentaiguèri Tosorintsi. Iriro cantaca panguirintsi cara pinè openguiterei ora inatsi tojai oguitso.

**Pingomantagueantiro
Caninaro Nibarintsi.**

(Mt. 5.15-16; 10.26; 13.12; Mr. 4.21-25)

¹⁶Aisati yogomeque Jesus:
—Aroca oboquero michero anetsantaiguèmaro, quero oguiro osobiquè cobiti. Querootisa oguiro osobiquè somamintotsi. Oguèroti jonoica arota ongonijatagueque

pairoraca. Irootisati nanganque Naro; nocoguini pigótasantiro Nanibare. ¹⁷Pairoraca ománocotaga yamai, ongonijaque aiquenta. Ora te ogótingani jirai, ogóquengani aiquenta; quero paio pimánëmataja. Pingomantègota-guetiro Caninaro Nibarintsi ati oanta iragáantane Tosorintsi cara inguemisanqueri matsiguenga. ¹⁸Iroto yamai pinguemasantiro ora nogometaiguèmi, pinguengumero arota pigótasantiguero. Pigóiguè arosata yamai, carari aroca pinguemisantanèna, nogótasantacagaiguèmiro nogomeantane. Irari basinipague te ingogue inguemisantina, quero iquemaiguina. Nágabitsaqueri ora iquemabeca, iromaguisanquero, ingomètobèmaro, quero igótèmatiro.

Icomantè Jesus pairi imatsiguengasonori.
(Mt. 12.46-50; Mr. 3.31-35)

¹⁹Aique piátasiqueri iniro Jesus, aisati yoguiataiguèro ireintiegui. Yaretaigapa carari tigueti ingantaiguema irinibataigapèri yoticaigabaquerinta arosonori matsiguenga. ²⁰Icomantèri matsiguenga:
—Arepa piniro, aisati pirentijegui. Ainta sotoquè; icogaiguini irinibataigapèmi.

²¹Yotabitaiganaqueri Jesus:
—Inato aisati igue iriantiegui quemaigabaquero Irinibare Tosorintsi, iquemisantaiguèro. Icaegui irianti quemisantatsiri nomatsiguengatacari.

**Jesus yoguimairenquero
sintsiri coguentima.**
(Mt. 8.23-27; Mr. 4.35-41)

²²Basiniquè cataguiteri yotetaigacaró pitotsi Jesus aisati irogomere, icantaiguèri:

—Intsome omontiaiganaquima antatinta angaare.

Aro iátocotaiguè, ²³páigotanèri coguentima. Inariaca Jesus isamasegui.

Omanapague pipoque oquibeguinte coguentima, omotoncaatanë nija, potiatanaca pitotsiquë, pënibaqueme iritsiticoiganaque. ²⁴Iátasiqueri Jesus, icabocapëri, icantaiguëri:

—iOgometinari! iOgometinari!
iAtsiticoiguëni! iPigabisaicotái!

Icaguitë Jesus, icanque:
—Omairiatanaeta angaare,
osantocotanaeta coguentima.

Aito cara omairiatantanai angaare,
osantocotanaï coguentima.

²⁵Icantaiguëri irogomere Jesus:

—¿Pairo te pinguemisantobitina?
Itisorogasantaignaque irogomere,
iquenganeintasantaigacari icantobaca:
—¿Pairi Ica? Inibatë, aro
oquemisantasantanëri coguentima aisati
angaare. Yoguimairenquero.

**Jesus yogabisaicoqueri sërari
inancari camagari.**

(Mt. 8.28-34; Mr. 5.1-20)

²⁶Ipaniaigaca Garireaquë Jesus aisati irogomere, yaretocotaigapa antatinta Gararaqüë. ²⁷Cara yagatanë, yaguëtanë Jesus, iniobëri Gararasati inancari camagari. Cosamani te inguitsagatima iguitsagare, te intime pongotsiquë, carari itimi cara itia camatsirini. ²⁸Cara iniopëri Ira Jesus, yobaticagueritotasitobacari, icaimapëri icampë:

—¿Pairo pinganquena? Nigóquimi,
Jesus, Obiro Itomi Tosorintsi
jonoquënantaberi. Quero pitsipiriaca-
guina.

²⁹Icaimë negaca aroquenta igáqueri Jesus iriátabitsatiri sërari. Igóque camagari cara irojoqueri Jesus. Tojai yágapininqueri camagari ira sërari. Aisati tojai yoguëshotapinintaigabitacari imatsiguenga sogatsaquë coshori cara ibacoquë aisati iguitiquë, carari itimishairo yobëshopiantairo te iragabiaiguëri. Ira camagari yáganëri

cara tera ontimingani. ³⁰Yosamitëri sërari Jesus:

—¿Pairo pijita?
Yotabitanëri sërari:
—Tojai najita.

Icanque tojai aroquenta inantaigacari arosonori camagari. ³¹Yamanaiguëri cara quero igátaiguiri iriáiguë omoroquë játaque tsonaguisonori. ³²Ainta inaignasegui arosonori chanco yapaigasegui cara tongariquë. Aro yamanaiguëri Jesus camagari:

—Aroca pijocaiguëna, pigátaiguena
cara chancoeguiquë ninampëmari iriro.
Yotabitanëri Jesus:
—iAtsi pijáigue!

³³Aro iátopitaiguëri sërari camagari, inantaigapari ira chancoegui. Aro isigaiganaca chanco cara tarangaquë, imatsematseiganaque angaarequë tobotn tobotn tobotn. Itsiticaiganaque ijogataiganaca omagaro chanco.

³⁴Aro ira omisantaiguiri chanco isigaiganaca icomantaiguëigapëri imatsiguenga cara poeboroquë aisati togantsiquë. ³⁵Aique iátasitaiguëri Jesus tojai Gararasati iranaiaguëro omagaro ati ocanta. Iniaigapëri Jesus aisati ira inantabeca camagari. Ainta isobiaque iguitiquë Jesus, iquitsagata, iquengaa inibatë caninasati. ItSOROgaigapë matsiguenga. ³⁶Ira netsaiguëro antagaisati icomantasantaigabaqueri basini ati icanta Jesus yogabisaicoqueri ira inantabeca camagari. ³⁷Aro omagaro Gararasati itsorogaiguëri Jesus, yamanaiguëri:

—Atsi pijátaje yamai, quero pipocaji
yaca aisati.

Aro yotetanaa Jesus pitotsiquë, pënibaque iriátëgotë, ³⁸ira inantabeca camagari yamanabecari Ira Jesus:

—Nocoguini naguiatanëmi.

Carari te iranintacaguiri Jesus,
icanqueri:

³⁹—Quero pipoqui. Pijátasitiri pomatsiguenga cara pobangoquë, pingomantiri ora icanquemi Tosorintsi tojai icábintsémi.

Aique íaque sërari icomantagueantapë omagaro Gararasati ati ocanta cara yogabisaicoqueri Jesus.

Jesus yoguibegajiro araasetatsiri; aisati yoganiatairo irisinto Jairo.
(Mt. 9.18-26; Mr. 5.21-43)

⁴⁰Aique imontiaigapaa Jesus aisati irogomere. Yoguiaigabaqueri tojai matsiguenga, yágacaninataigabaqueri.

⁴¹Itonguibocari sërari jitacha Jairo.

Iriro obatacaguir jorío cara pongotsiquë cara yapatotaiga. Yobaticagueritotasipari iguitiquë Jesus, yamanopëri icanqueri:

—Intsome nobangoquë. ⁴²Pënibaque ongamaque nasinto.

Ainta paniro irisinto, ocarati osarinite 12. Cara íáigasegui, itsinatsinataiganaqueri matsiguenga tojai. ⁴³Ainta tsinane piraaseque cosamani ocarati 12 osarini. Pipënabentaguetabecari jompiantatsiri omagaro ora pasinta, te aropei ongantima, te iromitocotëmatiro. ⁴⁴Aro piátasiqueri itisitaquë Jesus potsagaqueri cara ocarati iguitsagare. Aito cara pibeganaa, ocaratanaí oraa.

⁴⁵Aro Jesus yosamité icanque:

—¿Pairi otsagaitënaró naguitsagare?

Yotabitaiguëri antagaisati:

—Teni pairi otsagatimine.

Aique icanqueri Peroro aisati basini tsipacari:

—Ogometinari, ishongaiguëmi tojai matsiguenga itsinatsinataiguëmi.

⁴⁶Carari icanqueri Jesus:

—Ainta otsagaquina. Nigónijnca cara pogaguibegajiro natorintsite.

⁴⁷Aro pigóque tsinane cara igóquero Jesus, aro parepari omogomogoatapa, pobaticagueritotasipari ocomantapëri:

—Naro otsagaquero piguitsagare; iroro nibegantanaa cara niraaseinteque.

⁴⁸Yotabitanëro Jesus:

—Nomatsiguenga, aroquenta piquemisanquina nogaguibegajimi. Yamai pijáte pingaigasëretanë, pomagoriasëretanë.

⁴⁹Cara inibasigui Jesus, yaretasipari matsiguenga ipaniaca ibangoquë Jairo, icomantapëri:

—Aroque ocamaque pisinto.

Pitsipiriasiquima yamai cara páganëri Ira Ogameantatsira.

⁵⁰Iquemobëri Jesus, yotabitanëri:

—Quero pitsorogui. Patiro pinguemisantina, aro obeganaima pisinto.

⁵¹Yaretaiganaca pongotsiquë. Icanque Jesus:

—Quero picaigui omagaro: irianti Peroro, Joan, Santiago, Jairo aisati oniro ora janaitatsi intsibataiganaquina tsomagua.

⁵²Iniaiguëri omagaro iraicotaiguëro yogasëretocotaigacaro. Icampëri Jesus:

—Quero piraicotiro, teni ongameni, pisamini.

⁵³Icabíntsátaigabaqueri, igóiguënta cara ocamasantë. ⁵⁴Yágobagotapëro obacoquë Jesus, icaimëro catsigue icanquero:

—Janequi, pingabiritima.

⁵⁵Aito cara ocaniatanaí, pipigaa osëre, ocabiritanaa. Icanque Jesus:

—Pomero operi.

⁵⁶Iquenganeintasantanaca casintaro janequi ora camabitacha, carari igáqueri Jesus cara quero icomantague-tiri pairiraca ora cantënguicha.

Jesus igátaiguëri irogomere inguenguitsatomotaguetiri matsiguenga.

(Mt. 9.35-38; 10.5-15; Mr. 6.7-13)

9 ¹Aique Jesus yapatotaiguëri irogomere icarati 12, yagobiacagaguëri irojogantaguequimari camagari

aisati iragaguibegajiri janaitaguetatsiri.
²Igátaiguëri:

—Pijátaguete pinguenguitsatomota-guetiri matsiguenga ati icanta Tosorintsi cara igáanti aisati piguibegaguetajiri janaitatsiripague.

³Aisati icantaiguëri:

—Quero páganë pairoraca abatsiquë: quero páganë pigotiqui, quero pitsaguine, quero páganë pan, queroootisati piguireguitë, quero pite piguitsagare. ⁴Atiraca pijáiguë, pingapë ibangoquë ira cajemobëmine. Pintiomotiri irooti cara pigaganëma basiniquë poeboro. ⁵Aitica poeboro cara te iranintaigue irágacananataigaba-quemi, te inguemisantaigabaquemi, popotetaineri quibatsipane pisapatotequë, aro pigaganëma. Pingantaiguëri: “Tenta pinguemisanto-bëna, aiquenta iratsipiriacaiguëmi Tosorintsi”.

⁶Aro iátagueque, iquenaguetaiganaque poeboropaguequë, icomantague-taigapëri imatsiguenga ora Caninaro Nibarintsi atiraca ingantaiguëma iragabaisaicotajiri Tosorintsi. Aisati yogaguibegaguetajiri janaitatsiripague.

Eroris icogui iraneiri Jesus.

(Mt. 14.1-12; Mr. 6.14-16)

⁷Aique ira cobeingari Eroris cara Garireaquequë iquemocoqueri Jesus aisati irogomere, omagaro icantaiguë itasongaguetaiguë. Te irogóte pairoraca inguenguema aintanta cantatsi Jesus Irianti Joan ira yogamaguë Eroris. ⁸Ainta basini icanque Irianti Erías iconijapai. Basini icancotaiguëri Irianti comantantatsiri jirai, caniatajatsi. ⁹Icanque Eroris:

—Ira Joan nibatëacagantabitacari naati, carari ¿Pairi Ica naquemocoque itasorintsitasantí?

Icogabeca Eroris iraneirime Jesus.

Yomitojaiguëro pan Jesus cara itasonguëro.

(Mt. 14.13-21; Mr. 6.30-44; Jn. 6.1-15)

¹⁰Aro ipigaigapaa iragátane Jesus, icomantaigapëri antagaisati icantaiguë. Aique Jesus yágaiganaqueri casiriconiati aronisatiquë Betsaira, ¹¹carari igóiguëro matsiguenga, yoguetaiganaqueri tojai. Yágacananataigabaqueri Jesus, iquenguitsatomotaiguëri ati ocanta iragáantanequë Tosorintsi. Aisati yoguibegajiri janaitaguetatsiri. ¹²Aro ochapinitanë ipocasitaiguëri irogomere Jesus icarati 12, icantaigabitacari:

—Yamai pigátaiguëri icaegui matsiguengaca iriátage poeboropaguequë iromananteta iraperi aisati irisomaigapë. Teni ine perintsi yaca tenta ontimingani.

¹³Yotabitaiganaqueri Jesus:

—Pomaiguëri obirojegui.

Icantaiguëri irogomere:

—Iroonti inatsi pan pabocorooti aisati pite sima. Tigueti angantima omaiguëri iraperi queroca iáti amanantaiguëri.

¹⁴Aintanta tojai matsiguenga, sërari icarati 5,000. Icanqueri irogomere Jesus:

—Pigasobicaiguëri antagaisati, 50 yaca, 50 cara, 50 canta, aisa icanca omagaro.

¹⁵Aro yogasobicaiguëri omagaro.

¹⁶Aique yáguëro Jesus ora pan aisati sima. Inetsë jonoquë, icanqueri Iriri:

—Pabati, nacarasiatocoquimiro oca nojerijeguica popaiguinaca.

Aro itibatsaaguequero pan Jesus, yotsatengaiguëri irogomere arota imauguëri matsiguengajegui. ¹⁷Yapaiguë antagaisati, iqemaigaca. Aique yobiitaguetajiri irogomere ora irangarataneegui, iagajiro 12 cantiri.

Icanque Peroro: “Obiro Quirisito

Agabisaicoontatsiri”.

(Mt. 16.13-23; Mr. 8.27-33)

¹⁸Basiniquë cataguiteri iáque casiriconiati Jesus, yamanaseguiri Iriri.

Itsibataigari irogomere. Aro yosamitaiguëri:

—¿Pairi ijitaiguëna matsiguenga?

¹⁹Yotabitaiganaqueri irogomere:

—Aintapague ijitaiguëmi Obiro Joan baotisantantsiri. Ainta basini icantaiguë: “Ira Jesus Irianti Erías, ipocaji”. Aintasati ijitaiguëmi comantantsiri jirai ipigapaa.

²⁰Aro yosamitaiguëri:

—¿Pairi pijitaiguëna obirojegui?

Yotabitanëri Peroro:

—Obiro Quirisito Agabisaicoontantsiri igáque Tosorintsi.

²¹Aique icanqueri Jesus:

—Queroquerai picomantaguetiri pomatsiguenga. ²²Pigóiguë nopaniaca Naro Jonogaguitequë, nomatsiguengatapë cara niboguë yaca quibatsica. Yamai pënibaque najáque Jerosarénquë. Iratsipiriacagaigabaquina antiasipari aisati itingomiegui saseriroti aisati ira ogameantiro isanguenare Moisés. Aisati irógaiquëna, carari ongaraque maba cataguiteri, nanganiatanae aisati.

Ora inganque ira quemisantasantiri Jesus.

(Mt. 10.38-39; 16.24-28; Mr. 8.34-38; 9.1; Ir. 14.27)

²³Aro icantaiguëri Jesus:

—Iranintasantëca pairiraca aguiatanëñane inguemisantasantina, iranatanëro igorosite, quero icantanonta iriati, iroontita përosati imomirintsibenquinario pairoraca nongocaqueri Naro. ²⁴Ira cogabitacha ingábintsëma yaca quibatsica, tenta iraninte iratsipiriero, aiquenta iratsipiriasantëma. Irari quemisantasantënane yaca quibatsica, irooti cara ingamobiquina Naro, aiquenta intiomoquina Jonogaguitequë, intimasantapë caninasati. ²⁵Aintaca sërari irasintaguetimaro antagaisati ora inatsi yaca quibatsica, aique ingamaque iriátë Sharincabeniquë, ¿Pairo iráque?

¿Teco iratsipiriasiquimaro omagaro?

²⁶Quero pipasiquitina, querootisati pipasiquitocotinaro nanibare. Nopaniaca Jonogaguitequë, nomatsiguen gatapë cara niboguë yaca quibatsica. Aiquenta najátaje jonoquë. Cara nopigaima, nongobeingatasantapë nosangueguitetasantapë aisati icanta Pabati icobeingatasanti yosangueguitetasanti; intsibataigapëna ironomirepague Pabati irisaanganetsite caninari. Cara nopigaima naguipasiguिताiguëri iraegui pasiguitobitaiguina Naro yamai. ²⁷Aisonori nangantasantaiquëmi, nogomerejegui, aintapague obiroquë queroquerai cara picami irooti cara piniagabaquina nopocaje Naro iragáantanequë Tosorintsi.

Ipasiniatitanë Jesus.

(Mt. 17.1-13; Mr. 9.2-13)

²⁸Aro pabisanaque 8 cataguiteri, iáque Jesus. Yágaiganaqueri Peroro aisati Joan aisati Santiago, itongaiganaque tongagariquë. ²⁹Cara yamanasegui Jesus, ipasiniatitanë. Yosangueborotanë porirere, aisati oquëtatanotanë iguitsagare. ³⁰Aisati iconijatatomopëri pite sërari inibatagaiguëri Jesus, irianti Moisés aisati Erías. ³¹Aisati yosangueborotapë porirere iriro pite aisati. Inibatëgotapëro cara ingamaque Jesus aiquenta cara Jerosarénquë. ³²Ipotsiquitasantaiguë Peroro aisati itsipa, carari icaguitasantanë iniaquero irosangueguitere Jesus aisati iniaigabaqueri basini pite sërari itsibatapari yaratingopë. ³³Cara pënibaque iriáigae pitirooti, icanqueri Jesus Peroro:

—iOgometinari, caninataque inaigne yaca! Intsome obetsique yaca maba pongotsi otiomijani, patiro pasi, patiro irasi Moisés, aisati basini irasi Erías.

Carari te irogóte Peroro ora icanque; inibatasita. ³⁴Cara inibatasegui,

omabocapari mingori paguëtaguepëri.
 Cara poganguibotaigapëri mingori,
 itsorogaiganaque irogomere Jesus.

³⁵Aro iquemaiguëro Irinibare Tosorintsi
 cara mingoriquë, icantaiguëri:

—iIriro Ica Notomi nigáqueri
 nacaninabentasantëri! iPinguemisantai-
 gueri!

³⁶Cara itsonque inibatë, inetsaigabi-
 taca, te irine Erías teatisati Moisés,
 Irianti Jesus iniaque. Aro imánaiguëro,
 te ingomantëmatiri pairiraca; aiquesta
 ingomantëgotëro.

Jesus yoguibegajiri janequi tingaraachari.
(Mt. 17.14-21; Mr. 9.14-29)

³⁷Oquëtaguetanë yanongopaa,
 itonguibotaigabacari arosonori
 matsiguenga. ³⁸Ainta paniro icaimapëri
 Jesus, icanqueri catsigue:

—Ogomeantatsiri, pinetseri ica
 notomica, pingantaneintëgotiri. Irianti
 notomi paniro, ³⁹inancari camagari.
 Icaimapinintacaqueri, itingaraacacari,
 yosimaresetëri ibagantequë, itsipiriasan-
 tacaqueri teraiquerai irapabaquëajiri.

⁴⁰Aroque namanaigabitacari pogomere
 irojocajinerime notomi igamagarite,
 carari tiguëti ingantima iragabeiri
 irojocajiri.

⁴¹Yotabitanëri Jesus:

—iTe pigóiguero Irinibare Tosorintsi!
 iTerai pinguemisantaiguero obirojegui,
 terai pinganinataigue! ¿Ati ongantima
 nantsibataiguëmi nabetaiguëmi natsipiria-
 sita cara nogometasitaiguëmi? Tojai
 pitsoingaiguëna. Atsi pomapënari pitomi.

⁴²Cara yamapëri itomi, imogomogoa-
 taganacari camagari, yotëanëri janequi
 quibatsiquë, itingaraacaganacari. Jesus
 isintsitsaqueri camagari, igáqueri
 ijoquineri janequi, yogaguibegasantairi,
 ipëri iriri. ⁴³Iquenganeintasantanacari
 omagaro matsiguenga iniaiguëro.
 Icantaguë:

—¿Teco itasorintasanoti Tosorintsi,
 yagobeiri antagaisati? iIriro cobeingari!

**Aisati icomantaigairi irogomere Jesus
 cara ingamaque.**

(Mt. 17.22-23; Mr. 9.30-32)

Cara iquenganeintasantsiigari
 matsiguenga, icantaiguëri irogomere Jesus:

⁴⁴—Pinguengasantiro oca nongomantai-
 guëmica, quero pomaguisantiro.
 Nopaniaca Naro Jonogaguitequë,
 nomatsiguengatapë cara niboguë yaca
 quibatsica carari irácagantaiguëna
 matsiguenga irógaiguëna.

⁴⁵Carari te inguemaigabaquero ora
 icantabecari Jesus, icomëtaigabacaro
 tenta iranintacaguiri inguemiro. Aisati
 itsorogaiguë irosomitiri Jesus: “¿Pairo
 picanti?”

**Icomantë Jesus pairi obaquenguitsine
 cara itingomibintanti Tosorintsi.**

*(Mt. 18.1-7; 20.25-28; Mr. 9.33-37; 10.42-45;
 Ir. 22.24-30)*

⁴⁶Aique inibatobaganaca icantobaga-
 naca irogomere Jesus pairiraca
 obaquenguitsine irirojeguiquë. ⁴⁷Igóque
 Jesus ora iquengaigaca. Yáguëri janequi,
 yogaratianqueri aganguisatiquë,
⁴⁸icantaiguëri ira irogomere:

—Pairiraca ágacaninatërine ica
 janequica iquemisanquinanta, aisati
 irágacaninatëna Naro. Pairiraca
 ágacaninatënane, aisati irágacaninatiri
 Ira agáquina. Carari págacaninatërica
 ira cantacha janequi, pomitocotirica,
 pingábintsërica, aro Tosorintsi
 iraniacananatëmi, iraguibatëmi.

**Quero pometopitari basini
 quemisantatsiri.**

(Mr. 9.38-40)

⁴⁹Aique icanqueri Joan:

—Ogometinari, cani naniaiguëri
 sërari igáqueri camagari iriatopitëri

matsiguenga. Icantabequina iquemisanquemi, inibatantaro popairo, iroro igáantantari camagari. Tenta intsibataiguena naroequi, nacantaiguëri: “Quero pigáantantaro iripajiro Jesus cagaribinta obiro nasiegui”.

⁵⁰Yotabitanëri Jesus:

—Quero pometopitari. Queroca iguisasitái, iromitococái ingancái ibega eiro.

Te irágacaninataigabaqueri Jesus Samariasati.

⁵¹Aronibati cataguiteri cara iriátae Jesus jonoquë. Aro ipintsatanaca iriátë Jerosarénquë. ⁵²Igáqueri irogomere:

—Pobate cara Samariaquë, pobetsiquinaro cara nasamapë.

⁵³Aro iátabeca, carari igóiguë Samariasati iriátë Jesus Jerosarénquë, quero yoguibegui janaitatsiri Samariaquë, iroro te iranintaguëte irágacanimatobëri, te imeri pongotsi cara irisomapë. ⁵⁴Aro ipiganaja irogomere icomantapëri Ira Jesus:

—Teni iranintacagái asame Samariasati.

Aique pite irogomere, Santiago aisati Joan, yosamitëri:

Atingomi, ¿Picogui nomanocotiri Tosorinti iragáquineri pamari omaniëma Jonogaguítequë, otagopëri Samariasati opoguiriaiguëri?

⁵⁵Inetsaiguëri pitirooti Jesus, isintsitsaqueri, icanqueri:

—Teni onganinate anguiseri. Teni pigóigue ati picanta; teni pinganinasë rete. ⁵⁶Nopaniaca Naro Jonogaguítequë, nomatsiguengatapë yaca quibatsica arota nagabisaicotaigueri matsiguenga. Teri iroro nopocasite nagamagaigueri.

Aique yogagaiganaca basiniatiquë poeboro.

Ainta ira cogabitacha iraguiatirime

Jesos.

(Mt. 8.18-22)

⁵⁷Cara iáigasegui, ipocasipëri Jesus sërari, icampëri:

—Ogomeantatsiri, naguiatanëmini negaraca pijáque.

⁵⁸Yotabitanëri Jesus:

—Aiti imoro somani cara isami, aisati imagosi tsimiripague cara isami, carari te ine nasi nobango cara nanareima Naro caranta nopaniaca Jonogaguítequë, nomatsiguengatapë yaca quibatsica.

⁵⁹Aro Jesus icanqueri basini sërari:

—Obiro, intsome, piguiatanëna.

Yotabitanëri sërari:

—Natingoni, nocoguini naguiatanëmi, carari cara ingamaqueni apati. Pinintacaguina natianëri; aique coshoni naguiatanëmi.

⁶⁰Yotabitanëri Jesus:

—Piguiatina obiro. Ainta tsoengatsiri, ira te inguemisantiri Tosorinti; iritijirita piri. Pijáte obiro, pingomanta-guetiri matsiguenga ati ocanta iragáantane Tosorinti.

⁶¹Aintasati basini icanqueri:

—Natingomi, aisati naro nocoguini naguiatanëmi, carari arotsita najápanaantë nobangoquë nobetsataigapanaantimari nomatsiguengasonori.

⁶²Icanqueri Jesus:

—Cara irisiabaguitëgotiro isinguine sërari sabiriquë, inetsë cara iricaraq; queroca inetsi iricaraqero ibanguire. Aisa icanta, pairiraca parintachane iraguiatëna Naro, quero iquengaguetajiro ora icantaguetabeca jirai. Queroca yoguiatina përosati, queroca coshoni yogasantina, quero icomeiti iragáantanequë Tosorinti.

Jesos igátaguequeri irogomere icarati 70.

10 ¹Aique Atingomi icoigaiguëri basini irogomere icarati 70, igátaiguëri piteaque irobataiguëri Iriro cara poeboropaguequë cara iriátë Jesos aikuenta. ²Icantaigabaqueri:

—Ainta tojai matsiguenga icogasanti irabisaicotaigue, carari teni irine tojai comantaiguërine Caninaro Nibarintsi iragabisaicoontaiguëmari Tosorintsi. Aisati icantaigaro tojai oguitso panguirintsi, carari teni irine tojai ira obiguitirone. Pomanocotiri Tosorintsi iragátaiguëri comantantatsiri iriáiguë inguemisantacagaiguëri matsiguenga. ³Yamai nagátaiguëmi, carari picantari itiomijani oisha ira nagáque cara cobeingariquë. Tojai iratsipiriacaquemi tsoengatsiri carari nomisantaiguëmi. ⁴Quero páganë quirequi, querootisati pitsaguine, quero páganë basini pisapatote; quero pobetsatobacari ira tonguibotaiguëmine; pabisanaquitigui. Pintsatimataiguë cara nigátaiguëmi.

⁵Atiraca ingaimaigabaquemi pisamapë ibangoquë, pingapë tsomagui, aro pobetsatapëmari: “Nocoguini ingábintsaiduemi Tosorintsi, iromagoriasëretagaiguëmi”. ⁶Aroca icogui ingábintseri Tosorintsi, iraniacandinataigabaquemi, aro ingábintsaiduëri Tosorintsi iromagoriasë retacaqueri. Carari queroca ininti iquemisanti, quero imagoriasëretaguii Tosorintsi; paniro obiro ingábintsaiduëmi. ⁷Aroca irágacandinatobëmi, përosati pisame ibangoquë irooti cara pijátaje, quero pogagueta pongotsipaguequë. Popero aisati póguimaro ora imabaquemi, caninataquenta iripënabentëngani tarobacaatatsiri.

⁸Atiraca pijátaguë, aroca irágacandinataigabaquemi, popaiguero pairoraca imaiguëmi, ⁹pigauibegajiri janaitague-

tatsiri, pingomantiri: “Pëníbaque intingomibintaigapëmi Tosorintsi”.

¹⁰Atiraca pijáiguë, queroca yágacandinatobëmi, pijáte abatsiquë, pingomantiri: ¹¹“Pinguemaiguena: nopoteguitaiganacuema pojongamamori arota pigóigue cara icogabeca Tosorintsi intingomibintaiguëmi, carari te pinintiri obirojegui. Tenta págacandinataigabaquena, aisa ocanta, te irágacandinatimi Tosorintsi. Carari nogótacagaiguëmi pëníbaque intingomibintaigapëmari quemisantiriri Ira igáque Tosorintsi”. ¹²Pigóiguë jirai Tosorintsi iguisaiguëri Soromasati, itagaiguëri, ipoguiriaiguëri itsipiriacaiguëri. Yamaica nangantaiguëmi aikuenta cara ingomantëgotaiguëri matsiguenga, inguisasantaiguëri, iratsipiriasantacagaiguëri ira te inguemisantaigabaquemi; pabisanaquero cara iratsipiriacaiguëri Soromasati.

**Inguisaiguëri Tosorintsi
ira te inguemisante.**

(Mt. 11.20-24)

¹³Aisati icanë Jesos:

—iTojai pitsipiriaiguë obirojegui Coraseisati! iTojai pitsipiriaiguë obirojegui Betsairasati! Tojai piniaigabitëna cara nitasongagueanti, carari te pingantëmatima yacaquero, te pinguemisantina. Carari iraniaquename cara nitasongagueanti Tirosati aisati Sirósati, inguengasëretaguemame iriro, irojocaiguërome ora icantagueti te onganinate, inguemisantaiguëname, inganaqueme oquibepiriga manchaguintsi tsitaro quipiro aisati irisobicaiguëme somamoquë arota ironijagaiguemari imatsiguenga cara yogasëretagaca, icantaigaa yacaquero. ¹⁴Aikuenta cara Tosorintsi ingomantëgotaiguëri, iratsipiriacaiguëri ira Tirosati aisati ira Sirósati

tojointa te inganinataigüe. Carari iratsipiriasantacagaigüemi obirojegui Coraseisati aisati Betsairasati aroquenta piniaigabitobëna cara te onganinate, inguemisantaigüename, inganaqueme oquibepiriga manchaguñtsi tsitaro quipiro aisati irisobicaigüeme s nitasonganti, carari te pinguemisantina. ¹⁵Aisati obirojegui Caperinaosati, pijitasitaigabitaca pijáigüë Jonogaguite-quë, carari pamatobitaigaca obiati përosatinta pitsoingaugüena. Iroro pijátaguëque osobinta. ¹⁶Aisati nangantaigüemi, nogomerejegui, pairiraca quemisantaigabaquemine obirojegui, aisati Naro inguemisantaigüena. Iraegui tsoengaigabaquemine obiro, aisati iritsoengaigüena Naro. Ira tsoenguënane Naro, aisati iritsoenguëri Ira agáquina, te inguemisantiri. Yamai, pijátague.

Cara ipigaigapaa iragátane Jesos iquenguitsatomonti.

¹⁷Aique ipigaigapaa ira iragátane Jesos icarati 70, icaninataigapë, icantaigapëri:

—Natingomi, nojogantaigacari popairo camagaripague, isotocaiganaque.

¹⁸Icantaiguëri Iriro:

—Jee, aisonori. Naniaqueri Satanás itingomi camagarijegui cara ijoquengani jonoquë. Nagobiaqueri Naro. ¹⁹Iroro nopaguëtaigüemi nagabiomento. Aisa ocanta cara pigatiqüérica marangue aisati quitoniro carari quero icantëmatimi, aisati pigabiaiguëri camagaripague, inguisaigabitëmi quero icantimi atiraca. ²⁰Aisonori pigátaiguëri camagari, carari quero picaninataigui aroquenta iquemisantaigüemi camagaripague, pinganinatasantaiganaque aroquenta pijáigüë Jonogaguite-quë cara osanguenatocotaigaca popairo.

Jesos icaninabenqueri Tosorintsi Iriri.

(Mt. 11.25-27; 13.16-17)

²¹Aique poganinatasantëri Jesos Caninaro Isëre Tosorintsi, icanqueri Iriri:

—Pabati, picaninatasanoti; nacaninabentasantimini Obironta Itingomi antagaisati Jonogaguitiesati aisati omagaro quibatsisati. Ainta cantasitacha: “Nigótasanti naro”, carari pimánopitaiguëri ati picanta Obiro aisati ati ongantima pigabisaicotaiguëri. Irianti pigótacagaigüë ira quemisanquena ira te inguengasitima irogótasantëmi iriro. Caninataque piganinataiguëri iriro, picoquenta pigótacagaiguëri.

²²Aique Jesos icantaiguëri omagaro:

—Ira Pabati ipëna antagaisati igótacaquina omagaro. Paniro igótasantaquina Naronta Itomi; te irogótocotina basini matsiguenga. Teatisati pairi ogótirine Iriro. Paniro nigótiri Naro, Naronta Itomi. Aisati irianti nogometaigüë, nigótasantacagaiguëri Tosorintsi iriro.

²³Aique yapisitaanaca Jesos inetsaiguëri irogomere, icantaiguëri casiriconiati:

—Icábintsaigüemi Tosorintsi, yoganinasëretaigüemi aroquenta piniasantaigüero ora noniagaigüemira.

²⁴Nangantaigüemi: icogaigabitaca jirai comantantsirijegui aisati cobeingari-pague iraniaiguerome oca piniaqueca obiro. Icogaigabitaca inguemaiguerome oca piquemaigüëca yamai, carari te iraneina teatisati inguemaigüena.

Icogasanti Tosorintsi anintiri Iriro, aisati anintiri omatsiguenga.

(Mt. 22.34-40; Mr. 12.28-34)

²⁵Aro yaratianque ogomeantiro isanguenare Moisés, icogabeca ingomëtaguimarime Jesos. Yosamitëri:

—Ogomeantatsiri, ¿Pairo nanganque arota najáte Jonogaguítequë, nantimasantapë përosati, quero nacami?

²⁶Icanqueri Jesus:

—¿Pairo ocanti ora isanguenataca-queri Moisés Tosorinti? ¿Pairo pinibati?

²⁷Yotabitanëri:

—Pinintasantiri Tosorinti Atingomí, pomasëretasantimari obiati, përosati pinguengeri, pinguemisantasantiri. Aisati pinintiri pitimanamitane pibega cara pininta obiati.

²⁸Icanqueri Jesus:

—Caninataque pinibatë. Aroca pingantiro cantacha nega, aro pintimasantapë Jonogaguítequë përosati.

²⁹Carari ira ogomeantiro isanguenare Moisés icoque iraniacananatirime Jesus. Iroro yosamitaguëqueri:

—¿Pairiraca natimanamitane?

Ira Samariasati icábintsëri jorío.

³⁰Aro yotabitanëri Jesus:

—Nosiacagantëmiro quingabagui-rentsi. Ainta paniro jorío ipaniaca Jerosarénquë yanonganaca iátabeca aiqero poeboroquë jitacha Jericó. Carari aganguisati abatsiquë imabocacari cosirintipague, yágaigaba-queri icositaiguëri omagaro, yágabitsa-queri iguitsagare, ipasataiguëri. Aique ijocaiganaqueri abatsiquë, pënibaque ingamaque. ³¹Aro aique iquenopë paniro saseriroti, jorío aisati. Iniopëri ira sërari iramasitaga, aito cara yanamitanëri, te ingantaneintëgotiri.

³²Aisati ipoque basini jorío, imatsiguenga Irebí, iniopëri, yotsitipari, yanamitanëri, teatisati ingantaneintëgotiri. ³³Carari ainta Samariasati iquenopë, yarepari, inetsapëri, icantaneintëgotëri.

³⁴Iátasiqueri ijampitancari asaiti aisati obaa cochoari, iponataguequeri. Aique iqueicotacacari imoranequë Samariasati, yáganëri pongotsiquë cara isamaiguí quenaigatsiri, yomisantëri.

³⁵Oquëtaguetanai, icoque iriátë Samariasati, yáguëri iguireguite pite tenario, ipëri casintaro pongotsi, icanqueri: “Jerica quirequi.

Pomisantiri ica janaitatsirica. Yamai najáqueni. Queroca cotonguiboro quirequi, cara nopigaima nopënen- quimiri antagaisati”. Aique iáque.

³⁶Yamai, pinguengeri maba sërari iniaigapëri ira iramasitaga. ¿Pari itimanamitane ira itaiguë cosirinti?

³⁷Yotabitanëri ogomeantiro Sanguenari:

—Ira cantaneintëgotapëri.

Icanqueri Jesus:

—Atsi pijáte yamaica, pingantiro obiati negaca.

Icanaque Jesus obangoquë Márita aisati María.

³⁸Aique iquenaque Jesus abatsiquë, yarecaro poeboro cara otimi tsinane ojita Márita. Ocaimobëri obangoquë.

³⁹Aintasati irento Márita, ojita María, ora sobicomoqueri iguitiquë Jesus, oquemisanquero irinibare. ⁴⁰Carari opomirica Márita pobetsicaguequineri Jesus pairorapagueraca. Piátasiqueri, ocanqueri:

—Natingomi, pinetse paniro naro nobetsiquemiro poperi. Te omitocotina nirento. Atsi pingantiro omitocotina.

⁴¹Yotabitanëro Jesus:

—Márita, Márita, pogasëretagueca, popomirintsitaguecaro tojaipague. Ocaninataguetabeca, carari aiti patiro ocaninatasanti, ⁴²ora ocoque pirento, oquemisanquina Naro. Quero pairi ágabitsatiro cara otsibatëna Naro.

Jesos yogometaiguëri irogomere cara iromanocotaiguëri Tosorintsi.

(Mt. 6.9-13)

11 ¹Basiniquë cataguiteri iáque Jesos casiriconiati yamanaqueri Iriri. Cara itsonque, icanqueri paniro irogomere:

—Natingomi, ira Joan yogometaiguëri irogomere cara iromanocotaiguëri Tosorintsi. Yamaí nocogui aisa pinganquima Obiro, pogometaiguena nomanocotiri aisati.

²Icantaiguëri Jesos:

—Cara pomanaguëri Tosorintsi, pingantaiguëri negaca: “Pabati nasiatiegui, ainta Obiro Jonogaguítequë; nocogaigui cara iraniacaninataiguëmi omagaro matsiguenga Obironta Atingomisonori. Nocogaigui pintingomi-bintaiganaquena antagaisati. Aisati nocogui inganque omagaro matsiguengajegui ora picocagaiguëri aisati inganquimari iraequi timaigatsi Jonogaguítequë icantaigasegui omagaro picocagaiguëri. ³Pomapinintaiguena noperi antagaisati cataguiteri. ⁴Pijocaigainaro ora nacantaguetomiquimi te onganinate, pomaguisantinaro, quero piquengainaro. Pingábintsasantai-guena. Aisa nacanta nacábintsëri ira cantaiguëna ora te ongomeite, te nanguisaneintajiri. Quero pinintacaguiri camagari irantacaguina ora te onganinate”.

Cara pomanocoqueri Tosorintsi ora coguitiomoquimi, aro imëmiro.

(Mt. 7.7-11)

⁵Aisati icantaiguëri Jesos:

—Pinetse, nosiacagantëmiro aisati. Aisati ocanta aroca pijátasiqueri pomatsiguenga aganguite pomaniri pan. Pingampëri: “Nomatsiguenga, pomenaro maba pan. ⁶Yamaicasonori yarequina

nomatsiguenga, carari te inëmate ora nomëri”. ⁷Aique irotopiquimi cara tsomagui, inganque: “Quero paseriguina. Aroque nasiquero sitëcori, nisamaiguini naro, najina, najaniquite-pague. Quero nacanta nacabirita yamaí cara nomabaquemiro pan”.

⁸Nacanquemi: queroca icabiritaja ipimiro irironta pamigote, ingabiritajima imëmiro ora pamanopiantëri arota quero paserigairi basini.

⁹Nangantaiguëmi aisa ocanta: pomanopiantiri Tosorintsi pairoraca coguitomotimi, aro imëmiro; pingogopiantiro pairoraca, aro piniaquero; pingaimapiniqueri, aro inguemaquemi, irasirëgotëmi. ¹⁰Ira manántatsi imëngani; ira cogatsi iraniaquero; ira cajematsi inguemaquengani imëngani. Iromitococái cara omanaqueri; cara ongooqueri ironijagajái. ¹¹Pinetse, aroca iromanaquemi pitomi inganquemi: “Apati, pomena pan”, querosonori popiri mopë. Iromanaquemica: “Pomena sima najaguëri”, quero popiri marangue. ¹²Iromanaquemica: “Pomena iguitso tiapa”, quero popiri quitoniro. Quero popiri, iroonti pomasantiri ora icoguitiaca. ¹³Pinetsaigue. Te pinganinatasantaigue obiro, carari pigóiguë pingábintaiguëri pitomi, pomabaqueri ora icoguitiaca. Icaninatasanoti Piri Tosorintsi, Ira timatsi Jonogaguítequë, igótasanti icábintaiguëri iraisati, imaguëri Caninaro Isère ira manëgotaguiri.

Icantocotasicari Ira Jesos: “Imitocoqueri itingomi camagari”.

(Mt. 12.22-32, 43-45; Mr. 3.20-30)

¹⁴Basiniquë cataguiteri Jesos iniaqueri poro sërari inancari camagari imasantitacaqueri. Ijoquineri camagari, itasongobenqueri sërari, inibatagajiri

caninasati. Iniaiguëri matsiguengajegui iquenganeintasantaigacari, ¹⁵carari aintapague icantasitaigacari:

—Iroonti ijogantari camagari iragabiomento Berisebó itingomi camagarijegui, imitocoqueri Berisebó.

¹⁶Ainta basini tsoenguiri Jesus icanqueri:

—Ogomeantatsiri, nocogaiguini nanetsemi pitasonguinaro pairoraca ora nogóontémi Obiroca Quirisito.

¹⁷Carari igóque Jesus ora iquengaigaca. Icantauguëri:

—Aroca irógobaguima matsiguenga timaigatsi quibatsiquë, ¿Teco iripoguiriobaguima? Aisa icanta matsiguenga pongotsiquë; queroca iquengaiga, querootisati itiomotobaga përosati. ¹⁸Tesonori iromitocotina Satanás. Ipëgatina. Picanque cara imitocoquina Berisebó cara nojogantari camagari. Arome Satanás inguisaiguë rime igamagarite, ¿Atiroco ingantima intingomibintaiguë rime camagarijegui?

¹⁹Irome omitocoquinane arota nojoquiri camagari, ¿Iriatisatico camagari omitocotaiguëri pomatsiguenga cara ijoqueri camagari iriro? Irro ogótacagaiguëmine pomatsiguenga cara pamatobita obiati, picantocotaguëtasitaiguina. ²⁰Carari yagobiacaquina Tosorintsi, iroro nojogantaigari camagaripague ora pigóontéma aroque parequimi yaca obiroquë iragáantane Tosorintsi, icogabeta intingomibintaiguëmine. ²¹Ira camagari aisati icantari ibega sërari sintsiri, aiti ibiane, ichaapite, itongomento, omagaro ora yomisantantaro ibango querota icositiri pairoraca irasi. ²²Carari iriboqueca basini sërari sintsirisonori, irabisëpëri isintsire, iragabeiri, irágopitapëri irógomento ora yabentabeca, imaguëtaigapëri imatsiguenga pairoraca ingogue. ²³Ira te

inguemisantina, te iraguiatina, iguisaquina, iriantinta iquemisanti Satanás. Aisati ira te iromitocotina, te inguemisantacaguinari matsiguenga, iquemisantacaqueri camagari. ²⁴Obirojegui jorío picantaigari ibega sërari inancari camagari quimingari. Isotocasitanaari camagari sërari; aro iátagueque igamagarite cara piriaguiteroquë quibatsi. Ico Gabeca iromagorie carari tiguëti ingantiro. Aique iquianca: “Nopiganajima nobangoquë, cara sërariquë cara nopaniaca”. ²⁵Cara ipigapaa iniopëro pongotsi otarogaga, obetsicaga, ositaga. ²⁶Aique iáque, icaimaiguëri basini camagari quimingarisonori icarati 7. Aique yagobiaiguëri sërari icasëretaigapairi, inantasantaigapari. Yogatsitasantëri sërari, itsipiriasantacagaiguëri.

Icaninasëretaiguë quemisantatsiri.

²⁷Ainta arosonori matsiguenga iquemaiguëri Ira Jesus. Ocaimë paniro tsinane, catsigue ocanqueri Jesus:

—Tojai Tosorintsi icábintsasantëro piniro ora tominquemi jirai tsotaquemi.

²⁸Carari icanquero Jesus:

—Aisonori, carari icábintsasanotai-guëri yoganinasëretaiguëri antagaisati ira quemagabaquero Irinibare Tosorintsi, iquengasëretëro, iquemisantasantëro.

Jesús icamanaaqueri iraegui botoibiricarira.

(Mt. 12.38-42; Mr. 8.12)

²⁹Yapatobiritaigapari Jesús tojai basini matsiguenga. Aique yogometaigabaqueri Jesús, iparintaca icantaiguëri:

—Te pinganinataigue tojainta pitsoingaiquëri Tosorintsi; iroro piniantëna: picogaiguëri natasongomotai-guëmi; carari quero nacantajimiro aisati. Pinguengasëretiro ora icanque

Jonás cara yosiguina nibega Naro, aro pinguemisantina. ³⁰Piquemocotaiguëri Jonás jirai, iniguëri omaganiro canianiro iguibeguente sima. Maba catagüiteri inë tsoماغüi, aro icomarangairi onamijaquë ora irogóontaigabaquimari Nínebesati cara igáqueri Jonás Tosorintsi. Aisa nacanta Naro: aiquenta pigóontaiguëna cara igáquina Tosorintsi; nangamaque, ongaraque maba catagüiteri nanganiatanae Naronta paniacha Jonogaguitequë, nomatsiguengatapë cara niboguë yaca quibatsica. ³¹Aisati jirai ainta tsinane itingomi omatsiguenga Sebasati. Cara opaniaca parigoti, oquemocoqueri Saromón tojai igóque iriro, aro piátasiqueri jaanta oniopëri oquemisampëri. Yamai ainta Naro obirojeguiquë, nobaqueri Saromón carari te pinguemisantaiguena. Aiquenta, cara Tosorintsi ingomantëgo-taiguëri antagaisati matsiguenga, ongabiritanëma ora tsinane Sebasato ongantocotaiguëmi: “Picantasantague-taiguë obirojegui ora te onganinate cara ipocasitaiguëmi Ira Agabisaicoontatsiri, carari te pinguemisantaigabaqueri. Inguisasantaiguëmi Tosorintsi”. ³²Aisati ingabiritaiguëma Nínebesati ingantocotaiguëmi: “Naquemisantaigabaqueri Jonás, nacantaigaa yacaqueroca nojocaigairo ora nacantaguetaguë te onganinate, carari picantasantaguetaguë obirojegui ora te onganinate, te pinguemisantaigabaqueri Agabisaicoontatsiri Ira obaqueri Jonás. Inguisasantaiguëmi Tosorintsi”.

Ira quemisantatsiri cantaca michero.

(Mt. 5.15-16; 6.22-23; Mr. 4.21-22; Jr. 8.16)

³³Aisati icantaiguëri jorío Jesus:

—Aintaca paniro matsiguenga oboquero michero iranetsantëmaro, te iromániro, te iroguero osobiquë cantiri

paquitomosiga, carari iroquero jonoquë arota ogonijaguitetocotiri omagaro timatsi pongotsiquë. ³⁴Ira cogasantiro ingante pairoraca icocaqueri Tosorintsi, irojocajiro ora quimingari, irogótasanta-nëro ora icogui Tosorintsi, ingantasantëro. Aisati ingantimari ibega sërari cara iniasanti, te irantibatima pogonijatine-rinta omagaro. Carari ira te iranintiro ingante ora icocaqueri Tosorintsi, te irojocajiro ora icantagueti te onganinate, te inguemisante, përosati cara itimi tsitiniriquë. Aisa ingantimari ira te iranee; irantibatanëma tenta ongonijatomotiri pairoraca. ³⁵Caninataque pigónijintima piquemisanquerica Tosorintsi. ³⁶Aroca piquemisantasantëri, aro pigótasanta-nëri, quero pitsoinguëmati, pintimaque catagüiteriquë. Pinganquimaro michero cara pogani jonoquë pogonijaguitetocotiri antagaisati matsiguenga inatsi pongotsiquë.

Jesos iguisaneintaiguëri bariseo aisati ira ogameantiro Sanguenari.

(Mt. 23.1-36; Mr. 12.38-40; Jr. 20.45-47)

³⁷Cara inibatasegui Jesus, icanqueri bariseo:

—Intsome ajáte nobangoquë nopaauguëmini.

Aro yoguiatëri, yapaaguëri. ³⁸Te inguibocotima Jesus; iroro iquenganeintaguëca bariseo. ³⁹Aro icanqueri Atingomi:

—Aisonori obirojegui bariseo pametaiga piquibopiantiro pitasane otisitaquë aisati poberatote, carari te pinguibiro quimíngaro cara otequë. Ongantaiguëmi pibega obirojegui: piquibococa pobacoquë, carari tsoماغüi përosati pamatobitaiguëri matsiguenga, picositaiguëri, picantagueti tojai quimíngaro. ⁴⁰¡Te pigóigue obirojegui! Pigóiguë Tosorintsi yobetsiquëmiro

pobaco; ¿Teco pigóigue aisati yobetsiquémíro pisère ora piquengasère-tanta? ⁴¹Pametaíga popasitabitacari ira coguitiachari. Obitsita pobetsiquima pisèrequè, aique pingantaneintasantègo-taigueri coguitiachari, pomasitasanti-mari, aro pingábintsasantiri. Aisati iraniacananataiguèmi Tosorintsi. ⁴²¡Obirojegui bariseo, iratsipiriacagai-guèmi Tosorintsi! Aisonori popagarantiri arosata pasiatí. Aroca páguè quirequi 10, aro pomagaranqueri paníro irasi Tosorintsi. Aroca páguè 10 osi pobanguirepague, aro pomagaranqueri patiro irasi Tosorintsi. Ocapague caninataque, carari te pinguengaiguero ora icocagasantaigabi-tèmi Tosorintsi: icogabeca pintimeme caninasati, icogabeca pinguemisanti-rime Tosorintsi aisati pintinerime. ⁴³¡Obirojegui bariseo, iratsipiriacagai-guèmi Tosorintsi! Picogasantai-guè imai-guèmi sobicomentotsi caninaro cara yapatotaíga jorí. Aisati picogasantai-guè irobetsataiguèmi matsiguenga cara opimantagani pairoraca, irobetsatai-guèmi: “Ogometinari”. ⁴⁴¡Iratsipiriaca-gai-guèmi Tosorintsi! Obirojegui aisa picantaro ora yogantari camatsirini, te ine pairoraca ora irogóontèmaro matsiguenga. Yanèitaiganaque matsiguenga jonoica, yoguimingatai-gaca.

⁴⁵Aintasati paníro ogomeantiro isanguenare Moisés, icanqueri:

—Ogomeantatsiri, cara pinibatègotèri bariseo negata, picantocotaguetasitai-guèna aisati naroe-guèmi ogomeantiro isanguenare Moisés.

⁴⁶Yotabitanèri Jesus:

—Aisati Tosorinti iratsipiriacagai-guèmi obirojegui ogomeantiro isanguenare Moisés. Pobomirintsitai-guèri matsiguenga cara pogometaguetiri tojai, carari te pomitocotèmatiri tenta

pinguemisantaiguero pasi pogomeantane. ⁴⁷Iratsipiriacagai-guèmi Tosorintsi pobetsicaiguirotinta pongotsipague pinguengantimari comantantatsiri ira yogamagaiguè pomatsiguenga jirai. ⁴⁸Obirojegui ógaiguèri. Arome pintimaigueme jirai pigamagaiguèrime obiro. Pitsipiriasitai-gaca yamai cara pobetsicaiguèro pongotsi pinguengantèmarí tenta pinguemisantaiguero. ⁴⁹Iroro ígótocotai-guèmi Tosorintsi icanque: “Nagáguemiri comantantatsiri aisati nagátane. Nígóque pógarantaigabaqueri aisati basini pinguisaiguèri catsimari. ⁵⁰Aiti picantaguèti picogaiguèna pigamagaiguèri omagaro comantanta-tsiri: pasi poguero póganti, obiro aisati pomatsiguenga jirai. Naguibitacai-guè miri cara pógai-guèri antagaisati comantantatsiripague cara iroraini nobetsiquè quibatsi irooti yamai; pógai-guèri obirojegui aisati pomatsiguenga jiranisati. Pintimaigueme jirai, pógai-guèrime aisati. ⁵¹Naguibitacai-guèmiri obirojegui cara pógai-guèri Abel aisati basini tojai. Aisati pogamaguèri Sacarías ira pógai-guè nobangoquè aronisati itagantariquè”. ⁵²Aisonori iratsipiriaca-gai-guèmi Tosorintsi, obirojegui ogomeantaiguèro isanguenare Moisés. Pigótaigabitario Irinibare Tosorintsi. Iroro pogometaguètaigabitacari pomatsiguenga, pamatobitai-guèri. Te pingogaigue obirojegui pigótiri Tosorintsi, teatisati pinintacagaiguèri irogóiguèri Iriro pomatsiguenga ira cogasantabitacari iragabisaicotai-guèri Tosorintsi. Poticaiguèri.

⁵³⁻⁵⁴Aro itsonquero Jesus inibataiguèri. Cara isotocaiganaque antagaisati, iguisaneintaigacari Ira Jesus bariseoegui aisati ira ogomeantiro Sanguenari. Yosamitaigabitacari

pairoraca; icogabeca irinibatacaquerime Ira Jesus te ongomeite. Icantobaca:

—¿Pairoraca anganqueri Ira Jesus aniantëmari? Aroca anibataqueri ora te onganinate, aro anguisasantëri agamaguëri.

Icanqueri irogomere Jesus: “Quero picantaigari bariseo”.

(Mt. 10.26-33; 12.32; 10.19-20)

12¹Aro yapatobiritaigacari Jesus arosonori matsiguenga, yagaticobacaigaca. Iparintaca Jesus icantaiguëri irogomere:

—Quero picantaigari bariseoegui, pigamaiguemari iromatobitaiguëmi. Inibati caninasati carari icanquero basiniati, yamatobianti, yoguimingataiganaqueri matsiguenga ira quemisanqueri, icantacaqueri ora te onganinate aisa ocanta ora piponganta pan potsatianquero omagaro pan.

²Pairoraca ománocotaga yamai, ongonijaque aiquenta. Ora te ogótingani jirai, ogótanëngani aiquenta irogóiguë antagaisati matsiguenga cara yamatobianti bariseo. Quero paio mánëmatacha. ³Aisati obirojegui, pairoraca pinibatë yamai pimánabecaro, aiquenta inguemaiguëro matsiguenga. Pairoraca pinibatëri pomatsiguenga casiriconiati tsomagui pobango, aiquenta ongonijatsatae cara yapatotaiga matsiguenga. ⁴Yamai nongomantaiguëmi, nomatsiguenga, quero pitsorogui ira cogatsi iróguimi. Aroca iróquemi, iroonti pobatsa iróoque; tiguëti ingantimi pisërequë.

⁵Nangantaiguëmi, pominguiri Tosorintsi, pomingatsatiri. Ingoqueca, iróquemi; carari aisati ingoqueca, iragáquemi Sharincabeniquë. Jee, aisonori pintsorogui Iriro. ⁶¿Teco pigóiguë ipimantagani tsimiri iraaguëri matsiguenga, te iripënatasantima?

Carari igóiguëri Tosorintsi, te iromaguisantiri tsimiri. ⁷Aisa ocanta igótasantëmi: igóti atiraca ocaratí piguisi. Aroca yomisantaiguëri tsimiripague Tosorintsi, iromisantasantiguëmi obirojegui. Quero pitsorogui. Pinganinabentiri Tosorintsi.

⁸Nangantaiguëmi: pairiraca inganqueri imatsiguenga: “Ira Jesoquisito Natingomi”, aique cara Jonogaguitequë inguemaiguëna ironomire Tosorintsi cara nanganqueri Pabati:

“Itingominquena iriro, nomatsiguengatacari Naro”, Naanti paniacha Jonogaguitequë nomatsiguengatapë cara niboguë yaca quibatsica. ⁹Carari inganquerica matsiguenga: “Cagari Jesus Natingomi”, aisati nanganqueri Pabati: “Tenta intingomintina iriro, iroro te nogótaguëtiri iriro Naro; cagari nasi”. Inguemaiguëna irisaanganetsite Tosorintsi. ¹⁰Nopaniaca Naro Jonogaguitequë, nomatsiguengatapë. Carari pairiraca cantëgotaguetasiquinane, aroca inganquima yacaqueroca, iragabiaqueri Tosorintsi ingábintsëri, irojocajineri iromaguisaintairi ora icantagueti te onganinate. Carari quero icábintsiri ira cantëgotaguetasitarone Isëre Caninaro, quero yomaguisantineri, quero ijocajineri përosati queronta oquemisantacagajiri Isëre aroquenta imaintëro. ¹¹Cara irágaiganaquemica cara yapatotaiga jorío, aisati iráganëmi catinasatiquë joes aisati itingomi, quero pitsorogaiguë, quero pogasëretaiga cara potabanëri ¹²ogomequeminta Isëre Tosorintsi ora pinibataiguë. Onibataquemi Caninaro Isëre.

“Pigamema, quero picogui pasintagueta”.

¹³Cara yapatotaiga matsiguenga, ainta paniro sërari icanqueri Ira Jesus:

—Ogomeantatsiri, atsi pingantiri igue imagarantinaro ora ijocaiganaquena apati cara icamaque. Imeiténaro nasi igue.

¹⁴Yotabitanëri Jesus:

—Quero nacantiri cagarinanta joes, ira cantërine caninasati imagaranquemiro.

¹⁵Aique icantaiguëri antagaisati Jesus:

—Pigamema, quero picogaigui pasintagueta. Quero pinebetaro ora yasinta basini. Quero ocaninataguimi cara pasintaguequima.

¹⁶Aique yosiacagantëneri quingabaguientsi:

—Ainta sërari casintaguetachari. Cara iritoganequë ipanguitëro tirigo, otojaigasantanë. Yobiguitëro tojai tirigoguitso. ¹⁷Aro iparintaca iquianca: “Teni cotonguiboro nobango asi tirigoguitso jagasantaca. Aiti tojaiquerai. ¿Pairoroco nanganque yamai? ¿Negaraca noguëro nomisantëro? ¹⁸Ajaa, naquianca. Nogomeriguetëro obangopague tirigo, nobetsiquëro irorapague oquibeguinte, aro noguëro antagaisati natirigote aisati omagaro nasintagueta. ¹⁹Nanganque: ‘Inomoquina tojai, quero nitsonguiro tojai osarini. Yamaica nomagoreaque, nopasantë, nasinguitapininquimaro’”.

²⁰Carari icanqueri Tosorintsi: “Te pineicotima obiro oshoincoquiminta. Yamaica tsitiniri pingamaque. Aique, ¿Pairi casintaguetajimarone antagaisati ocapague inomoquimi ora picaninabentabeca?” ²¹Aisati icanta antagaisati matsiguenga cogatsi irasintasantëma tojai, carari te iraninte ingábintseri Tosorintsi. Caninataque pobetsiquima pintiomoqueri Tosorintsi Jonogaguitequë.

Tosorintsi yomisantëri ira quemisanqueri; ipëri pairoraca ora icoguitia.

(Mt. 6.25-34, 19-21)

²²Aique icantaiguëri irogomere Jesus:

—Nangantaiguëmi: quero pogasëreto-cotaro poperi, piguitsagare, atraca

páguëro. ²³Itimacaquimi Tosorintsi; ¿Queroco ipaiguimi poperi, piguitsagare aisati? ²⁴Pinetsaiguëri ira tsimiripague. Teni imanguite, teatisati iráguëro ibanguire iroquero pongotsiquë cara irágopiantaiguëro aiuenta irapapiantëro. Carari ipagueiguëri Tosorintsi iraperi antagaisati cataguiteri. Aroca iromisantaiguëri tsimiripague, aisati obirojegui iromisantasantaiguëmi pabisaguërinta tsimiripague. ²⁵Aroca pigasëretima, ¿Aroco pomitojaiguëro posarinite? Quero. Pitsipiriasita cara pogasëreta.

²⁶Tiguetinta pingantima arosata, ¿Pairo pogasëretocobiritaro basinipague oquibe? ²⁷Pinetsaiguëro otegapague tobari atraca oquibianë. Te onguengue. Te onguirique, teatisati ontëmate, carari iroro caninarosonor. Jirai itimi Saromón itingomi joríojegui. Iquitsagata caninasati yoganinata carari te aisati ingantimaro pibega orapague otega. Pabisanaqueri. ²⁸Tosorintsi yoganinatëro otegapague tobari ora quero ocosamaniti aronta omanapague osiguiricanë, iritaguëro matsiguenga. Cara yoganinatëro otegapague Tosorintsi, ¿Teco iromisantaiguëmi obiro aisati; inguitsagatacagaiguëmi? ¿Pairo pitsoingobitaiguëri? ²⁹Iroco quero piquengasëretaguëta, quero posamita: “¿Pairo nopë? ¿Pairo nóguëma?” ³⁰Aisati icogaiguëro ocapague ira te inguemisante. Quero posigari irirojegui, aroquenta igóquero Pabati Tosorintsi cara Jonogaguitequë ora picoguitiaiga obiro. Iromisanquëmi. ³¹Iroco pingogasantaguëque intingomibintaiguëmi, aro imaguëmi omagaro ora coguitioquimine. ³²Quero pitsorogaigui. Obirojegui picantaigari noishate, Naronta omisantantatsiri. Te pintojaigue, carari inintaiguëmi Pabati Tosorintsi,

icaninabentaiguëmi, icogasanti pintingomintaiguemari. ³³Pomimantiro ora pasintagueta, pomaguetiri coguitiaguetchari omagaro opënataga; aique imëmi Tosorintsi ora caninaro cara Jonogaguitequë cara quero yapiro caji, quero piraaga, querootisati icositimiro, quero pitsonga. ³⁴Aitica ora pasintagueta yaca quibatsica, pinguengasëretapinintiro ora inatsi yaca quibatsica; carari aitica pasi Jonogaguitequënta, pinguengasëretapinintiro Tosorintsi.

Pobetsiquima tenta pigôte atraca ongantima iripigaima Atingomi.
(Mt. 24.45-51; 25.1-13; Mr. 13.33-35)

³⁵Aisati icantaiguëri irogomere Jesus: —Pigamaiguemari Pitingomi, pobetsicasantaiguema. ³⁶Obirojegui, nogomere, aisati picantaigari iromeraro casintaro pongotsi. Iáque casintaro iraniaqueri imatsiguenga cara iráquero iina. Ainta iromeraro yomisantëneri casintaro pongotsi, yobotaiguëro micheropague, icaguitaiguë. Yoguiaiguëri irooti cara irarepëma, aito cara irasirëgotapairi. ³⁷Aro inganinatasantaiguë iromeraro igaguitaga cara irarepëma casintari. Nangantaiguëmi: iriati agasobicaigapëri iromeraro, irapajagaigapëri. ³⁸Aroca iribocapae aganguite, queroca coniamaniquë, jemita: iromeraro igaguitaga inganinabentasantaigabaqueri. ³⁹Aiti basini nongomantëmi: ainta basiniati casintaro pongotsi: aroca irogóque atraca ongantima iribocapë cosirinti, ingaguitë, iromisantasantëro ibango, quero inintacaguirosi icositiri pairoraca. Cara te irogóte atraca ongantima iriboque cosirinti. ⁴⁰Aisati nacantabecari cosirinti, te nongomante atraca ongantima cara nopocaje. Jirai nopaniaca Jonogaguitequë, nomatsiguë-

ngatapë yaca quibatsica. Pënibaque najáque. Aiquenta nopigaima. Aro pinguengaiguena, pobetsiquima, pigamaiguena arota quero nomabocapëmi.

⁴¹Aro icanqueri Peroro:

—Natingomi, ¿Pari picantaiguë oca? ¿Paniroco naroequi, picoguico irogótaiguero omagaro matsiguenga?

⁴²Yotabitanëri Atingomi:

—Aisati picantari ibega iromeraro caninari, igótasanti, iquemisantasantëri ibatorote, icanquineri ora icocaqueri. Ira ibatorote icanqueri imaguetaiguëri basini iromeraropague iraperi. Aique iáque ibatorote. ⁴³⁻⁴⁴Aroca iraniopëri iromeraro antatsi caninasati ora icanëri, ingampëri ibatorote: “Caninasati picantaguequero ora nococaquemi. Yamai nocogui pomisantasantinaro omagaro ora nasinta, nigótinta yamai quero pamatobianti”. Aro inganinasëretë iromeraro. ⁴⁵Irari, aroca irajitabetima iromeraro te ongomeite: “Querojengari ipigaa nobatorote irooti cosamani”, inguisaiguërica itsipa basini iromeraro iripasataiguëri sërari aisati tsinane, iromeratëmari, irapasantë iriro irisinguitopiantëma, ⁴⁶iripigapëma ibatorote iromabocapëmari tenta iragueiri. Aro irócagantapëri iratsipiriaca-gopëri, irojocaigapëri cara intsibataiguë mari tsoengatsiri tenta inguemisante. ⁴⁷Ira iromeraro igótabecaro ora icocaqueri ibatorote, carari te ingantiro, te irobetsiquima, iripasatagantasantapëri. ⁴⁸Carari ira te irogótasante ora icocaqueri ibatorote, quero tojai ipasatiri. Quero icocaguri tojai ira te irogóte. Irari ogótasantatsi, ingocagasantëri tojai.

Quero antagaisati iniacaninatiri Quirisito.
(Mt. 10.34-36)

⁴⁹Aisati icanque Jesus:

—Nipocasique yaca quibatsica arota inguisaiguena matsiguenga iribëquëgo-

taiguena corosiquë. Ainta inguemisantaiguëna, ainta basini quero iquemisantaiguina iratsipiriacaiguëri ira caninabentaiguënanë. Inguisabacagobitaiguëna. Nocogabeca abisënguitsineme omanapague. ⁵⁰Nigóque inguisaiguëna matsiguenga, irógaiguëna. Nigótironta, nogasëretasantaca yamai. Nocogui nangantiro omanapague. ⁵¹Quero pijitasita nipocasica irágacaninatobagaiguëma omagaro matsiguenga. Quero yágacaninatobaga. Nipocasique nanganqueri inguisabacagaiguema. ⁵²Aintaca pabocorooti timaigatsi pongotsiquë inguisabacaguima, quero iquengabiritina. Ingaraque maba, inguisasëretaiqueri pite ira quemisanquinane. Pite inguisasëretaiqueri maba. ⁵³Nipocasique iroonti inguisasëretiri itomi iriri, aisati inguisasëretiri iriri itomi; onguisasëretobaguima osinto oniro; aisati onguisasëretobaguima eba aguïro.

**Caninataque pinguengero ora
ogomequimi ora piniagabitaca.**
(Mt. 16.1-4; 5.25-26; Mr. 8.10-13)

⁵⁴Aisati Jesus icantaiguëri ira botoibiritaigari:

—Cara piniagabaquero oquibe mingori oconijapë aiquero cara icanaque paba, picantaiguë: “Coraguetaque angani”. Aro omariaque. Pigóiguë omariaque cara pitimaigui. ⁵⁵Aisati cara onguëtaguetanaeca, picanque: “Quero oparigui”. Aro osariganaque, ongatsiringaguetanë. ⁵⁶Te pinganinate obirojegui; pinibatë patiro carari picanque basiniati. Pigóiguëca omariaque angani, aisati aroca ongatsiringaguetë, ¿Pairoroco te pigóbirite piniantimaro ora piniaguë icanque Joan baotisantantsiri, aisati nacanque Naro aisati ora

nogometaiaguëmi? ⁵⁷Aisati ¿Pairo te pingogobite pigóiguero ora aisonori, ora caninari? ⁵⁸Aroca inguisabiriquimiri pomatsiguenga quirequi ira pirebetëri, iráganëmica cara joesiquë, piniantasantima pinguenguema cara abatsiquë queroquerai pareta. Pinguenguema atiraca ongantima popënantajiri ira pirebeti. Aroca iráganëmi cara poesitoquë, ira joes iragáqueri soraro: “Páganëri ica, pomingueri”. Aro iromianquemi cara iromingamentoquë. ⁵⁹Nangantaiguëmi: queroca pipënanttiri antagaisati ira pirebetiri, quero yomisotocajimi aisati.

**Queroca picanta yacaqueroca,
iripoguiriaiguëmi Tosorintsi.**

13 ¹Aique iátasitaiguëri Jesus matsiguengapague, icomantaigapëri:

—¿Piquemocotaiguëri Garireasati yógagantaiguëri Pirato? Iáigabitaca Jerosarënuquë ibangoquë Tosorintsi yógaiguëneri ibira. Carari iguisaigabaqueri Pirato igátaiguëri isorarote yógaiguëri. Iconoataiguëri iraraa Garireasati iraraa ibira yógaiguëneri Tosorintsi.

²Yotabitaiganaqueri Jesus:

—¿Aroquenta yogamagaiguëri pijitaiguëco ira Garireasati cantasantaqueantënguïtsi ora te onganinate, yabisaiganaqueri imatsiguenga? ³Nangantasantaiguëmi: tesonori. Carari queroca pijocajiro ora picantaguetaiguë te ongomeite, queroca picantaigaa yacaqueroca, aro pingantaiguëmari ibega Garireasati camënguïtsi, Tosorintsi iripoguiriaiguëmi obirojegui aisati. ⁴Aisati piquemocotaiguëri Jerosaresati cani cara oparigatetaiguëri mopëpongo cara Siroéquë, pitsitocaiqueri 18 matsiguenga, icamaiguë. ¿Pairo icamobitaiguë? ¿Pijitaiguëco

icantasantaguetaiguë iriro ora te onganinate, yabisaiganaqueri basini Jerosaresati, iroro inintacaguëqueri Tosorintsi pitsitocaiguëri?

⁵Nangantaiguëmi: tesonori. Irianti cantaigari omagaro matsiguenga. Aisati obirojegui, queroca pijocajiro ora te ongomeite, queroca picantaigaa yacaqueroca, iripoguiriaiguëmi obirojegui aisati.

⁶Aique icanque Jesus, yosiacagantai-guëneri:

—Ainta matsiguenga ipanguitëro iguera cara irobasitequë. Piquibiaque caninasati, inetsapiantabitaro aitica oguitso, iráquerome, carari te onguitsotëmate. ⁷Aique icanqueri ira omisantineri: “Maba osarini nocogabecaro oguitso oca igueraca; te naneiro. Pitoguiro iguera, teni ongomeite, otimabeca”. ⁸Yotabitanëri omisantiro: “Nobatorote, ineta patiro osarini basini. Nanguiaque quibatsi nongonaguëro itiga pobira; ⁹aique aroca onguitsotanë, caninataque. Carari queroca pini oguitso, aro notoquero”.

Jesus yoguibegajiro tsinane sábaroque.

¹⁰Basiniquë sábaro yogomeantë Jesus cara yapatotaiga joríojegui. ¹¹Ainta tsinane cara pongotsiquë aro inancaro camagari jirai. Aroque yoanaitëro tojai osarini ocarati 18, iroro poguitaguëca tiguëti ongantima aratingue catingasati. ¹²Cara iniaquero Jesus, icaimëro, iniaquero:

—Obiro, tsinane, nagaguibegajimiro cara poguica.

¹³Aro yotsagaquero, irooti pibeganaa, ocatiganai. Aito cara ocanque catsigue:

—Icaninatasanti Tosorintsi, yogabisaicotajina naro.

¹⁴Aique ira obatatsi cara yapatoibiritagari Tosorintsi jorío iguisaneinqueri

Jesus aroquenta yogaguibegajiro tsinane sábaroque. Icantaguëri ira matsiguenga:

—Aiti 6 cataguiteri cara atarobacaa-taiguë cara caninataque popocaigne iragaguibegajimi. Carari quero pipocasitiri sábaroque, iroonti cataguiteri comagoriantague.

¹⁵Aique yotabitanëri Atingomi:

—Tojai pamatobianti. Pinibatë patiro, picanque basiniati. Pintaguëti obirojegui sábaroque aisati. Pinetse: ¿Teco pintaicotiri pobaacate aisati pomorane cara páganëri nijaaquë iróquima nija sábaroque? ¹⁶Carari cagari pobira oca tsinaneca, iroonti imatsiguenga Abaram. Tojai osarini ocarati 18 yoanaitëro Satanás. ¿Teco onganinatasante angábintsero sábaroque?

¹⁷Cara inibatë negaca, yoguimairentaiguëri antagaisati quisaneintaiguëri, yoguipasiguitaiguëri. Carari iraugui botoibiritagari icaninabentaiganaqueri, icantaiguë:

—Ocaninatasanti ora icantaguëti Jesus.

Cara Tosorintsi itingomibintaiguëri matsiguenga quemisantatsiri, aisa ocantaro pibega oguitso mositasa, aisati ocantaro pibega ora piponganta pan.

(Mt. 13.31-34; Mr. 4.30-32)

¹⁸Aique icanque Jesus:

—¿Yamai ati ocanta cara itingomibintiri matsiguenga Tosorintsi? ¿Pairo nanganquero nosiacagantëmiro?

¹⁹Aisati ocantaro pibega oguitso mositasa ora imionguë sërari iritoganequë. Pianë, piquibianë tojai, ipocaigapë tsmiripague, yogaigapëro imagosi otsegopaguequë.

²⁰Aisati icanque Jesus:

—¿Pairo nosiacagantëmiro cara igáanti Tosorintsi? ²¹Aisati ocantaro

pipbega ora piponganta pan. Cara obetsiquero pan tsinane, águero tojai opane tirigo, ongonaguero arosata piponganta pan. Aique opongané antagaisati.

Icanque Jesus: “Pomomirintsibentima piretima Jonogaguitequë”.

(Mt. 7.13-14, 21-23)

²²Aro iátagueque Jesus aiqero Jerosarénquë, iquenagueque poeboropaguequë yogometaigapëri matsiguenga. ²³Yosamitobëri paniro:

—Natingomi, ¿Atiraca ingaraque ira abisaicotajatsine? ¿Aroco ingaraque arosataanti?

Icanqueri Jesus:

²⁴—Nosiacagantëmiro. Aroca pininti pingapë cara itimi Tosorintsi, pomomirintsibentima pingapë otiomijani omoro. Ainta tojai icogasantaigabita iriáiguë Jonogaguitequë, carari quero icantiro yaretaigaro tojai. ²⁵Aisa icanta casintaro pongotsi, irasitëgotanëma. Aique obirojegui terai pingaigue paratingaiguë sotoquë, pingaimë: “Natingomi, pisirenaro”. Carari irotopitanëmi tsmagui: “Teni nogóiguemi negaraca popaniaca”.

²⁶Aique pingantaigabitëmari: “Jirai pitsibataiguëna, papëcoiguëna, póigotaiguëna, aisati pogometaiguëna abatsipaguequë noboeborotequë”.

²⁷Inganque tsmagui: “Nagatsitaimiro teni nogóiguemi negaraca popaniaca. Pijátópitaiguena; popigaiguema tojainta picantaguëti ora te onganinate”. ²⁸Canta pijáiguë, pigasëretasantaiguëna, piragasantaiguëma, aisati pitsitsiaguite-taiguë, cara piniaiguëri jaanta ira Abaram, Isac, Jacob aisati omagaro comantantatsiri cara itingomibintaiguëri Tosorintsi, carari obirojegui pijocaga sotoquë queronta picanta piáiguë canta.

²⁹Iribocagapë arosonori quemisantatsiri

paniaigacha cara iconyeti paba aisati cara iquiro, aisati toonquë aisati comate, aisati omagaro quibatsipaguequë, irisobicaigapë mesaquë iragáanta-nequë Tosorintsi, inganinabentaigapëri. ³⁰Quero yareta canta tojai itingomipague yaca quibatsica, ira piniacaninataiguë, carari iraretaiguëma tojai ira pomaintaiguë yamai inguemisantaguëna.

Eroris te iromitsoroguiiri Ira Jesus.

³¹Irooti cataguiteri ipocaguë arosata bariseopague. Icantaigapëri Ira Jesus: —Pijáte basiniquë quibatsi. Icoquini Eroris irócagantimi.

³²Icantaigabaqueri Jesus:

—Pijáigue, pingantaiguëri ira matobiantatsiri: “Icanque Jesus: ‘Quero nisiga. Nojoquineri matsiguengapague igamagarite, aisati nogaguibegajiri janaitatsiripague; nanganquero negaca yamai, naramani; aisati arosata cataguiteri notsonguëro natarobacaare ora nipocasi que yaca’”. ³³Aro nanguenagueque yamai, naramani, aisati basini cataguiteri. Caninataque nangame Jerosarénquë aisa nangantaiguëmari ibegaiga comantanta-tsiripague jirai cara icamaiguë canta.

Jesus yogasëretocoigacari Jerosaresati.

(Mt. 23.37-39)

³⁴Aisati icanque Jesus:

—iJerosaresati, Jerosaresati, pógapinintaiguëri comantantatsiri, pibasiaqueri mopëquë ira igáquemi Tosorintsi! Aisa ocanta tiapa omisantaiguëri ojaniquite, ocábintsai-guëri, tojai nocogabeca nopatotaiguë-mime obirojegui, nanguemisantacagai-guemime, carari te pinintaigue pinguemisantina. ³⁵Pijitasitaiga Jerosarén caninaro, carari nojocanëmi Naro, aisati ijocanëmi Pabati Tosorintsi

quero inomotajimi. Yamai nangantaiguëmi quero piniaigaina aisati irooti cara piniaigabaquina nopocaje aisati, nantingomibintaigapëmi, pingantocotaigabaquena: “Coraque Ira igáque Atingomi. Icaninatasanti Iriro”.

Jesos yoguibegajiri paniriabaguitachari sábaroquë.

14 ¹Basiniquë sábaro íaque Jesos irapë ibangoquë itingomi bariseo. Inetsaigaseguiri. ²Ainta cara paniri janaitatsiri, paniriabaguitachari yapaniriagueca omagaro. ³Aro Jesos yosamitëri bariseoegui aisati ira ogameantiro isanguenare Moisés, icantaiguëri:

—¿Caninataqueco agaguibegajiri janaitatsiri sábaroquë? ¿Queroco?

⁴Imairetasantaiguë irirojegui. Aro yotsagaqueri paniriachari Jesos yogaguibegajiri, igáqueri iriátae.

⁵Icantaiguëri bariseo Jesos:

—Aroca sábaroquë imariaque omoroquë pitomi, ¿Queroco págairi omanapague? Imariaqueca pobaacate omoroquë, ¿Queroco págairi irooti sábaroquë? Quero poguei oquëtaguetanaita.

⁶Imairetaiguë tiguëntinta ingantima irotopitiri.

Icanque Jesos: “Quero poguibata”.

⁷Aro iniaiguëri Jesos ira igaimanejegui cara yoguibataigaca. Ico Gabeca irisobicaiguëme inganquima itingomi arota iraniacani-nataiguëri matsiguenga. Aro icantaiguëri Jesos, yosiacagantaiguë neri:

⁸—Cara ingaimëmica jiesitaquë cara iráquero iina sërari, quero pisobigui cara isobicaigui itingomipague tenta pigóte aroca iribocapë itingomi yabisanaquemi

obi-ro. ⁹Aique ira cajemaquemi pitirooti obi-ro inganquemi: “Pingabiritima, pomeri ica nagaimaneca irasi irisobicomento. Pisobigue obi-ro cara”. Aro popasiquitane, pijáque pisobiaque cara carantatsiriquë. ¹⁰Carari cara ingaimëmi, pirequima, pijáte, pisobique carantatsiriquë. Aique, iribocasi-tëmi ira cajemaquemi, inganquemi: “Omana, nomatsiguenga, pisobigopë yaca itingomiquë”. Iraniaiguëmi igaimanejegui cara mesaquë, irogóiguëmi obi-ro itingomi. Aro pinganinatanë. ¹¹Pairiraca quingachane caninari, irajiquima obatatsi, aro Tosorintsi iraguipasisguitëri, inganqueri carantatsiri. Aisati ira carantatsi, iraguibasantëri iriro Tosorintsi, iraniacani-tëri imatsiguenga.

Pingábintseri ira coguitiachari.

¹²Aisati icanqueri Jesos ira cajemaqueri:

—Cara pingaimaiguëri matsiguenga pobangoquë, popaagaiguëri catingaquë quero ca chopiniquë, quero picaimiri irianti pamigotepague, querootisati pirentipague, querootisati pijitanee-gui, querootisati pitimanamire casintaguetachari.

Aroca popaaguëri, aro iriro pëgatajimine, irapajagajimi obi-ro.

¹³Carari caninataque pingaimaiguëri ira te irasintaguetima pairoraca, aisati ira camabocori, aisati ira carancara, aisati ira comarajari, omagaro cantacha negaca, ¹⁴tiguëntinta ingantaiguëma iripëgatajimi irapajagajimi obi-ro. Carari ai-quenta cara Tosorintsi iraganiataigairi antagaisati quemisantatsiri, iripëgatajimi, imaimi obi-ro cara picábintsanti yamai.

Tosorintsi iritsita icábintsaignabitaca jorío.*(Mt. 22.1-14)*

¹⁵Iquemaqueri Jesos paniro igaimane, icanque:

—Inganinasëretë ira papërone pan cara igáanti Tosorintsi.

¹⁶Icanqueri Jesos quingabaguirentsi-que:

—Ainta paniro sërari. Yobetsiquëro tojai perintsi, icaimagantaiguëri imatsiguenga iribocaigapë irapaiguë.

¹⁷Aroque pobetsicaca antagaisati.

Igátabecari ironomire ingomantaguetai-iguëri igaimane: “Moncaraca yamai; pobetsicaca omagaro; popogopë yamaica”. ¹⁸Carari te ingogaigue iriáigue. Icanque paniro: “Irorai namanantë naguebatsite. Najáque yamai nanetsëro, caninaguiteroca. Pingantinari pobatorote: ‘Quero ipoqui’”.

¹⁹Icanque basini: “Irirai namanantë nobaacate icarati 10. Yamai najátasiqueri naniantëmari iriroca caninari, aroca intarobacaaque caninasati. Pingantiri pobatorote: ‘Quero icanta ipoqui’”.

²⁰Icanque basini: “Irorai náguë najina; iroero quero niátaguëti”. ²¹Aro ipigapaa ironomire, icomantapëri ibatorote: “Icanquena: ‘Quero niáti, quero napi’”. Aro iguisaneinca, igáqueri ironomire:

“Omanapague pijáte, pinguenagueque poeboroquë, pomapëri yaca ira te irasintaguetima pairoraca, aisati ira camabocori, aisati carancara, aisati comarajari, omagaro cantacha nega”.

²²Aique iáque ironomire, icaimaguequeri, yamaigapëri tojai.

Icampëri ibatorote: “Casintinari, nocomantëri, ipocaigapë tojai, carari terai otsatenguima mesa; tojaiquerai basini”. ²³Aro icanqueri ironomire ibatorote: “Pijátaguete abatsipaguequë, pomaigapëneri yaca irajagopëmaro

nobango. ²⁴Carari, nanganquemi, quero yapi noperi paniro ira nacaimaigabitaca”.

Icanque Jesos: “Pomomirintsibentinario ora nococaquemi”.*(Mt. 5.13; 10.37-39; Mr. 9.50)*

²⁵Arosonoru matsiguenga yoguiataiguëri Jesos cara abatsiquë. Yapisitaanaca, icantaiguëri:

²⁶—Nigóti pinintaiguëri piri, piniro, pijina, pitomi, pirementi, pitsiro, omagaro. Aisati pininta obiati. Caninataque, carari pingogaiguëca piguiatina, caninataque pinintasantaiguena Naro. Queroca pinintasantina, tiguëti pingantima pomeguima nogomere.

²⁷Pairiraca nintatsi iraguianatëna, imeguima nogomere, iranatanëro igorosite, quero icantanonta iriati. Queroca ipomirintsibentinario pairoraca nongocaqueri, tiguëti ingantima imeguima nogomere. ²⁸Pairiraca cogatsi irobetsiquë oquibe pongotsi, ¿Teco irotsita inguengue ora opënatëma, irogócoitiri iguirequite aroca cotonguiboro iritsonguëro pongotsi? ²⁹Aroca imarintëmaro, carari quero cotonguiboro quirequi, quero itsonguero, iraguëti netsërone pongotsi irisëronquimari casintaro.

³⁰Ingantocotaiguëri: “Iriro yobetsicabitacararo pongotsi; tiguëti ongantima iritsonguero”. ³¹Aintaca itingomi aisati isorarote icarati 10,000, igótocotobëri basini itingomi ipoque iriro aisati 20,000 isorarote iromanapëri, ¿Teco iritsita cajemaquerine ogótacagantatsiri, irogóontobagobëma inguengaiguëma aroca onganinatë iromanátagabaqueri, iritsongaigabaqueri? ³²Aroca inguengaiguëma quero yagobeiri, iragátaiguëri iragátane iritonguibotobë mari basini itingomi aisati isorarote icarati 20,000 irosomitobëri pairoraca

ingoque arota quero yomanátiri, iripigaigaima caninasati. ³³Aisati picantaiga obirojegui. Aroca pingoque piguiatanëna, obitsita pinguengasantima ati ocanta omagaro ora pasinta. Pigótasantiro, aro pijocaiganaquero, piguiatasantaiganaquena. Queroca papabaquëajiro, tigueti pingantima pomeguima nogomere. ³⁴Nococaqueri ira aguiatina quemisanquina inguemisantacaguri basini matsiguenga irogometiri intime caninasati. Irianti cantaca patiaru caninari. Queroca ijocanëro irasi, quero yoguiatina, quero icomeiti, quero icanti ora nococaqueri. ³⁵Irianti cantaro patiaru cara omasangatanë ora cochotacaguero, quero ocomeiti, ojoquero sotoquë ogatiquëngani. Aitica piguemitu ora piquemanta pinguemisantiro ora nocomantëmi.

Jesos icomantëgotëri ira oisha ibiaga.
(Mt. 18.10-14; Joan 10.1-18)

15 ¹Ipcasitaiguëri Jesos omagaro jorío coigotantatsiri quirequi, ipagantineri Iromasati. Aisati ipocasitaiguëri tojai cantaguetiro quimingari inguemisantaigapëri. ²Aisati ainta bariseoegui aisati iraugui ogomeantiro isanguenare Moisés iniaiguëri Jesos, icantobaca:

—Icanque Jesos ora te onganinate. Yágacaninataiguëri cantaguetatsiri, itsibataigari yapëcoiguëri.

³Aique yosiacagantëneri Jesos, icantaiguëri:

⁴—Pinguengaiguëri paniro sërari obirojeguiquë yomisantaiguëri iroishate icarati 100. Aroca imiaquima paniro iroishate, ¿Queroco ijocanëri 99 cara quesiiquë, iriatë ingooqueri ira oisha ibiaga irooti cara iraniopairi? ⁵Cara iniopairi, icaninatë, iquiopairi, ⁶ipigapaa ibangoquë, icaimaigapëri

imatsiguenga aisati itimanamitane, icampëri: “Intsome anganinasëretanë; ipiaca noishate, nágairi aisati”. ⁷Nangantaiguëmi, aisa ocanta inganinasëretasantaiguë cara Jonogaguitequë cara inganquima yacaquero ca paniro cantaguetatsiri ijocajiro ora icantagueti te onganinate. Yabisaiganaqueri cara icaninabentaiguëri tojai matsiguenga caninari te ingantiro quimingari.

Jesos iquenguitsatocoqueri quirequi ibiaga.

⁸Aisati icantaiguëri Jesos:

—Aiti basini quingabaguirentsi nosiacagantëmiro: ainta tsinane pasincari iguitso quirequi icarati 10. Aroca imiaquima paniro, ongooguetajiri. Ontsitinitanëca, oboquero michero, otarogasantëro pongotsi; ongooqueri irooti cara oniajiri, ágairi. ⁹Cara págairi, ocaimaiguëri omatsiguenga aisati otimanamitane ocantaigabaqueri: “Intsome anganinasëretanë: ipiaca naguirequite, nágairi aitosati”. ¹⁰Nangantaiguëmi, aisa ocanta inganinabentaiguëri ironomire Tosorintsi irisaanganetsite cara inganquima yacaquero ca paniro cantaguetatsiri, ijocajiro ora icantagueti te onganinate.

Jesos icomantëgotëri oboina ibiaga.

¹¹Aisati icanque Jesos:

—Ainta sërari aisati pite itomi.

¹²Icanqueri iriri itomi carantatsiri:

“Pabati, pomena yamaica omagaro ora nasintajima naru cara pingamaqueca”. Aro ipaguetaiguëri pite itomi. ¹³Cara pabisanaque arosata cataguiteri, itomi carantatsiri yapatotëro antagaisati irasi, iáque canta jaanta basiniatiquë quibatsi, yáganëro iraisati. Canta, te intimopë caninasati; icantaguetiro pairoraca

icoganonta, yaparaqueri iguireguita aisati basini yasintabeca. ¹⁴Cara itsonqueri omagaro, canta jaanta itasiataiguë matsiguenga. Aisati ira oboina sigachari itasegasantë. ¹⁵Aique iáque icooqueri matsiguenga timatsi canta, intarobacaquineri. Ainta paniro, igáqueri ichacaratequë imaugeri iraperi ichanchoneegui. ¹⁶Aisati yapëro oboina ora otaqui iraperi chancho, te inguemina; icogabecaro basini; carari te imeri iriro iraperi. ¹⁷Aique iquengasëretaca: “Ainta tojai tarobacaatineri apati. Cotonguiboro iraperi antagaisati, yapapintaiguë te iritsonguero, carari naanti yaca nangamaqueni páguënanta natasegane. ¹⁸Atsi nopiganajima apatiquë, nangampëri: ‘Pabati, nacantomotaguequeri Tosorintsi aisati obiro. ¹⁹Teni ongomeite pijitina pitomi yamai tenta nanganinate. Pingantajina pomeraro, nantarobacaatimi pichacaratequë”’. ²⁰Aito cara iparintaca iáque iririquë. Cara aintaquerai jaanta, terai iraretima, inebintobacari iriri, igótobëri, icantaneintëgotëri itomi, isigasitanacari itonguibotobacari, yabitsinacobëri. ²¹Icampëri: “Pabati, nacantaguetomoqueri Tosorintsi aisati obiro tenta nanguemisantimi. Teni ongomeite pijitina pitomi yamai tenta nanganinate...” ²²Carari iriri igáqueri ironomire: “Omanapague, pomapëneri quitsagarintsi caninarisonori, pinguitsagatiri, poguineri aniyo ibatsapacoquë aisati sapato iguitiquë; ²³aisati pomapëri itiomijani baaca aneri, póguineri. Intsome opaigue aisati intsome anganinasërebentiri notomi ²⁴aroquenta ipigapaa. Najitabeca icamaqueni carari cantaca icaniatanaini. Ipiaca carari yamai naniajiri”. Iparintaigaca icaninasëretaiiguë, yapaiguë.

Përosati icanque Jesus:

²⁵—Carari ainta itomi obatatsi cara ichacaratequë. Cara yaresërepa iquemaigapëri cara icántataiguë aisati icaninataiguë. ²⁶Icaimëri paniro ibimantaga, yosamitëri: “¿Pairo icaninabiritaiguë cara pongotsiquë?” ²⁷Yotabitanëri: “Ipigapaa pirenti. Yógagantëneri itiomijani baaca aneri yapaiguë. Icaninatasantë piri aroquenta iniobairi itomi caninasati yaretaja”. ²⁸Iguisanaca irenti obatatsi, te iraninte ingue pongotsiquë. Carari iquemocoqueri iriri, isotocanë icanqueri: “Omana, notomi, pingapë. Pinganinabentobëri pirenti”. ²⁹Carari yotabitanëri, icanqueri: “Tojai osarini nacanquemiro pairoraca picocaquena, te nopëgatsatëmatimi. Carari te pomena naro paniro chibo nopaagaiguëri namigoteegui, nanganinatagaiguëri. ³⁰Carari yamai ipocaji pitomi, yaparatasicari piguireguita itsoncaquero tsinanepague antagueantatsiri, págacaninatobëri póguëneri aneri baaca”. ³¹Icanqueri iriri: “Notomi, përosati pinomoquina. Omagaro nasintagueta iroonti pasi aisati. ³²Carari caninataque anganinabentiri pirenti. Aisa ocantabeca icamaque, najitabeca quero naniajiri aisati. Carari aisa ocanta icaniatanai, naniajiri. Ipegabeca, yamai naniajiri aisati. Intsome anganinasërebentiri”.

**Jesus icomantëgotëri
matobitiriri ibatorote.**

(Mt. 6.24)

16 ¹Aisati icantaiguëri irogomere
Jesus:

—Ainta sërari yasintaguetaro tojai. Aintasati iromeraro yomisantineri omagaro irasi ibatorote. Ipoque basini, icomantëgotëri iromeraro cara icositagarantëri casintari. ²Icaimëri, yosamitëri: “¿Pairo ojita oca

naquemocoquemi? ¿Aisonorico picositarantëna? Yamai pobetsiquinaro pisanguenare, pomapënaró. Naninti naneiro ora picanque. Quero nanintacaguimi pintainaro pairoraca basini”. ³Aique iquianca iriro: “Irojoquena nobatorote; quero inintacaguina nantaineri aisati. ¿Pairo nanganque yamai? Te nasintsite nasiabaguite. Aisati nopasiquique cara nomanopiantëri imasitëna quirequi. ⁴Ajaa, nigóque ora nanganque. Aique cara irojoquena nobatorote, irágobëna basini ibangopaguequë”. ⁵Aro icaimaiguëri paniropague ira irebetiri ibatorote. Icanqueri paniro: “¿Ati icarati pirebetiri nobatorote”? ⁶Yotabitanëri: “Narebetëri tojai ogei aseitona, 100 irata”. Icanqueri: “Jeroca pisanguenare jirai. Yamaica pisanguenate cara pirebetiri 50 irata”. ⁷Aique icanqueri basini: “Obiro, ¿Ati icarati pirebetiri nobatorote”? Yotabitanëri: “Narebetëri tojai tirigo 100 cantiri”. Icanqueri: “Jeroca pisanguenare jirai. Yamaica pisanguenate cara pirebetiri tirigo 80 cantiri”. ⁸Aiqueta cara igóquero ibatorote ati ocanta iromeraro yamatobiqueri, icanque: “Te ongomeite cara yamatobiquina, carari igóti iráquero ora coguitemotari”. Iraegui tsoengatsiri te inguemisantiri Tosorintsi, igótasantaiguë ati ongantima ingantacaqueri imatsiguenga ora icogui iriro. Yabisaiganaqueri quemisantatsiri tenta irogótasante; te inguengasëretima irobatiri basini. ⁹Yamai nangantaiguëmi obirojegui: aintaca piguireguite, pingábintsaiguëri ira coguitiacha, pomitocotiri pomeri ora coguitemotari. Iramigotenquimi, quero yomaguissantiro ora picanqueri. Aique cara pingamaqueca, pijocanëri piguireguite carari irágacaninatobëmi Tosorintsi cara Jonogaguitequë, pintiomotaiguëri

caninasati ira picábintsaiguë cara pongotsiquë quero pitsonga. ¹⁰Ira cantatsi caninasati cara Tosorintsi ipëri arosata, aisati irantë caninasati cara imëri tojai. Carari ira matobiantatsi cara ipëri arosata, aisati iromatobiantanë cara imëri tojai. ¹¹Carari aroca pingositaquetaiguëro ora yasinta basini yaca quibatsica, aisati pabentaigaro ora pasinta obiro, ¿Pairoco pëmiro ora caninaro quero pitsonga? Quero pairi. ¹²Aroca picositaiguëri iguireguite basini, ¿Pairo imabiritimi Tosorintsi pairoraca caninari, pasiasi? ¹³Aintaca ironomitaqa, quero icanta iquemisantiri pite ibatorote. Iromaintëri paniro, iraninqueri basini. Aisa ocanta, aroca pingantineri Tosorintsi omagaro ora icocaquemi quero picantanonta obiati. Aroca pingoque pingantanontima obiati, quero pintineri Tosorintsi. Quero picantiro pite. Aroca pinintasantëri Tosorintsi, quero picogui popobotiri piguireguite. Aisati pinintirica piguireguite, quero piquemisantiri Tosorintsi.

Jesos inibataiguëri bariseoegui.

(Mt. 19.1-12; 11.12-13; 5.31-32; Mr. 10.1-12)

¹⁴Aro iquemaguëri bariseo ora icanque Jesos. Isërontaigacari icogasantinta quirequi bariseoegui.

¹⁵Icantaiguëri Jesos:

—Pijitasaitaiga caninari obiatiegui, aisati picogaiguë iraniacandinataiguëmi matsiguenga, carari igóquemi Tosorintsi ora piquianca. Te inguengema Tosorintsi aisa icanta iquengaiga matsiguenga. Ora icaninabentaiguë matsiguenga iniacaninatëro, iniaquero Tosorintsi te onganinatëmate. ¹⁶Jirai ocaninatë inguemisantiro matsiguenga ora isanguenatacaqueri Moisés Tosorintsi, aisati ora iquenguitsatacaqueri comantantsiri jirai, carari yareca

yamaica Joan baotisantantsiri. Yamai Tosorinti icocaqueri basiniati. Onganinatasantë yamai inguemisantai-gueri Joan matsiguenga intingomintasantëmari Tosorinti. Yamai icogasantaigni tojai matsiguenga cara iragabaisicotajiri Tosorinti, inganaque iragáantanequë, intingomintaignëmari.¹⁷ Aiquenta omeganëma quibatsi aisati Jonogaguite carari quero opeguëmata isanguenare Moisés. Icoqui Tosorinti përosati ongantima arota pigóontimaro ati ongantima pintimaigue caninasati.¹⁸ Aintaca sërari irojoquero iina, iráque basini iina, yaguimintacaro iinasonori ora ijoque jirai. Aisati pairiraca ágairone ora ijoque ojime, yaguimintacari ojime cara icantagueti ora te ongameite.

Jesos icomantëgotëri ira casintaguetachari aisati Irásaro.

¹⁹Përosati icanque Jesos:

—Ainta paniro sërari casintaguetachari, icanaque iguitsagare caninari, catamagorisonori aisati quiraaquisaamagori. Antagaisati cataguiteri icaimaguëri imatsiguenga icantaigui jiesita yapasantaiguë; te ongoguitiomotimari pairoraca.²⁰ Carari ainta basini sërari jitacha Irásaro, irojocaga cara omoroquë casintaguetachari. Iribatsasebaguitaga omagaro.²¹ Icogabeca irapërome ora ongarataga yobariaque casintaguetachari. Te inguemima. Te iromitocotiri pairiraca; carari ipocasitaignëri otsitipague itsotaguepëro iribatsagoro.²² Aique icamaque Irásaro, yáganëri ironomire Tosorinti cara ini Abaram caninaguiteroquë. Aisati icamaque casintaguetachari, itica igamaga.²³ Cara osobiquë itsipiriasantë isërequë, tojai iniacatsigatacaro. Aisati inetsë canta jaanta, iniaiguëri Abaram aisati Irásaro.²⁴ Icaimë, icanqueri: “Apa, Abaram, pingantaneintëgotina yaca;

pigátiri Irásaro iragaapagotima ibatsapacoquë nijaquë iribocapëta yaca arota iragatsingatinaro nanine aroquenta natsipiriasantë yaca tsitsica”.²⁵ Carari yotabitanëri Abaram: “Notomi, pinguengero ati ocanta jirai cara pitimabeca quibatsiquë. Pitimi caninasati te pairoraca coguitiomotimine. Irari Irásaro tojai itsipiriasantë jirai. Carari yamai icaninatasanti iriro yaca; obiro pitsipiriasantë canta.

²⁶Aisati aiquero obiroquë aiti otarabi paraguitia játaque osobisonorinta arota pairiraca yaca quero yagobia iáti obiroquë. Querootisati pairiraca canta yagobia ipoqui yaca naroca”.

²⁷Icanqueri casintaguetachari: “Queroca ipoqui yaca, Apati Abaram, nomanaguemi pigátiri Irásaro cara ibangoquë apati.²⁸ Canta, ainta pabocorooti igue. Ingamanaaigapëri, inguemisantacagaiguëri igue Irásaro, imasiniatitaiguëma, arota quero ipocai-gapë yaca cara natsipiriasantasegui”.²⁹ Icanqueri Abaram: “Aiti isanguenare Moisés aisati irasi comantantatsiri. Caninataque irinibataiguerota inguemisantirota imasiniatitima”.³⁰ Yotabitanëri: “Quero, Apati Abaram; quero iquemisantiro Sanguenari, carari aroca iriátasitaiguëri camatsiri, inguemisantobëri iriro, ingantaiguëma yacaqueroa imasiniatitima”.³¹ Carari icanqueri Abaram: “Queroca iquemisantiro Sanguenari, querootisati iquemisantobëri camatsiri ira cabiritajachane”.

“Quero pintaguiri basini ora te onganinate”.

(Mt. 18.6-7; Mr. 9.42)

17 ¹Aique icantaiguëri irogomere Jesos:

—Nangantaiguëmi, përosati ini ira antaaqueri imatsiguenga ora te

onganinate; carari Tosorintsi ingasitfgatëri ira antaaquerine basini. ²Caninataqueme ingamaque queroquerai intaguiri ira quemisanquina ora te onganinate, aisa onganquima iraguëshotiaquineri oquibe mopë itsonoquë, irojoqueri angaarequë ingamaque. ³Pigamema, quero pintaguiri basini ora te ongomeite.

Pisetajineri popiguemisantane ora icantaguetimi te onganinate.

(Mt. 18.21-22)

Aisati icanqueri Jesus:

—Aintaca popiguemisantane icantaguetimi ora te onganinate, pingamanaairi. Aroca irojocajiro ora icantagueti te ongomeite, pijocajineri obiro, pomaguisantineri, quero piquengairo. ⁴Aitica patiro cataguiteri ingositëmi, inguisatsatëmi, pairoraca inganquemi, iragatsitapininqueroa tojai, aroca inganquemi: “Nacanquemi ora te ongomeite; iroro nogasëretaguëca. Nojocajiro quero nacantajimiro aisati; pijocajinaro obiro aisati”, aro pijocajineri, pingábintseri, quero piguisiri.

Aroca pinguemisantiri Tosorintsi, inganquemiro tojai.

(Mt. 21.18-22; Mr. 11.22-26)

⁵Ira iragátane Jesus icantaiguëri Ira Atingomi:

—Naquemisantabecari Tosorintsi, carari nocogaiguë pinguemisantasantacagaiguena.

⁶Icanqueri Atingomi:

—Pinguemisanqueca arosata, pomaniri Tosorintsi pingantiri irisiabonguititiro ora anchatora, iragaratianquero cara angaarequë, aro inganquemiro.

Ira quemisantatsiri aisa icantari iromeraro Tosorintsi.

⁷Aisati icantaiguëri irogomere Jesus:

—Quero piquenga obiatiegui caninari. Aintaca pomeraro isiabaguitë queroca yomisantimiri pobira, cara iripigaima pobangoquë, ¿Pairo pinganqueri? ¿Pinganquerimeco: “Pingapë omanapague, pisobigopë pope”? ⁸Quero picantiri negaca. Pinganqueri: “Pobetsiquima, pingotina noperi aisati nomire, pomapënaró. Notsonqueroa naro, aro pope obiro, póguima aisati”. ⁹Quero picarasiatiri pomeraro aroqenta icanquero ora picanqueri. ¹⁰Aisati obirojegui picantaigari ibega pomeraro. Cara pitsonguëro antagaisati ora icocagaiguëmi Tosorintsi, caninataque pingantaigue: “Patiro nacanquineri Tosorintsi ora icocaquena. Te inëmate ora nanguenguema naro caninari, naanti iromeraro”.

Jesus yogaguibegajiri 10 iribatsasetaga.

¹¹Aisati yogaganaa Jesus, iáque aikuero Jersarënuquë, iquenaque Samariaquë aisati Garireaquë. ¹²Cara yarecaro poeboro, itonguibocari sërari iribatsasetaga icarati 10. Yaratingaiguë arosata casiriconiati, te irotsititimari Jesus. ¹³Icaimaigabaqueri:

—Jesus Ogomeantatsiri, pingantanein-tëgotaiguena, pigabisaicotaiguena.

¹⁴Aro iniaiguëri Jesus, icantaiguëri:

—Pijátasitaigueri saseriroti, poniagaiguemari.

Aique iáguë. Cara abatsiquë aito ca ibegaiganaja. ¹⁵Aro ainta paniro iribatsasetabitaga, cara igóque aroque ibeganaa, ipigapaa, icaimanë catsigue, “Icaninati Tosorintsi yogaguibegajinanta”. ¹⁶Yobaticagueritotasipari iguitiquë Jesus, yaquitomoca, icarasiapëri Ira Jesus. Irianti Samariasati, ipaniaca Samariaquë jirai. ¹⁷Aique icanque Jesus:

—¿Teco ingarate 10 iribatsasetaga ira nogaguibegaji? ¿Atini ira basini 9?

¹⁸Icari ica cagari jorío, irianti basiniati matsiguenga. ¿Paniroco ica ipigapa inibacananatëgotëri Tosorintsi?

¹⁹Aique icanqueri iribatsasetabita:

—Pingabiritima, pijátaje yamai.

Aroquenta piquemisanquina, iroro nogabisaicotaguëtajimi.

**Ati icanta Tosorintsi cara
itingomibintanti.**

(Mt. 24.23-28, 36-41; Jr. 19.11-12)

²⁰Aique yosamitaiguëri Jesos bariseogui:

—¿Ati ongantima orequima iragáantane Tosorintsi?

Yotabitaiganaqueri Jesos:

—Cara intingomibintëri matsiguenga Tosorintsi, quero pineiro tenta oneingani. ²¹Quero pairi cantatsi: “Iroso oca”, querootisati, “Iroso ora”. Aisonori quero oconijati carari aiti obiroteguë. Paniro itingomibintiri Tosorintsi ira quemisanqueri.

²²Aique Jesos icantaiguëri irogomere:

—Naro paniënguicha cara

Jonogaguitequë nomatsiguengatapë. Quero natsibatimi përosati aiuenta nojocaiganaquemi. Coraque opoque cara pingogaigabitëma piniaigaina patiro cataguiteri basini, carari quero pineina. ²³Aintaca inganquemi: “Ainta Quirisito cara”, aintasati cantëmine: “Ainta yaca”, quero poguiatiri, quero pitsipiriasita piáti cagarinanta Naro. ²⁴Cara omabocapë tegotsitanatsi moretatsiri, osanguëguitetanëro omagaro jonoquë, aisati nangampaima Naro cara nopogopae quibatsica. Nomabocaigapairi matsiguenga, carari iraniaigabaquina antagaisati. ²⁵Carari queroquerai nipocaji, Natsita atsipiriaquenguitsine tojai aronta iritsoengaigabaquina icaegui matsiguengaca, inguisaigabaquina.

²⁶Aisa ocanta jirai cara itimi Noé,

itsoingauguëri Tosorintsi matsiguenga, aisa onganquima cara nopigaima Naro, iritsoengaiguëna omagaro matsiguenga.

²⁷Cara Noé icamanaiguëri, ira matsiguenga përosati icantaiga cara yametaiga: yapaiguë, yógaigaca, yágaiguëro iina, yágantacagaiguëro irisinto, përosati icantaiga irooti cara yotetanacaro pitotsi Noé. Aique opariaque oquibeguintesonori angani, ponangasantaca, ongaaretanë omagaro, pipoguiriaiguëri antagaisati tsoengatsiri.

²⁸Aisati icantaiga matsiguenga cara itimi Lot, yapaiguë, yógaigaca, yamanantaiguëro pairoraca, ipimantaiguëro, ipanguitaiguë ibanguire, yobetsicaiguëro pongotsipague, ²⁹carari cara isotocanë Lot cara Soromaquë, irooti cataguiteri Tosorintsi yobariaquineri tsitsi oconogaro asopiri paniacha jonoquë, pipoguiriaiguëri antagaisati Soromasati. ³⁰Aisa ingantaiguëma matsiguenga cara nopocaje Naro. Iritsoengaiguëna tojaisonorori, quero iquengaiguëri Tosorintsi. ³¹Aisati cara omoncaraquema cataguiteri cara nopocaje, aintaca paniro jonoica ibangoquë, quero iqui cara iráganëro ora yasinta; aintaca paniro iritoganequë, quero ipigaa ibangoquë. Irisiganëmata.

³²Pinguengaiguëro iina Lot, opeganaca patiari cara papisitaanaca. ³³Pairiraca cogabitacha ingábintsëma yaca quibatsica tenta iraninte iratsipiriero, quero iáti Jonogaguitequë, iratsipiriasantëma. Irari quemisantantëne yaca quibatsica, irooti cara ingamobiquina Naro, aiuenta intiomoquina Jonogaguitequë, intimasantapë caninasati. ³⁴Yamai nangantaiguëmi: cara nopocaje, intsibatëmari pite sërari irisomë irooti somamintotsiquë. Paniro náganë, ira basini nojocanëri. ³⁵Otonongaseguëca

tirigo pite tsinane; paniro náganë, ora basini nojocanëro. ³⁶Irisiabaguetase-gueca pite sërari cara togantsiquë. Paniro náganë, irari basini nojocanëri.

³⁷Yosamitaiguëri irogomere:

—Natingomi, ¿Nega onganquima negaca?

Ícantaiguëri Jesus:

—Atiraca ini igamaga, aito cara imarigasipëri tisoegui. Aisa ocanta, atiraca itimi tsoengatsiri, iratsipiriaca-gaiguëri Tosorintsi.

Ora ogamaimentaga paserigapininqueri joes te inganinate.

18 ¹Aisati basiniquë cataguiteri Jesus yogometaiguëri irogomere quingabaguientsiquë. Ícantaiguëri caninataque iromanopiantiri Tosorintsi, quero itsirisharo. ²Yosiacagantëneri quingabaguientsi, ícantaiguëri:

—Ainta poeboroquë ira joes ira te iminguiiri Tosorintsi, teatisati ingantaneintëgotiri matsiguenga. ³Aisati ainta irootiquë poeboro tsinane ogamaimentaga. Piátasitopiantëri joes, ocantopiantabitacari: “Pingábintsena pomitocotina; popëgabentina ira quisaneinquina”. ⁴Iritsita te iraninte ingábintsero, carari piátasitopiantëri. Aiquenta iquianca: “Aisonori te nominguiiri Tosorintsi teatisati nangábintseri matsiguenga, ⁵carari paserigapininquina oca tsinaneca. Iroro nomitocotaguëquero, nangábintsëro arota quero pipocasitopiantaina paserigaina aisati”.

⁶Icanque Atingomi:

—Pinguengeri ira joes te inganinate, ora icanque. Ipëgabenuero tsinane ogamaimentaga. ⁷Irianti Tosorintsi icaninati. Yamai përosati yamanopian-taiguëri quemisantatsiri, ¿Teco inguemaiguëri cara iripëgabintaiguëri?

⁸Nangantaiguëmi, quero ocosamaniti

cara ingábintsaguëri iripëgabintaiguëri. Carari cara nopigaima yaca quibatsica, ¿Aroco naniaigapëri quemisantaiguë nane iromanocotaiguëri Tosorintsi?

Yamanaiguí pitirooti: bariseo aisati coigotantatsiri.

⁹Aisati Jesus yosiacagantaiguëneri matsiguenga yoguibataiga, iquengaigaca iriati caninari, imaintaiguëri basini. Jesus inibataiguëri oca quingabaguientsica:

¹⁰Iáiguë pite sërari cara oquibequë ibango Tosorintsi, yamanaigapë. Paniro ini bariseo, ira basini irianti coigotantatsiri, icoicotaiguëri iguirequite imatsiguenga, ipagantiri igobeingarite Iromaquë. ¹¹Yaratingopë bariseo, yamanopë icanque negaca: “Tosorintsi, nacarasiaquemini cara te aisa nangantimari ibega basini sërari. Tojai nacaninati naro; te nangantaguete, te aisa nangantimari cosirinti, te nomatobite, te naguimintimaro najina. Teatisati nangantimari ibega ica coigotantatsirica. ¹²Nameta omagaro ironisiquë nitita, aisati joebisiquë, te nope, iroonti naquenguimi Obiro. Aisati nopagarantimiro omagaro nágaguëti. Nágueca 10, nopabaquemi patiro”. ¹³Ira coigotantatsiri yaratingopë cara omoroquë pënibaque te ingue. Te iraniacaninatima iriati; ipasiquique, te iranetse jonoquë, yoguica icanque: “Tosorintsi, pingantaneintëgotina naronta cantagueantatsiri, tenta nanganinate”. ¹⁴Yamai nangantaiguëmi, carari icantaguëti ira coigotantatsiri, carari icábintsëri Tosorintsi, yogabisaicotajiri. Cara ipiganaja ibangoquë, aroque igónijnca iriati cara iniacaninatëri Tosorintsi. Irari bariseo te iraniacaninatiri iriro Tosorintsi, te iragabisaicotiri. Pairiraca quingachane caninari, irajiquima obatsi, aro

Tosorintsi iraguipasiguitëri, inganqueri carantatsiri. Irari carantatsi, te irajitima caninari iriati, Tosorintsi iraguibatasantëri iriro.

**Icogui Jesus iribocasitaigueri
janequijegui.**

(Mt. 19.13-15; Mr. 10.13-16)

¹⁵Aique yamapëngani tsorori janequipague cara Jesusiquë, icogaiguë cara irogaguetineri ibaco Jesus iguitopaguequë janequi, iromanocotiri cara ingábintseri Tosorintsi.

Iniaigabaqueri irogomere, imetaigacari Jesus, icantaigabaqueri:

—Quero paseriguiri Atingomi.

¹⁶Carari icaimaiguëri Jesus:

—Quero picantiri. Nocoguini iribocasitaigapëna janequijegui. Igóiguë iriro itingomintina. Antagaisati icantaigari ibega ica intiomoquina cara iragáantanequë Tosorintsi. ¹⁷Aisonori nangantaiguëmi: icaegui janequica inintaiguë itingomintimari Tosorintsi; pairiraca te aisati ingantima ibega janequi, quero paretaca igáanti Tosorintsi.

**Jesus icamanaaqueri ira sërari
casintasantachari.**

(Mt. 19.16-26; Mr. 10.17-27)

¹⁸Basini cataguitëriquë iátasiqueri Jesus paniro itingomi jorío. Icampëri:

—Caninari ogomeantatsiri, pingomantina: ¿Pairo nanganque arota nantimaque përosati canta Jonogaguitequë?

¹⁹Yotabitanëri Jesus:

—¿Pairo picantobiquina Naro caninari? Paniro ini caninari, Irianti Tosorintsi. ²⁰Pigótiro ora iragáantane Tosorintsi ora ipëri Moisés: quero pintiro tsinane cagaro pijina; quero póganti; quero picosantanti; quero pitsoiguëgotaguetari ira basinipague;

pinguemisantiri aisati pinintiri piri aisati piniro quero pipëgatsatëmatari.

²¹Icanqueri sërari:

—Aroque naquemisanquero omagaro oca, nomoncaraquero cara ninë janequi irooti yamai.

²²Iquemaqueri Jesus, icanqueri:

—Panibati. Pinintica iraniacaninatimi Tosorintsi, atsi pijáte pomimantiro antagaisati ora pasinta, pomaguetiri ira coguitiaguetchari omagaro opënataga; aique imëmi Tosorintsi ora caninara cara Jonogaguitequë. Cara pomimantëroca antagaisati, aro piguiatanëna Naro.

²³Cara iquemobëro oca, yogasëretasantanaca irironta casintaguetasantacha, aique iáque tenta iraninte imimantiro.

²⁴Iniobëri Jesus, icanque:

—iOpimirintsitomocari casintaguetachari iriátë canta itingomibintanti Tosorintsi! ²⁵Nanganquemi: opimirintsitomocari cameyo ingue otiomijaniquë omoro quitsapi, carari omimirintsitomasantëmari casintachari iriátë cara igáanti Tosorintsi.

²⁶Iraegui quemauguëri yosamitëri:

—¿Aisonorico? ¿Pairo inganquima matsiguenga ora iragabisaicoontëma?

²⁷Carari yotabitaiganaqueri Jesus:

—Quero icantiro matsiguenga yogabisaicota iriati, carari Irianti Tosorintsi inganquero antagaisati. Te omimirintsitomotimari Iriro.

**Ora imauguëri Tosorintsi iraugui aguiaitëri
Jesus.**

(Mt. 19.27-30; Mr. 10.28-31)

²⁸Aique icanque Peroro:

—Ogometinari, pinguengaiguena naroequi. Nojocaiganaquero omagaro ora nasintaiga, noguiataiganaquemi.

²⁹Icanqueri Jesus:

—Aisonori nangantaiguëmi: quero pitsipiriario. Aroca pintingomintimari

Tosorintsi, pijocaiguëro pobango, pijina, pirementipague, piri, piniro, pitomipague, pisintopague, ingantocobentaiguëmi Tosorintsi. Aroca pingogasantë intingombintimi Iriro, iroro pijocaguë quero pairorapagueraca, quero pitsipiriario. ³⁰Aroca pijocanëneri arosata yamai, imaiguëmi tojai yaca quibatsica. Aisati irágaiganaquemi canta Jonogaguitequë pintiomoqueri pérosati.

Mabataque icomantaiguëri Jesus irogomere cara ingamaque.
(Mt. 20.17-19; Mr. 10.32-34)

³¹Aique icaimaiguëri irogomere casiriconiati icantaiguëri:
—Yamai ajáiguë canta Jerosarénquë. Jirai isanguenatocotaiguëna comantantatsiripague, Naro paniacha Jonogaguitequë nomatsiguengatapë. Yamai omoncaraquima omagaro isanguentocotaiguëna. ³²Ira joríojegui irácagantaiguëna ira basiniati matsiguenga cagari jorío irágobëna. Irisërontaiguëna, iratsipiriacaiguëna, irijobataiguëna. ³³Aisati iripasataiguëna, aique irógaiguëna. Carari ongaraque maba cataguiteri nanganiatanae aisati.

³⁴Te irogóigue irogomere ora icomantëri Jesus tenta inguemaiguëri; icomëtaigabacaro.

Jesus iniacagajiri comarajari Jericósati.
(Mt. 20.29-34; Mr. 10.46-52)

³⁵Cara pënibaque irarepëmaro Jericó, Jesus iniopëri comarajari onamiquë abatsi yamanopiantëri matsiguenga imaiguëri quirequi. ³⁶Iquemaigabaqueri tojai matsiguenga yabisaiganaque, aro yosamitë:

—¿Pairo bocatsi?

³⁷Icomantaiguëri:

—Coraque Jesus Nasaresati. Irabisaanaque yaca.

³⁸Aique icaibatane comarajari, icanque:

—iJesus, Obiro imatsiguenga David, pingantaneintëgotina!

³⁹Iraegui obaqueri Jesus isintsitsataiguëri icantaiguëri:

—iPomairete!

Carari aiquero iátanëtigue icaimasantanë comarajari:

—iJesus, imatsiguenga David, pingantaneintëgotina!

⁴⁰Yaratingopë Jesus, icaimagantëri; cara yarepa, icampëri:

⁴¹—¿Pairo picogui nanganquemi?

Icanqueri:

—Natingomi, nanintini piniacaçajina.

⁴²Icanëri Jesus:

—Aro piniaye yamaica. Aroquenta piquemisanquina nagobiajiro cara piniaye aisati, aro naniacaçajimi, nogabisaicotajimi.

⁴³Aito cara inianai, yoguiatëri Ira Jesus, icaninabenqueri Tosorintsi, icanque:

—Iniacagajina Tosorintsi; icaninati Iriro.

Aisati icanta omagaro matsiguenga iniaiguëri, icanque:

—Aisonori, icaninati Tosorintsi.

Iniobëri Jesus Saqueo.

19 ¹Aique yarepa Jesus Jericóquë iquenaguequero. ²Ainta ira casintaguetachari jitacha Saqueo, itingomi coigotantatsiripague, icoicotaiguëri iguirequite imatsiguenga ipagantaiguëneri igobeingarite Iromasati. ³Icogabeca Saqueo iraneiri Jesus, carari te iraneiri iriantinta catsitiini. ⁴Isiganaca ibataiguëri basini matsiguenga tojai, itanë anchatoquë ora jitacha sicómoro arota iraneiri Jesus cara inguenopë. ⁵Cara yarepa Jesus, inetsë jonoquë iniopëri Saqueo, icampëri:

—Saqueo, piguëpë omanapague.
Yamai nocogui nantioמוקמי
pobangoquë.

⁶Aro yaguëpë omanapague, icanqueri:
—Intsome nobangoquë.

Aro tojai icaninatanë Saqueo, ⁷carari
iniaiguëri imatsiguenga, yabentaiganaca
iguisaneintaiguëri icantobaganaca:

—¿Pairo iátasibiriqueri Jesus cara
ibangoquë Saqueo tenta inganinate?
Icantaguetasanti.

⁸Aique yaratianque Saqueo icanqueri
Jesus:

—Natingomi, nomagarantaguetaiguëri
coguitiachari aganguisati antagaisati ora
nasinta. Aisati aintaca matsiguenga
namatobiqueri nocositëri, naguipigai-
neri omagaro, aisati nomëri basini.
Nocositërica patiro, aro nomairi
otsibasati.

⁹Icanqueri Jesus:

—Yamaica cataguiteri Tosorintsi
yogabisaicotajimi obiro aisati iragabisai-
cotajiri pomatsiguenga yaca pongotsica.
Aisatinta picantari ibega Abaram:
piquemisanquero nanibare. ¹⁰Iro
nipocasiq, nopaniaca Jonogaguitequë
nomatsiguengatapë. Nipocasiq
nongooque nagabisaicotajiri pairiraca
quemisanquinane, ira terai irogótiri
Tosorintsi.

Ira itingomi ipaiguëri iromeraro quirequi.

(Mt. 25.14-30)

¹¹Ira matsiguenga iquemaiguëri Jesus
ora icanqueri Saqueo, yosiacagantëneri
quingabaguirentsi aroquenta yareca
aronisati Jerosarénquë aisati
yoguaiguëri matsiguenga cara
omanapague intingomibintaiguëri
Tosorintsi. ¹²Aro icantococa Jesus:

—Ainta paniro sërari caninari
imatsiguenga itingomi, iriátë cosamani
parigoti basiniquë quibatsi imeganëma
itingomi iriati, aique iripigaima

intingomibintaiguëri imatsiguenga
iboeborotequë. ¹³Teraiquerai iriátë
icaimaiguëri iromeraro icarati 10,
ipaguetaiguëri panirootipague paniro
iguibe quirequi. Icantaguëri: “Jerica
tojai naguireguitë, nomirisitatimiri.
Pomanantantimari, pomimante,
pomitojaiguenari irooti cara
nopigaima”. Aique iáque imeganëma
itingomi. ¹⁴Carari aintapague
imatsiguenga te intingomintimari,
iguisaneintaigacari, igáqueri sërari
iáque icantabepari ira cobeingari: “Teni
nanintaiguëri ira sërarira intingomibin-
taiguëna naroequi. Quero poguiri
natingomiegui”. ¹⁵Carari ijiqueri
itingomi; aique ipigapaa, icaimagantai-
guëri iromeraro ira ipaguetaiganaque
iguireguitë. Yosamitëri panirootipague:
“¿Pomitojaiguëneri naguireguitë?”
¹⁶Aro ipoque ira obaquenguitsi
icampëri: “Natingomi, nomitojaiguëmiri
piguireguitë. Popanaquina paniro.
Yamai ainta 10 basini”. ¹⁷Icanqueri
itingomi: “Caninataque. Picanque
caninasati ora nococaquemi. Cani
nopëmi arosata. Yamai nomëmi 10
poeboro pintingomibintaiguenari
matsiguenga cara”. ¹⁸Aique ipoque
basini iromeraro icanqueri: “Natingomi,
nomitojaiguëmiri piguireguitë.
Popanaquina paniro; yamai ainta basini
pabocorooti”. ¹⁹Icanqueri:
“Caninataque. Pintingomibintaiguenari
matsiguenga timaigatsi pabocorooti
poeboroquë”. ²⁰Aique ipoque basini
iromeraro icanqueri: “Natingomi, jerica
piguireguitë. Noguëmiri caninasati
nophonatëri nobaaniotequë. ²¹Nacunque
negaca notsorokuemi nigóquiminta
obiro te pingábintsante. Najique aroca
nomitojaiguerime piguireguitë,
págabitsaquinari omagaro. Nigóquimi
pobiguiti cara te pomanguite”. ²²Aique
yotabitanëri: “Te pinganinate; te

pingantiro ora nocacagabequimi. Picantabeca te nangábintsante; nágabitsaquimiri omagaro; nobiguiti cara te nomanguite. Pigótabecaro oca, iroro naguisaneintaguëquimi. ²³¿Pairo te pogobitiri naguireguita cara omisantiririqüë quirequi? Poguërime cara, aintame yamai aisati basini quirequi imaiguëname ira omisantiriri”. ²⁴Aique icanqueri ira quemaiquëri: “Págabitsatiri naguireguita, pomeri ira omisantënari 10 quirequi”. ²⁵Icantaiguëri: “Carari, Natingomi, aroque ainta tojai iguireguita”. ²⁶Nangantaiguëmi: pairiraca inomoque tojai, imëngani basini, carari ira te irasintasantima, ira arosata inomotiri irágopitënganiri. Aisa ocanta Irinibare Tosorintsi. Aroca pinguenguero pigótasantëro, oganinasëretëmi. Carari aintaca cantatsi: “Nigóquero antagaisati”, irari ira te ingogue inguemisantina, quero iqemina. Nágabitsaqueri ora iqemabeca, iromaguisanquero. ²⁷Aisati icanque itingomi: “Yamai, iraegui quisaiquina, te iraninte intingomintina, pomaigapënari yaca pigamagaigueri catingasatiqüë naro”.

Icanaque Jesus Jerosarënuë.

(Mt. 21.1-11; Mr. 11.1-11; Jn. 12.12-19)

²⁸Cara itsonquero quingabaguientsi Jesus, yogaganaca itonganaque aiqero Jerosarënuë. ²⁹Cara pënibaque irarequimaro pite poeboro ora jitacha Betatajë aisati Betania, ora poeboro pini aronisatiqüë oguitaja jitacha Olibos, igáqueri pite irogomere, ³⁰icantaiguëri: —Pijáigue catingasati poeboroqüë. Cara pinganaque, piniopëri itiomijani boro itsatocotaga. Teraiquerai ingueicotingani. Pintaicotiri pomapëri yaca. ³¹Aintaca matsiguenga irosomitobëmica: “¿Pairo pitsaicobiritiri

boro?” aro pinganëri: “Icoquirini Atingomi”.

³²Aique íaiguë iragátane, iniaiguëri aisa ocanta cara icanqueri Jesus. ³³Cara itsaicosigüiri, ainta casintari yosamitaigabaqueri:

—¿Pairo pitsaicobiritaiguëri noborone?

³⁴Yotabitaiganaqueri:

—Icoquirini Atingomi.

—Aro páganëneri.

³⁵Aro yágaiganaquineri Jesus, yoguëneri iguitsagarepague imiticaraqüë boro itiomijani, aro iqueicotanacari Jesus.

³⁶Negaraca cara inguenaque Iriro, ira matsiguenga yogaguetaiguëneri iguitsagarepague cara abatsiquë arota iragaticanëro boro. ³⁷Cara iparintaca yanonganaca oguitoja Olibos yoguiataiguëri tojai irogomere. Icaninabentaiguëri icaimaiguë, icantaiguë:

—Tojai icaninatasanti Tosorintsi. Tojai naniaiguëro cara itasongobentopiantacái.

³⁸Ainta Agabisaicoontatsiri. Intsome antingomintobëmari. Intsome aniacaninatobëri. Igáqueri Tosorintsi aroquenta iniacaninatëri Iriro. Caninasati itimi omagaro Jonogaguitesati. Caninari Tosorintsi jonoquënantaberi.

³⁹Aintasati bariseopague itsibataigari arosonori matsiguenga aguiataiguëri Jesus. Icantaiguë bariseo:

—Ogomeantatsiri, piguimairëntaigueri matsiguenga ira aguiataiguëmi.

⁴⁰Yotabitaiganaqueri Jesus:

—¿Pairo naguimairëntobitiri?

Caninataque inganinabentaiguena. Iromairetaiguëca irirojegui, Tosorintsi irinibatacaguero mopëpague ontingominquina.

Iraicoqueri Jerosaresati Jesus.

⁴¹Cara pënibaque irarequimaro Jerosarën, Jesus iraicotaiguëri Jerosaresati, icanque:

⁴²—Yamai nipocasitaigabitëmi. Tojai nocogabeca nantimacagaiguemime caninasati, nagabisaicotaiguemime arota quero iguisaiguimi Tosorintsi, carari te pinintaiguena obirojegui. Pitsoingaigabaquina, yamaica quero pineina nantingomibintaiguëmi.

⁴³Aiqueta orequima cataguiteri cara ira quisaiguëmine irishongaigapëmi, iroticaiguëmi arota quero pisigaiga, iratsipiriacaigapëmi, ⁴⁴irógaigapëmi obirojegui aisati pijaniquite, irogeriguetëro omagaro pongotsiegui, quero pini yaca pite mopë otsibatobagaja. Ingantaigapëmi negaca aroquenta nipocasitaigabitëmi, nantingomibintaiguemime, carari te pinguemisantina, te pintingomintai-guena, iroonti pitsoingaiguëna. Iroo aiqueta Tosorintsi iragátaiguëmi tojai soraro iripoguiriaguëmi.

Ira Jesos ijocaiguëri pimantatsiri cara ibangoquë Tosorintsi.

(Mt. 21.12-17; Mr. 11.15-19; Jn. 2.13-22)

⁴⁵Aique iáque Jesos cara oquibequë ibango Tosorintsi, icanaque, iniaigapëri iraegui pimantaguetatsi aisati manantatsiri, iguisaigapëri ijocaiguëri.

⁴⁶Icantaiguëri:

—Aiti osanguenata jirai, icanque Tosorintsi:

Nocogasanti pomanocotaiguena yaca nobangoquë.

Carari obirojegui te pomanocotiri, iroonti picositapinintaigabaqueri ira bocaigatsi iromanocotaigapëri Tosorintsi.

Aro itsonque ijocaganaqueri.

⁴⁷Antagaisati cataguiteri yogomeanti Jesos cara ibangoquë Tosorintsi. Carari iguisaneintaiguëri itingomipague saserirotijegui aisati ira ogameantiro isanguenare Moisés aisati obatatsiri, yosaminatobaganaca:

—¿Atiroco anganqueri Jesos, agamagaiguëri?

⁴⁸Carari te irogóigue atiraca inganqueri arosonorinta matsiguenga aguिताiguëri, iquemisantaiguëri itingomintaigacari.

Yosamitaiguëri ira Jesos joríojegui: “¿Pairi agáquemi?”

(Mt. 21.23-27; Mr. 11.27-33)

20 ¹Patiro cataguiteri yogomeanti Jesos cara oquibequë pongotsi irasi Tosorintsi. Cara icomantaigase-guiri matsiguenga atiraca ingantima iragabisaicotaiguëri Tosorintsi, ipocasitaiguëri itingomipague saseriroti aisati ira ogameantiro isanguenare Moisés aisati antiasipari, ²Icantaigapëri:

—Pingomantaiguena: ¿Pairiraca agáquemi cara pijocaiguëri pimantatsiri? ¿Pairi oguëmi obiro cara pijica itingomi?

³Yotabitaiguëri Jesos:

—Aisati Naro, patiro nosamitaiguëmi. Pingomantina Naro: ⁴¿Pairi agáqueri Joan cara ibaotisataiguëri tojai omatsiguenga? ¿Iriroco agáqueri Tosorintsi? ¿Iraco agáqueri matsiguenga?

⁵Icantobagaiganaca jorío:

—Anganquerica: “Igáqueri Tosorintsi”, aro ingancái: “¿Pairo te pinguemisantobitaiguëri Joan?” ⁶Carari aroca anganqueri: “Igáqueri matsiguenga”, aro inguisaigacái icaegui omatsiguengaca, iribasegaigacái mopëquë ijitaiguënta cara igáqueri Joan Tosorintsi ingomantagueantë.

⁷Aro yotabitaiguëri:

—Teni nogóigue pairi agáqueri.

⁸Aique icantaiguëri Jesos:

—Aisa Naro, quero nocomantaiguimi pairiraca agáquina nangantagueantë ocapague piniaiguëca.

**Jesús icantocoqueri jorío aisa icancari
ibega catsimari ira omisantiro obasi.**

(Mt. 21.33-44; Mr. 12.1-11)

⁹Aisati iparintaca Jesús iquenguitsa-
taiguëri matsiguenga. Yosiacagantëneri
icantaiguëri:

—Ainta sërari panguiquero obasi,
yogaiguëri omisantinerine irobasite.
Iquengaigaca cara onguitsotanëca, ira
omasantineri iráquero aganguisati oba,
imagentëri casintaro aganguisati. Aique
íaque jaanta itimaque cosamani. ¹⁰Cara
omoncaraca cara oracanë oguitso oba,
igátabecari iromeraro icanqueri: “Pijáte,
pingampëri ira omisantino nobasite
imagantaiguenaro nasiati”. Carari ira
omisantiro yágaigabaqueri ipasataigaba-
queri. Yoguipiguëri, te imëmatiri oba.

¹¹Aique igátabecari basini iromeraro.
Iriro aisati ipasataigabaqueri
icantaguetobëri ora catsimaro,
yoguipiguëri. Teatisati imaiguëri oba.

¹²Ira casintaro obasi igátabecari basini
iromeraro. Yágaigabaqueri yámasitaiga-
baqueri ijocaiguëri sotoquë obasi.

¹³Aique iquianca casintaro obasi,
icanque: “¿Pairo nanganque yamai?
Ajaa, nigóti. Nagáqueri notomi, ira
nanintasanti. Irirojengari iraniacanina-
taigabaque”. Aro igáqueri itomi. ¹⁴Ira
omisantineri irobasite iniaigabaqueri
itomi, inibatobaca: “Irironta itomi
casintaro. Cara ingamaquenica iriri,
iriroquerai ágairone obasi. Intsome
ógaigabaqueri, águirota obasi
asintaiguemaro eiroquerai”. ¹⁵Aro
yágaigabaqueri, yáganëri sotoquë obasi,
yogamagaigabaqueri. Yamai, ¿Pairo
pijique inganqueri ira casintaro? ¿Pairo
ingantaiguëri ira catsimari? ¹⁶¿Teco
iriátë iriro, inguisasantaiguëri
omisantiro irobasite, iripoguiriaiguëri?
Aique irogaiguëri basini caninari ira
omisantinerine irobasite.

Aro icantaiguë ira quemaiguëri:

—¡Querota pini negaca!

¹⁷Inetsaiguëri Jesús, icantaiguëri:

—¿Pijitabeca quero pabisi?

¿Pairoroco ocanti Sanguenari cantatsi:

Jirai itsoingaiquëro mopë ira
obetsiquirori mopëpongo,
ijoquero tenta irogóiguero cara
icoiguëro Tosorintsi iroonti
otingomi mopë, otingomi
pongotsi, cantaca otingomipoa
pongotsi?

¹⁸Pairiraca pariaquenguitsine yaca
mopëca ocaraaque itongui; pairiraca
otsinaque oca mopëca obichaqueri
onganqueri pojongabatsari. Naanti
osigaro mopë otingomi nacantocotaiguë
miro; quero ca pigótina, pitsipiriaque;
quero ca piquemisantina, pijáque
Sharincabeniquë. Pairiraca
comëtobënane, iripoguiriaquengani.

**Yogomequeri Jesús ira bariseo cara
inganquineri itingomi ora icoicoqueri.**

(Mt. 21.45-46; 22.15-22; Mr. 12.12-17)

¹⁹Aro iquemaigabaqueri Ira Jesús
ogomeantiro isanguenare Moisés aisati
itingomipague saseriroti, icogaigabitaca
irácagantërimo igóiguënta cara Jesús
iquenguitsatocotaiguëri irirojegui carari
te iráguiri itorogaiguërinta
matsiguenga. ²⁰Iroro ora inetsaguëqueri
jorío ira Jesús, aisati igátaiguëri sërari
icanqueri:

—Pijáigue, pomatobitiri Ira Jesús.

Pingantomemegapëma cara
pingoguirome pigóiguero ora aisonori,
pingoguirome pinguemisantaiguero,
carari pingomëtaguiri irinibare. Aroca
ingomëtëma pisiguima pingomantina.
Aique narogui nongomantëri
cobeingari arota inguiseri Jesús.

²¹Aique íaiguë. Icantai gapëri Ira Jesús:

—Ogomeantatsiri, nigóiguë aisonori
pogomeantiro Irinibare Tosorintsi, aisati

poniaguinaro catingasati atiraca ongantima aretaiguëmari Tosorintsi. Te pintsorogui pairiraca. ²²Yamai nosamitëmi: ¿Caninataqueco omëri Sésar aguireguite? ¿Teco onganinate omagantiri cobeingari cara Iromaquë?

²³Igóque Jesus cara icogaigabitaca iromatobitirime irantacaguirime ora te ongomeite. Icantauguëri:

—¿Pairo picogobiti pingomëtaguinaro nanibare? ²⁴Poniaguinari quirequi ira tenario pipënantiriri Iromasati.

Aro yamaigapëneri quirequi ira jitacha tenario. Yosamitaiguëri Jesus:

—¿Pairi casintaro oca irosiacagomen-toca? ¿Pairi ijita sanguentëgotënguicha yaca tenarioica, iroonti iripajiro?

Yotabitanëri jorío:

—Iroonti irasi Sésar nogobeingarite.

²⁵Aro icantaiguëri Jesus:

—Aro, pomaiguëri Sésar iraisati, pingantineri ora icocagaiguëmi, pinguemisantiri. Aisati pinguemisanta-santiri Tosorintsi pomaiguëri ora iraisati, ora icocagaiguëmi Iririo. Pintingomintasantimari.

²⁶Tiguëti ingantima ingomëtaguiri Jesus irinibarequë catingasatuquë matsiguengajegui. Iquenganeintasantaigacari jorío cara caninasati yotabitanëri, aro imairetaiguë.

Aisonori inganiatanae igamaga.

(Mt. 22.23-33; Mr. 12.18-27)

²⁷Aisati iátasitaiguëri Jesus saroseopague, ira ijitasitaiga cara quero icabiritaja igamaga, quero icaniatanai.

²⁸Icantaugapëri:

—Ogomeantatsiri, jirai isanguenataiguëna Moisés:

Aintaca sërari, carari te irine itomi, aique ingamaqueca, caninataque ireinti irágajiro iina; aroca ontsomaaque itomi, irianti irosiguëma itomi ireintitomaco.

²⁹Jirai ainta sërari aisati ireinti icarati 6. Ira obatatsi yágabitaca iina, carari te irine itomi. Aique icamaque iriro. ³⁰Aro iina yágairo ireinti. Aisati icamaque iriro te irine itomi. ³¹Aisati icantaigaca ireintiegui yágaigabitaro tsinane, icamaiguë omagaro, teni irinëmate itomi. ³²Aique ocamaque tsinane aisati. ³³Cara ingabiritaigaima, ¿Pairi ágairone? Pinetse, ijinantaigabitaro antagaisati ireintiegui.

³⁴Icantauguëri Jesus:

—Aisonori, yaca quibatsica yameta sërari yáguero iina. Aisati tsinane páguio ojime. ³⁵Carari cara itimi Tosorintsi, paniro iraretima iraugui iragabisaicoque Tosorintsi yaca quibatsica, iraniacaninataiguëri. Iraganiatairi intiomopëri Tosorintsi carari quero yágai iina. Aisati tsinane, quero págai ojime. ³⁶Canta querootisati icamaji, Tosorintsi intomintaiguëmari përosati iraganiataiguëri. Irianti aisati ingantaiguëmari ironomire Tosorintsi irisaanganetsite ira quero icami aisati. ³⁷Jirai igóque Moisés cara ingabiritai-guëma igamagaegui. Isanguenaque cara yoniagapari Atingomi cara otiomijaniquë anchato otaaga, icampëri:

Naro Tosorintsi. Iquemisantina

Abaram. Iquemisantina Isac.

Iquemisantina Jacob.

³⁸Pinetse. Te ingante: “Iquemisantabequina”. Aroca iquemisanqueri Tosorintsi Abaram, ainta icaniati Abaram. Aisati caniari Isac aisati Jacob. Tosorintsi Irianti Itosorintsite ira caniatatsi.

³⁹Aro icantaiguëri ogomeantiro Sanguenari:

—Ogometinari, caninaro oca picantaiguëna.

⁴⁰Aique itsorogaiguë irosomitaigairi Ira Jesus aisati.

Quirisito imatsiguenga David.

(Mt. 22.41-46; Mr. 12.35-37)

⁴¹Aique icantaiguëri Jesus aisati:

—Obirojegui picantaiguë: “Ira Agabisaicoontatsiri imatsiguenga David”. ¿Pairo picantobiti negaca?
⁴²Iriati David isanguenatocoqueri Quirisito jirai cara sárimoquë:

Ira Tosorintsi icanqueri Natingomi:
 “Pisobigue yaca nobacosonori-quëca. ⁴³Pintsibatina yaca nagáantomentoquëca irooti cara nagabeiri antagaisati ira quisaiquëmi, irajitaiguëmi Itingomi”.

⁴⁴Aique yosamitaiguëri Jesus:
 —Iriroca Quirisito Itingomi David, ¿Pairo pijitobitaiguëri Iriro imatsiguenga David? ¿Pairo te pijitobitiri Pitingomi obirojegui aisati?

Icanque Jesus: “Pigamemari ira ogameantiro isanguenare Moisés”.

(Mt. 23.1-36; Mr. 12.38-40; Jr. 11.37-54)

⁴⁵Cara iquemisantaigaseguiri Jesus matsiguenga botobiritaigari, icantaiguëri ira irogomere:

⁴⁶—Pigamaiguemari ira ogameantiro isanguenare Moisés. Icoagaigui iranëitagueantimaro imanchaqui oquibeintsa; icogasantaiguë iriáiguë cara opimantagani pairoraca arota iraniacani-nataigueri matsiguenga; aisati icogaiguë iragasobicaigueri caninaroquë sobicomentotsi cara yapatotaiga jorío.

⁴⁷Aisati yágabitsaqueru obango ogamaimentaga iroontita cosamani yamanocotasitari Tosorintsi arota iraniacaninataigueri matsiguenga. Carari nongomantaiguëmi ira cantatsi negaca iratsipiriasantaiguë irabisaiquëri basini matsiguenga tojai ingasitígatëri Tosorintsi.

Ora tsinane opëri Tosorintsi antagaisati oquireguite.
 (Mr. 12.41-44)

21 ¹Ainta Jesus oquibequë pongotsi irasi Tosorintsi. Inetsaiguëri

casintaguetachari cara yomingaiguiri iguireguite yogantaririquë quirequi ipëngani Tosorintsi. ²Aisati inioberò tsinane ogamaimentaga pomianqueri pite itiomijani iguitso quirequi ira te iripënatima. ³Icanque Jesus:

—Nangantaiguëmi, aisonori ora ogamaimentaga te aisa ongantaiguemari basini paiguëri Tosorintsi iguireguite. Arosataanti quirequi opëri iroto, carari Tosorintsi iniacananatëro pabisaiquëri basini. ⁴Iraegui basini ipaiguëri Tosorintsi arosata ira inomotaiguiri, aintaquerai tojai yoganontaiga. Carari opabacari Tosorintsi aisati opëri antagaisati pasinsiga inomotiro, teni irinaje basini omanantantajima operi.

Icanque Jesus ogomeriguëtëngani ibango Tosorintsi.

(Mt. 24.1-3; Mr. 13.1-4)

⁵Inibatobaganaca irogomere Jesus, icantaiguë:

—¿Teco onganinatasante ora ibangora Tosorintsi? Pobetsiquëngani mopëpague oquibe aisati poganinaguetiro, aisati yogananatancaro ora ipaiguëri Tosorintsi.

⁶Aro icantaiguëri Jesus:

—Aiquenta irogomeriguetaiguëro antagaisati ora piniaguë yamai. Quero pini pite mopë otsibatobagaa; omagaro ogomeriguëtëngani.

⁷Yosamitaiguëri:

—Ogometinari, ¿Atiraca ongantima cara irogomeriguëtëro orapague pongotsi? ¿Pairo ogótacaquinane cara omoncaraquima antagaisati picantocotaiguëna?

Icanque Jesus: “Aiquenta omomirintsitomoquimari matsiguengajegui”.

(Mt. 24.4-8, 23-27; Mr. 13.5-8)

⁸Aisati icantaiguëri irogomere Jesus:
 —Pigamaiguema arota quero yamatobitaiguimi. Iriboquë tojai

matsiguenga ingantaiguëmi: “Naro Quirisito”, aisati “Igáquina Quirisito nongomantëmi pënibaque irarequima Irro”. Quero piquemisantaiguëri, quero poguiatiri. ⁹Pinguemocotaiguëro omanátobagachari; ingantaiguëmi: “Yomanátobagani canta jaanta”. Ira basini irojocaiiguëri itingomipague irogaiguëri irirai itingomi. Quero iquengaiganaja matsiguengajegui carari quero pitsorogaigui: aiquenta onganquima tojai inguisabacaquima irógobaquima, carari queroquera i omoncarata omagaro ora nacantaiganaquemi. ¹⁰Aisati nangantaiguëmi: aiquenta matsiguenga inguisaiganaqueri basiniati matsiguenga, inguiségotobaganëma irógobaquima. ¹¹Aisati tojai osebataguetanëma quibatsiquë. Aitosati iritasegaiguë tojaisonor i matsiguenga omagaroguitequë; ontojaiganaque janatigantsipague; ingamaiguë tojai matsiguenga; intorogaiganaque omagaro; cara jonoquë iranaiaguëro cobeingaguiteri ora te oneingani jirai.

Tojai inguisaguetaiguëri ira quemisantatsiri.

(Mt. 10.17-22; 24.9-14; Mr. 13.9-13)

¹²Përosati icomantaiguëri Jesus: —Carari iritsite quisaguetaiganaquemine, irágaiguëmi, iratsipiriacagaiiguëmi, irágaiganaquemi cara pongotsiquë cara yapatotaiga, iromingaiiguëmi iromingamentoquë. Irágaiganaquemi catingsatiquë itingomipague inguisatsaiguëmi aroquenta piquemisanquina Naro. ¹³Aro pinguenguitsatocotina, ati ongantima nagabisaicotajiri cara inguemisanquina. ¹⁴Quero pitsorogui, quero piquenga: “Aroca iráquina, ¿Pairoroco nanganqueri?” ¹⁵Nogósëretacaquemi Naro ora pinganque. Onibataquemi Isëre Tosorintsi arota quero igóti

ipëgatsatimi ira quisaiguëmine.

¹⁶Irácagantëmi piri aisa piniro aisati pirentipague aisati pitsiropague, aisati irácagantëmi pomatsiguenga, omagaro. Irógarantaguequimi porocague.

¹⁷Piquemisantaiguënantata, inguisaiguëmi matsiguenga. ¹⁸Aroca iróquemi, quero opega patiro piguisi piguitoquë.

Pijáiganaque Jonogaguitequë Tosorintsiquë. Quero atira picantëmata.

¹⁹Cara iratsipiriacaiguëmi aroca përosati pinguemisanquina, pintiomoquina Jonogaguitequë.

Icanque Jesus: “Iritsongaiguëri Jerosaresati soraro”.

(Mt. 24.15-22; Mr. 13.14-20; Ir. 19.41-44)

²⁰Aisati iquenguitsatomotaiguëri Jesus:

—Cara piniagabaquerica soraro irishongaiguëmaro Jerosarén, aro pigóiguë pënibaque iritsongaiguëro poboeborote. ²¹Aique iraeGUI inasegatsine Joreaquë, irisigaiganaquimata cara otisipaguequë; iraeGUI inasegatsine Jerosarénquë irisotocaiganaqueta; iraeGUI inasegatsine togantsiquë quero ipigapaa poeboroquë.

²²Aro omoncaraquima antagaisati ora isanguenaque jirai cara ingasitígataiguëri Tosorintsi omagaro tsoengatsiri.

²³Tojai otsipiriaganaquero tsinane ora pëmbatasegatsine aisati tsotagasegatsine ojaniquite queronta pisigasantanaca.

Tojaisonor i iraniacatsigatëmaro Jerosaresati tojainta ingasitígatasantaiiguëri Tosorintsi. ²⁴Iromanátaigapëri,

ingamaiguë tojaisonor i jorío. Aisati irágaiganaquengani tojai Jerosaresati parígotipaguequë, iromerataigabaquimari. Ainta basiniati matsiguenga cagari jorío imaniaiguëma basiniatipaguequë quibatsi, intimaigapë Jerosarénquë irooti cara omoncaraquima antagaisati ora icantocoqueri Tosorintsi jirai, irooti cara inganque: “Antagati”.

Atiraca ongantima cara iripigaima Jesus.*(Mt. 24.29-31; Mr. 13.21-27;**Yoniag. 6.12-14)*²⁵Përosati icantaiguëri Jesus:

—Aique cara pënibaque nopocaje Naro, imasiniatitanë omagaro irægüi jonoquëni: intsititanë paba aisa manchacori; imariaguëpë jonogasati. Piniaguëro ora te oneingani jirai. Antagaisati matsiguenga timaigatsi yaca quibatsica intsorogasanoiganaque cara inguemaigabaquero cara ojigocanëma oquibeguinte angaarepague aisati cara omotoncaatasantanë oquibeguintesonorori. ²⁶Aisati osebatëma omagaro Jonogaguite. Intsorogasanoiganaque antagaisati matsiguenga, ingamëmanataiganaque inguengaiguëma: “¿Pairoraca basini onganquima? ¿Atiraca anganquima eiro?” ²⁷Aique iraniaigabaquena Naro, Naati nopaniaca jirai Jonocaguitequë nomatsiguengatapë, nopogopë mingoriquë, nongobeingatasantapë nosanguëguitetasantapë, nantingomibintasantaguëri omagaro, nagabeiri antagaisati. ²⁸Cara piniagabaquero omarintëma ocapague nocomantaiguëmica yamai, pinganinataigue, pinetsaigabaquina; pënibaque nopogopae notsonquemiro nagabisaicotasantaiguëmi, quero pitsipiriaigai aisati.

**Ora ogóontëngani orequima cara
intingomibintaiguëri matsiguenga
Tosorintsi.**

*(Mt. 24.32-35; Mr. 13.28-31)*²⁹Aitosati icantaiguëri irogomere Jesus:

—Aisati nosiacagantëmiro anchato jitacha iguera. Pinetsero iguera aisati omagaro basini anchatopague. ³⁰Cara iroraini otsego, ositanae osi, aro pigóiguë pënibaque osariganaje. ³¹Aisa

ocanta, cara piniagabaquero ocapague nacantocotaiguemica, pigóontëmaro omanapague orequima cara Tosorintsi intingomibintaiguëri matsiguenga yaca quibatsica. ³²Nangantaiguëmi aisonori: queroquerai icamaigui jorfojegüi tsoengantatsi queroquerai omoncarata ocapague nocomantaiguëmica. ³³Omeğanëma omagaro inatsi jonoquë aisati omeğanëma oca quibatsica, carari quero opega nasi nanibare. Omoncaraquima omagaro ora nacantaiguëmi.

**Icantaiguëri Jesus: “Pigamaiguema
pigueina”.**

*(Mt. 24.36-44; Mr. 13.33-37)*³⁴Aisati icantaiguëri:

—Pigamaiguema. Nomabocapaimi. Quero picantiro ora te omitocotimi, quero pisinguitaiga, quero pogasëretocotaguetaro orapague inatsi yaca quibatsica ³⁵arota quero poguipasiguitimi cataguiteri cara nopocaje. Omabocaguëri omagaro matsiguenga ira te iragamaiguema. ³⁶Pigamema, pingaguite, pomanocotaiguëri Tosorintsi arota iromitocoiguëmi pingantiro ora caninaro, pintiomotaigabaquina, arota quero pitsipiriario omagaro nocomantaiguëmi.

³⁷Aro cara cataguiteriquë yogomeantë Jesus oquibequë pongotsi irasi Tosorintsi; cara ochapinitanë, iáque oguitojaquë jitacha Olibos, itimaque cara. ³⁸Oquëtaguetanë iátasitaiguëri matsiguengajegüi cara ibangoquë Tosorintsi, icogaiguë inguemisantopian-taiguëri.

**Iquengaigaca saseriroti cara Joras
iracagantëri Jesus.**

*(Mt. 26.1-5, 14-16; Mr. 14.1-2, 10-11;
Jn. 11.45-53)*

22 ¹Pënibaque orequima
cataguiteripague jitacha Pásicoa

cara yapaiguiro jorójegui ora pan te ine piponganta, aisati iquengaigaca cara isotocaiguë Ejípitoquë jiraisonori. ²Icogaigabitaca iróguirime Jesus itingomipague saserirotijegui aisati iraegui ogomeantiro Sanguenari, icantobaca:

—¿Ati anganqueri ágagantiri Jesus agamagaiguëri? Intsome angantiro comanononi querota iguisaigái matsiguenga iniacananatèrinta Jesus.

³Aique ira Satanás camagari iátasiqueri Joras Cariotisati, ira yogometabeca Jesus; yagobiopëri yogomequeri irácagantëri Itingomi Ira Jesus. ⁴Aro Joras iátasiqueri itingomipague saseriroti, icampëri:

—Nomitocoquemi págaiguëri Jesus.

⁵Icaninatasantaiguë, icantaigabaqueri: —Aro, caninataque. Aroca águëri, aro nomaiaguëmiri quirequi.

⁶Iquengaigaca. Aro icanque Joras:

—Aro. Nanetsëri; aique nongomantai-guëmi ati ongantima págagantëri comanononi. Quero iniaiguimi matsiguenga.

Yobetsiquineri Jesus cara icarantacaro yapë.

(Mt. 26.17-19; Mr. 14.12-16)

⁷Pareca Pásicoa cara yametaiga jorójegui yóguëri oisha aisati icantaigari ibega jorfo jiraisonori Ejípitoquë. ⁸Aro Jesus igátaiguëri Peroro aisati Joan, icanqueri: —Pijáigue, pobetsicaiguero cara opaiguë Pásicoaquë.

⁹Yosamitaiguëri pitirooti:

—¿Nega pininti nobetsiquëmiro?

¹⁰Icantaiguëri Iriro:

—Cara pirequima Jerosarénquë, pinioipëri sërari yáigotëro nija. Piguiatiri irooti pongotsiquë cara inganaque.

¹¹Aro pingantaiguëri casintaro pongotsi: “Icanque Ogometinari: ‘¿Nega pini cara

nopaiguë Pásicoaquë, Naro aisati nogomerejegui?’” ¹²Ironijagaiguëmiro oquibe coarito jonoquë; aito pobetsiquëro perintsi asi Pásicoa.

¹³Aique iáiguë, iniaigapëri sërari aisati omagaro aisa ocanta icantaiguëri Jesus. Yobetsicaiguëro Pásicoa.

Yogomeantë Jesus cara irapapinintobiqueri quemisantatsiri aisati irógobitaiguëmari.

(Mt. 26.20-29; Mr. 14.17-25; Jn. 13.18-30; I Cor. 11.23-26)

¹⁴Aique cara ochapinitanë yaretaigapa Jesus aisati irogomere, isobicaigapë mesaquë yapaigapë. Icanqueri:

¹⁵—Tojai nocoque nopaaganaimi oca Pásicoa cara queroquerai nacami

¹⁶nangantaiguëmintá cara quero napairo aisati irooti cara omoncaraquima omagaro isanguenato-cotaiguëna cara intingomibintanque Tosorintsi iragáantanequë.

¹⁷Aro yáguëro ógomentotsi, icarasiaqueri Iriro, icantaiguëri:

—Jerocha, pógaiguemaro obirojegui ¹⁸nanganqueminta cara quero nógaaro obaa aisati irooti cara iragáantanequë Tosorintsi.

¹⁹Aique yáguëro pan, icarasiaqueri Tosorintsi, itibatsaguequero, yotsatengaiguëri irogomerejegui. Icantaiiguëri:

—Jerocha pan osigaro nobatsa. Popaiguero. ¿Teco nangamobitaiguëmi? Nocogui cara popapinintaiguëro pan pinguengasëretapinintaiguëna cara nacamobiquëmi.

²⁰Aro yapaiguëro. Aisa yáguëro ora yóganta obaa, icanque:

—Jerocha obaa, pógaiguemaro. Irocho osigaro naraa ora naraatobitanëneri omagaro matsiguenga cara nangamobitaiguëri. Yamaí naraa ocanti irorai Nibarintsi; iroro ingábintsantai-

guëmari Tosorintsi cara icanque jirai. Cara irabentaiguëna matsiguenga inguemisanquina, Tosorintsi irojocajineri ora icantaguëti te onganinate, quero iquengaineri aisati. Cara pógapinintaiguëmaro obaa pinguengasëretaiguëna cara nacamobitaiguëmi arota iragabisaicotajimi Tosorintsi. ²¹Yamai ainta yaca yapëgotëna ira ágagantënane. ²²Nopaniaca Naro Jonogaguëtequë, nomatsiguengatapë yaca quibatsica. Omoncaraca omagaro isanguenatocoquina jirai Sanguenariquë. Irari atspiriasantërone ira ágagantënane. ²³Aro iparintaigaca irogomere Jesus yosaminatobaca iriatiegui:
—¿Pairiraca ágagantërine?

Icomantë Jesus pairi obaquenguitsine.
(Mt. 18.1-7; 20.25-28; Mr. 9.33-37; 10.42-45;
Ir. 9.46-48)

²⁴Aique icantobaganaca irogomere Jesus pairiraca obaquenguitsine irirojeguiquë. ²⁵Icantaiguëri Jesus:
—Pigóiguë cara yametaiga basiniati matsiguenga ira cagari jório itingomintaigacari itingomipague, iriro cantënguicha itingomi merataigari imatsiguenga. Icantasitaigaca: “Nomitocoiguëri natiriteegui”. ²⁶Carari quero aisati picantaigari ibegaiga iriro. Pinintica piguibatima obiati, quero piquenga obiati caninari pabisiri basini. Pomitocoigueri pomatsiguenga, pingábintsaguetaigueri, quero pimeratari. ²⁷¿Pairi obatatsi, iraco sobigatsi mesaquë, iraco mapënerine iraperi? Pigóiguë ibaque ira sobigatsi mesaquë, yapi, imeratari iromeraro ira mapënerine iraperi. Carari te nomerataiguëmi Naro, Naanti cantaca pomeraro. ²⁸Coshoni pogaiguëna jirai, pitsibataiguëna cara yobomirintsitapinincái omatsiguenga; ²⁹aiqueta

nomaiguëmi pintingomibintante aisati nacanta aroque ipëna Pabati cara natingomibintanque. ³⁰Pintsibataiguëna, popëgotaiguëna aisati pogaiguëma canta natingomibintanque, aisati antingomibintaiguëri omagaro jorío imatsiguenga itomi Jacob icarati 12.

Jesús icomantëri Perero: “Yamaica tsitinirica mabataque pinganque: ‘Teni nogótiri Jesús’”.
(Mt. 26.30-33; Mr. 14.26-31; Jn. 13.36-38)

³¹Aique icanque Atingomi:
—Simón, Simón, icogui Satanás iraniantëmi aisonorica piquemisanquina. Icogui irantacaquemi ora te onganinate. ³²Carari namanocoquemi iromitocotimi Tosorintsi irosintsisërequimi querota pijoqui cara piquemisanti. Aiqueta, cara pijocajiro ora picantaguëti te onganinate, piganinasëretaguëtiropiguemisan-tane, pomitocotaguëtiropiguemisan-tantacaguiri.

³³Icanqueri Perero (Simón):
—Natingomi, naguiatëmi përosati. Aroca iromingaiguëna, irógaiguëna aisati, quero nojocanëmi naro.

³⁴Icomantëri Jesús:
—Nanganquemi, Perero: yamaica tsitinirica queroquerai icaimi tiapa sërari, ongaraque maba pinganque: “Teni nogótiri Ira Jesús”.

Omoncaraquima omagaro ora isanguenatocoquengani Jesús.
(Ir. 9.1-6)

³⁵Aisati icantaiguëri irogomere Jesús:
—Jirai nigátaiguëmi piáiguë piquenguësatomotagueiguëri matsiguengajegui, nanganquemi: “Quero páganëro pitsaguëna, querootisati poperi, querootisati basini pisapatote”. Yamaica nosamitëmi: ¿Pitsipiriaiguë? ¿Aiti coguëtiomquemi?

Yotabitaiguëri irogomere:

—Tesonori.

³⁶Aro icanqueri Jesus:

—Carari yamai nangantaiguëmi:

aitica pitsaguine, páganëro, aisati aitica pomotsirate páganëro. Piguireguite aisati. Teca ine pisabirite, pomimantiro basini piguitsagare pomanante patiro sabiri. ³⁷Nangantaiguëmi cara omoncaraquima ora isanguenatocoquina jirai Isafas:

Itsibatacari ira cantaguetiro ora te onganinate.

Aisonori, omagaro isanguenatocotaguequina omoncaraquima.

³⁸Aique icantaigapëri:

—Natingomi, pinetse. Jeroca pite sabiri.

Icanque Jesus:

—Aroque, antagati, moncaraca.

**Cara Jetsemaníquë Jesus
yamanaqueri Iriri.**

(Mt. 26.36-46; Mr. 14.32-42)

³⁹Aique, cara yameta Jesus, íaque oguitojaquë jitacha Olibos.

Yoguiataiguëri irogomerejegui. ⁴⁰Cara yaretaigapaa, icantaiguëri:

—Pingaguitaigue, pomaniri Tosorintsi cara iromitocoiguemi quero picantaguetiro ora te ongomeite.

⁴¹Aique yogaganaca arosata caraquerora, yobaticagueritotasipa, yamanocopëri Iriri:

⁴²—Pabati, teni naninte natsipirie, carari quero nacantiro ora nocogabeca Naro, iroonti nanganquero ora picocaquena Obiro.

⁴³Aique ipocasipëri ironomire Tosorintsi imitocopëri yosintsitëri.

⁴⁴Tojai yogasëretasantata, itsipiriasëretasantata, aisati yamanocotasantëri Iriri. Tojai imasobique, opariaatë imasobire quibatsiquë cantaca iraraa.

⁴⁵Icabiritaja, ipigapaa cara isamaigasegui irogomere. Carani yogasëretasantaiga, iroso imagotaguë taiguë. ⁴⁶Icantaiguëri:

—¿Pairo pisamabiritaiguë?

Pingabiritaiguema pomanague arota quero picantiro ora te onganinate.

Cara yáganëngani Jesus.

(Mt. 27.47-56; Mr. 14.43-50; Jn. 18.2-11)

⁴⁷Aintaquerai inibatasegui Jesus cara yaretaigapa tojai matsiguenga.

Ibataiguëri Joras, irianti irogomere Jesus, íátasipëri Jesus yasaraboropari.

⁴⁸Icabëri Jesus:

—Joras, ¿Págagantënanico cara pasarapëna? ¿Teco pigóte Naro paniacha Jonogaguitequë, nomatsiguingatapë?

⁴⁹Aro iniaigabaqueri ira tsipataigari Jesus. Yosamitaiguëri:

—Natingomi, ¿Picoguico nopëgabentaiguemi nacarataiguëri?

⁵⁰Aro paniro irogomere yáguero isabirite itoguimitatobëri iguemitasonorori ibimantaga itingomi saseriroti.

⁵¹Icanqueri Jesus:

—íAroque, antagati! ¡Quero pintiri basini!

Aique yotsagaquineri iguemita, yogaguibegajiri.

⁵²Jesus icantaigabaqueri itingomipague saseriroti aisati ira itingomipague sorarorejgui omisantiro ibango Tosorintsi aisati antiasiparipague, icantaiguëri:

—¿Pairo pamasibiriquinaro pisabirite aisati anchaqui? ¿Pijiquinanico Naro cosirinti?

⁵³Omagaro cataguitero piniaigabitëna cara nogometaiguimi cara ibangoquë Tosorintsi, te pingantëmatina. Carari omoncaraca yamai págaiguëna aisati iragabianque camagari itingomibintanque arosata.

Icanque Peroro: “Teni nogótiri Jesos”.

(Mt. 26.69-75; Mr. 14.66-72;

Jn. 18.15-18, 25-27)

⁵⁴Aique yágaiganaqueri Jesos cara ibangoquë itingomi saseriroti. Yoguiataiguëri Peroro icarantanë panirooti. ⁵⁵Yogamataiguëro tsitsi cara saaguiteroquë tso magui tantotsi. Isobicaigapë, Peroro aisati. ⁵⁶Cara isobicasegui Peroro, oniasantëri tsinane obimantaga itingomi saseriroti, ocanque:

—Ica aisati yoguiatëri Jesos.

⁵⁷Carari icanquero Peroro:

—iCagarina naro! iTeni nogótiri!

⁵⁸Aique arosata, iniaqueri basini, icanque:

—Aisati obiro aguiaatëri Jesos.

Carari icanqueri Peroro:

—iTeni naguiatiri, teni nogótiri!

⁵⁹Aique ocosamanitanë arosata, icanëri basini:

—Aisonori yoguiatëri ica sërarica, irianti Garireasati.

⁶⁰Carari icanqueri Peroro:

—Teni nogóte pairoraca picanquina.

Iroontita inibasigui Peroro, irooti cara icaimanë tiapa sërari. ⁶¹Aro inebintanaca Atingomi inetsëri Peroro. Aito cara iquiianquero Peroro cara icomantëri Jesos: “Queroquerai icaimi tiapa sërari yamai, mabataque pinganque: “Teni nogótiri Jesos””. ⁶²Aro isotocanai Peroro iragasantaca.

Isërontaigacari Jesos.

(Mt. 26.67-68; Mr. 14.65)

⁶³Ira omisantaiguiri Jesos isërontaigacari aisati ipasataiguëri. ⁶⁴Aisati ibasioquiqueri iroquiquë, incho tangabotëri, icantaiguëri:

—Jaa, pingomantina: ¿Pairi capojëmi?

⁶⁵Përosati, tojai icantocotaguetasitai-gari, isërontaigacari.

Yáganëngani Jesos cara yapatotaigaca jorío obatatsi icarati 71.

(Mt. 26.57-66; Mr. 14.53-64; Jn. 18.19-24)

⁶⁶Cara oquëtaguetamananaque, yapatotaigaca iraegui antiasipari aisati itingomipague saserirotijegui aisati iraegui ogameantiro isanguenare Moisés. Yágaiganaqueri Jesos catinasatiquë itingomipague ira obatatsiri icarati 71. ⁶⁷Icantaigabaqueri: —Pingomantaiguena Obiroca Quirisito, Ira Agabisaicoontatsiri.

Yotabitaiguëri Jesos:

—Aroca nongomantaiguëmi: “Jee, Naro Quirisito”, quero piquemisantina.

⁶⁸Aisati nosamitaiguëmica pairoraca ora isanguenatocoquina, quero potabitaiguina. ⁶⁹Nopaniaca Jonogaguitequë, nomatsiguengatapë yaca quibatsica. Yamai pënibaque najátaje aisati Jonogaguitequë, nosobigopë cara ibacosonoriquë Tosorintsi Agabiasanotachari.

⁷⁰Icantaiguëri antagaisati jorío:

—¿Obiroco Itomi Tosorintsi?

Yotabitaiguëri Jesos:

—Jee, Naro, cara picantaiguë.

⁷¹Aro yosamitobaca:

—¿Pairo ongogobique basini comantëgotërine? Aquemaiguëri omagaro eiro ora icanque Iriati: icantocotaguetasitari Tosorintsi. Ijitosorintsitasa Iriati.

Yáganëngani Jesos Piratoquë.

(Mt. 27.1-14; Mr. 15.1-5; Jn. 18.28-38)

23 ¹Aito cara omagaro jorío obatatsiri yágaiganaqueri Ira Jesos catinasatiquë Pirato, ira cobeingari Iromasati. ²Aro icomantëgotagapëri Ira Jesos, itsoiguëgotagari:

—Teni ingomeite Ica. Naniaiguëri cara yamatobitaiguëri nomatsiguengajegui, icantaigabitacari: “Quero popiri

cobeingari quirequi”. Aisati icantopianti: “Naro Quirisito, pintingomintina, pinguemisantina Naro”.

³Yosamitëri Jesos Pirato:

—¿Aisonorico? ¿Obiuroco Itingomi joríojegui?

Yotabitanëri Jesos:

—Jee, Naro aisonori ora picanque.

⁴Aro Pirato icantaiguëri

itingomipague saserirotijegui aisati iraegui ogomeantiro isanguenare Moisés aisati tojai matsiguenga botoitaigacha, icanque:

—Ninibatëri Ica sërarica. Te ine paio ingantaguetëmate ora nangasitgabiriqueri.

⁵Carari icantopiantaiguëri jorío:

—Iguisagaigacari ira matsiguengajegui, icantaiguëri: “Intsome ojoquiri ogobeingarite”. Iparintaca cara Garireaque, yamai yaca aisa icampa, yamatobitaguëpëri tojai.

Pirato igáqueri Jesos cara Eroriquë.

⁶Cara iquemaque Pirato, yosamitëri:

—¿Iriuroco Garireasati Ica?

⁷Yotabitëri:

—Jee, Iriro.

Icanqueri Pirato:

—Aro, atsi páganëri cara Eroriquë igobeingarite Garireasatiegui. Yamai ainta yaca Jerosarénquë; ipoque cani.

⁸Aro yágaiganaqueri. Iniobëri Eroris, icaninatanë. Tojai iquemocotopiantëri Jesos itasangantagueque; icogasantë iraneiri. Ico Gabeca iraneirime cara itasanganti. ⁹Cosamani yosamitagueta-becari Ira Jesos, carari te irotopitiri.

¹⁰Tojai yogatsitapinintaiguë itingomipague saserirotijegui aisati iraegui ogomeantiro isanguenare Moisés, icantaiguë:

—Teni inganinate Ica, aiti icantagueti ora te ongameite.

¹¹Aique isërontaigacari Ira Jesos Eroris aisati omagaro isorarote. Irooti iquitsagatacagaigacari caninano quitsagarantsi icantomemegacari itingomi, isërontobitaigacari. Aique yoguipigaineri Pirato. ¹²Jirai iguisabacaga Eroris aisati Pirato, carari yamai iparintacaro yágacaninatobaca, ijocajiro cara iguisabitobaca jirai.

Ipëgantaari Jesos ira Barabás.

(Mt. 27.15-26; Mr. 15.6-15; Jn. 18.39-19.16)

¹³Aique Pirato yapatotaiguëri ira itingomipague saserirotijegui aisati obatacagaiguëri jorío aisati tojai basini matsiguenga, icantaiguëri:

¹⁴—Pinetse, carani pamaigabitëneri Ica, picantaiguëna yogometiri matsiguenga cara irojocajina naro aisati basini cobeingari natsipa. Pinaiguë cara nosamitasantëri pairoraca, carari naniacananatëri, te ine irantane ora te ongameite. Picantasitaigaca obirojegui.

¹⁵Aisati ira Eroris iniacananatëri, irooti cara yoguipigainari. Ica te ingantaguet pairoraca ora nógobiqueri. ¹⁶Yamai nopasatagantëri, nomisotoqueri.

¹⁷Aro antagaisati osarini omoncaraca jiesita cara iquengaigaca joríojegui jiraisonori cara yogabisaicobintëri ironomire Tosorintsi cara Efpitoquë. Cara jiesitaquë yameta Pirato iromisotocajiri paniro iromingane, ira icoigaiguë jorío. ¹⁸Carari icaimaiguë omagaro jorío:

—iPógagantiri Ica; iriroque pomisotocaje Barabás!

¹⁹Yomianqueri ira Barabás irironta ógueri aisati icantaiguëri imatsiguenga: “Intsome ojocajiri Iromasati ogobeingarite”. ²⁰Icogabetanta Pirato iromisotocajiri Jesos, icogabeca iraguimairentaiguërimo matsiguengajegui, ²¹carari aiqhero iáiguë icaimaiguë:

—iPopëicotiri, popëicotiri!

²²Yogatsitairo Pirato maba icantaiguëri:

—¿Pairo icanque ora nopëicobiriqueri? Nosamitaigabitëmi obirojegui aisati nosamitabitacari Iriro. Te ine ora pigótacagaiguëna ora icantaguëti te onganinate. Te ine ora nagamagobiqueri. Iroro nopasataguëqueri, nomisotocajiri.

²³Carari përosati icaimaiganaque:

—iPopëicotiri, popëicotiri!

Aiquero icaimasantaiganaque iróoti cara yagobiaiguëri ira Pirato ora icogabeca iriro. ²⁴Icantaiguëri:

—Aro nanganque ora picocagaiguëna.

²⁵Yomisotocajineri ira Barabás, ira yomianque jirai aroquenta yogamaguëri matsiguenga aisati icoque irojocajiri igobeingarite. Ipaiguëri Barabás, carari igáqueri isorarote irágaiganaqueri Jesus cara iribëquëgotaiquëri.

Yágaiganaqueri Ira Jesus iribëquëgotëri.

(Mt. 27.31-32; Mr. 15.21-23; Jn. 19.16-17)

²⁶Aro yágaiganaqueri Jesus iribëquë gotaiquëri. Itonguibocari Sirenesati, ijita Simón, ipaniaca parigoti. Aro imeratobacari soraro iráganëneri Jesus igorosite, yoguiatëri yanatanëneri.

²⁷Aisati yoguiataiguëri arosonori matsiguenga aisati tojai tsinane, piraicotaiguëri. Aisati pogasëretococari.

²⁸Carari inetsaiguëro Jesus, icantaiguëro tsinanepague:

—Jerosaresato, quero piraicotina Naro; piraicotaiguema obirojegui, aisati pitomijegui. ²⁹Aiquenta orequima cataguiteri omomirintsito-motaiguëmi, pitsipiriaiguë. Ingantaiguë matsiguenga: “Onganinasë retë ora tsinane quero pogui ojaniquite, aisa ora quero otsotacagui”. ³⁰Aique ingantaigabitëma matsiguenga: “Otiopënata taranga,

ománaiguenata oguitoja”. ³¹Aroca itsipiriacagaiguëna Naro te nangantëmate ora te onganinate, iritiguëmarini iratsipiriasantacaqueri iraegui cantasantatsi tojai te ongameite.

³²Aisati yágaiganaqueri pite cosirinti iribëquëgotëri, intsibatëmari Jesus.

Ipëicotaiquëri Jesus corosiquë.

(Mt. 27.33-38; Mr. 15.22-32a;

Jn. 19.18-24)

³³Cara yaretaigaparo oguitoja ojita Carabera, ora ocanti osigaro iguito igamaga, aro ipëicotaigapëri Jesus corosiquë. Aisati ipëicotaiquëri pite cosirinti basiniquë pite corosi, paniro íbacosonoriquë Jesus, ira basini imatepacoquë. ³⁴Icanque Jesus:

—Pabati, pingábintseri icaegui yogamaguënani, quero piguisiri tenta irogóigue pairoraca icantaiguë.

Ira soraropague imaguimpibintëqueri imanchaquipague Jesus ipabacaguecaro yotsatiancaro. ³⁵Ainta yaratingaiguë tojai matsiguenga inetsaiguëri. Aisati ainta obatacagaiguëri jorfo isërontaigacari icantaiguë:

—Yogabisaicotaiguëri imatsiguenga. Intsome anetsaiguëri aroca iragabisaico-quima Iriati, Iriroca Quirisito Agabisaicoontatsiri, Ira icoiguë Tosorintsi igáqueri.

³⁶Aisati isërontaigacari soraropague. Ítasiqueri ipapëri obaa cochoari ³⁷icantaiguëri:

—iObiroca Itingomi jorfojegui, pigabisaicotima Obiati!

³⁸Aiti sanguenari poguëngani igorositequë jonoica iguito Jesus, ocanti: “Icari Ica Irianti Itingomi jorfojegui”. Osanguenaca maba nibarintsiquë: irinibarequë guiriego aisati irasi ebereo aisati iratín irinibare Iromasati.

Inibataiguëri cosirinti Jesus.*(Mt. 27.39-44; Mr. 15.32b)*

³⁹Aisati ainta paniro cosirinti ipëicoca aisati itsibatari Jesus, isërontacari icanqueri:

—¿Obiroca Quirisito Agabisaicoontatsiri? Atsi yamai pigabisaicotima Obiati, aisati pigabisaicotaiguëna naro pitirooti.

⁴⁰Irari basini cosirinti isintsitsaqueri itsipa, icanqueri:

—¿Teco pintsoroguari Tosorintsi? Aisati obiro, pënibaque pingamaque.

⁴¹Aroquenta ocositaguetanti eiroegui acantaguetiro cagaro caninatatsi, iroso ipëicotaguëcái atsipiriaiguë yamai. Irari Ica te ingantëmate ora yógobiqueri.

⁴²Aisati icanqueri Ira Jesus:

—Jesus, Natingomi, pinguenguaena cara pirequima pigáantanequë cara pigáanti omagaro, quero pomaguisantina.

⁴³Yotabitanëri Jesus:

—Aisonori nanganquimi, yamaica cataguiteri pintsibatëna canta caninaguiteroquë.

Icamaque Jesus.*(Mt. 27.45-50; Mr. 15.33-37; Jn. 19.28-30)*

⁴⁴Aroque icatingapë paba cara otsitinitanë omagaro quibatsi irooti cara ochapinitanë. ⁴⁵Itsitinitanë paba, aisati otisaraanaca aganguisati ora yotigantaro oquibe ibango Tosorintsi, ⁴⁶aito cara icaimanë Jesus, catsigue icanque:

—Pabati, yamaica nomëmiro nasëre. Irooti icamantanaca.

Ora iquengaigaca ira niaiguëri Jesus cara icamaque.

(Mt. 27.51-56; Mr. 15.39-41)

⁴⁷Ira igapitante sorarojegui icarati 100 iniaqueri Jesus cara icamaque, iniacaninatëri Ira Tosorintsi, icanque:

—Icaninatasanti Tosorintsi; aisati Ica camënguitsica. Aisonori Irianti Itomi Tosorintsi caninari, te ingantëmate ora te onganinate.

⁴⁸Aisati ira botoibiritaigari cara inetsaiguëri Jesus cara ipëicoca, iniaiguëro omagaro, ipigaiganaca yogasëretaigaca. ⁴⁹Ainta jaqueronta ira ogóiguëri Jesus inetsaiguë aisati ora tsinanepague tsipataigapari cara ipaniaca Garireaquë, onetsaiguëri aisati.

Cara itiaqueri Jesus omoroquë.

(Mt. 27.57-61; Mr. 15.42-47; Jn. 19.38-42)

⁵⁰Aro ainta caninari sërari jitacha José, itentaigacari basini obatatsiri jorío icarati 71 cara yapatotaigaca. ⁵¹Iriro Arimateasati, te iranintiro cara ipëicotaiguëri Jesus irironta aguiaquero iragáantane Tosorintsi cara intingomibintaiguëri antagasiati matsiguenga. ⁵²Ira José iátasiqueri Pirato yamanopëri imëri igamaga Jesus arota iromingueri. Aro ipëri. ⁵³Aique iáque, yoguëpëri igamaga Jesus, iponatancari tocoya, yomianqueri irasiquë iritijomento yomoroquero mopëquë, ora terai iritijantimaro.

⁵⁴Iroso cataguiteriquë yobetsicaiguë jorío jiesita; teraiquerai oretima sábaro cara imagoriaiguë. Pënibapë. ⁵⁵Ora tsinanepague aguiataiguëri Garireaquë otsibataigapari aisati Jerosarénquë, onetsaiguëri cara itiaqueri omoroquë. ⁵⁶Pipigaiganaja obangoquë, pobetsiquë neri casangajengaropague otiritaiguë rime igamaga Jesus. Aroquenta pareca sábaro, cara omagoriaiguë cara ocanti isanguenare Moisés.

Icaniatanai Jesus, icabiritaja.

(Mt. 28.1-10; Mr. 16.1-8; Jn. 20.1-10)

24 ¹Aique oquëtaguetanai tomincoquë, piáigamanë tsinane cara yomianqueri Jesus,

págaiganaque casangajengaropague ora pobetsiquëneri. ²Cara paretai gapa omoroquë oniaigapëro oquibe mopë aroque otitigaca ora yasintocoontacari Josë Ira Jesus. ³Ocaigabitanaca tso magui, carari te oneiri igamaga Atingomi Jesus. ⁴Iroontita onetsasigabitapaari, oquenganeintasantaca, aitoniatu yaratingaigapë pite sërari iquitsagata catarisonoriguinte iguitsagare pobariaguitetasantë. Imabocaparo tsinane, ⁵otsorogaigabaqueri, poguitasantaigaca. Icantaigapëro:

—¿Pairo picogobiqueri Ira caniatatsi yaca cara yomianqueri igamaga camatsiri? ⁶Teni irinaje yaca. Aroque icaniatanai. Pinguengero ora icanque Jesus jirai cara aintaquerai Garireaque. ⁷Icantaiguëmi: “Naro paniacha Jonogaguitequë nomatsiguengatapë cara niboguë yaca quibatsica, aiquenta irácagantëna matsiguenga cantagueantatsiri te ongomeite, iribëquëgotaiguëna, aique ongaraque maba cataguiteri, nanganiatanae”.

⁸Aro oquengaigairo irinibare Jesus. ⁹Pipiganaja poeboroquë ocomantaigapëri irogomere Jesus aisati ocomantagueiguëri basiniegui quemisantatsiri. ¹⁰Ainta María Magararasato, aisati Joana, aisati basini María iniro Santiago, aintasati basini tsinane. Tojai tsinane ocomantaigabitacari iragátane Jesus, ¹¹carari te inguemisantaigabaquero ora ocomantabitaca tsinane cara icaniatanai Jesus. Ijitaigabitaca ocantasiaiga tsinane te ogoigüe. ¹²Paniri Peroro icabiritanaca isiganaca omoroquë, yoguipa, inetsapë tso magui. Patiro iniope ora tocoya iponatantabecari Jesus. Aique ipiganaja pongotsiquë, iquenganeintasantaca.

Pite quemisantatsiri iniajiri Ira Jesus abatsiquë.

(Mr. 16.12-13)

¹³Aro irooti cataguiteri iáiguë pite quemisantatsiri cara poeboroquë jitacha Emaos, cosamani 11 quirometoro aiqero Jerosarënuë. ¹⁴Cara iquenaigasegui inibatobaca, inibatëgotëri Jesus ati ocanta icantaiguëri matsiguenga, aisati ora icantasantë Iriro. ¹⁵Cara iáigasegui inibatobaca iquengamotobaca, yotsitipari Jesus, itsibatanacari abatsiquë. ¹⁶Iniaigabitobacari carari Tosorintsi te iranintacaguiro irogótobëri. ¹⁷Aro yosamitëri Jesus:

—Cara piquenaigasegui, ¿Pairo picantobitobaca?

Irirojegui yaratingaiguë, yogasëretai gaca. ¹⁸Paniri, ijita Quiriopas, yotabitanëri:

—Igóiguë antagaisati Jerosaresati. ¿Obiromo paniri te pigótocotiro?

¹⁹Yosamitëri Jesus:

—¿Pairo pinibatëgoti?

Icantaiguëri iriro pitirooti:

—¿Teco pinguemocotiri Jesus

Nasaresati? Caninasati icomantagueitaguëri matsiguengajegui Irinibare Tosorintsi, aisati itasongagueanti. Iniacaninatëri Tosorintsi, aisati naniacaninataiguëri narogui. ²⁰Irari itingomipague saserirotijegui aisati iragui obatacagaiguëna yágagantëri, aro yogamagaiguëri ipëcotaiguëri.

²¹Najitaigabitaca Iriro Agabisaicoontatsirite, iragabisaicoái eiro jorijegui.

Icantabeca inganiantanae aisati, carari yamai pabisanaque maba cataguiteri cara icamaque. ²²Aintapague tsinane tsipataiguëna, piáigamanë omoroquë, pipigaigapaa omabocapaina cara ²³ocomantaiguëna te oniaigairi igamaga Jesus, te irinaje. Aisati ocampë cara

yoniagaparo ironomire Tosorintsi
icanquero cara ainta Atingomi caniari.
²⁴Aisati ainta naroequiüë íáiguë cara
omoroquë iniaigapëro irooti ora ocanque
tsinane, carari te iraniaigairi Irriro.

²⁵Aique icanqueri Jesus:

—íTe pigótëmataigue; pitsoinguëri
comantantatsiri ira quinguitsataiguëmi
Irinibare Tosorintsi jirai! Terai
pinguemisantiri. ²⁶¿Teco ingantaiguemi
cara Iritsita atsipiriaquenguitsine
Quirisito Agabisaicoontatsiri
ingamaque, aique inganiantanae iriátë
Jonogaguitequë?

²⁷Aro yogometasantaiguëri Sanguenari,
yotsateanquero omagaro comantëgotëri
Irriro. Iparintacaro isanguenare Moisés,
aique yogometaiiguëri isanguenare
basinipague comantantatsiri. ²⁸Aro
yaretaigaaro Emaos, irabisanaqueme
Jesus ²⁹carari icantaiguëri itsipa pite:

—Quero piáti. Pintiomotina yaca
nobangoquë. Aroque ochapinitanë,
pënibaque ontsitinitanë.

Aro icanaque Jesus pongotsique,
itimaque.

³⁰Cara isobicaiguë mesaquë, yáguëro
pan Jesus, icarasiaqueri Tosorintsi,
itibatsaaguequero, ipaguetaiguëri itsipa.

³¹Aito cara ira pitirooti igóiguëri Irianti
Jesus; irooti cara ipegopitanacari.

³²Aique icantobaca pitirooti:

—¿Teco onganinatasante icancaí cara
abatsiquë igótacaganacáiro Sanguenari?
Tojai ocancaí asërequë, poganinasëretacái.

³³Aito cara icabiritaigaca,
ipigaiganaja cara Jerosarénquë.

Iniaigapëri ira irogomere Jesus icarati
11 cara yapatoica irirojegui aisati basini
quemisantatsiri. ³⁴Irrojegui
icantaigabaqueri:

—Aisonori icaniantanai Atingomi
icabiritaja. Iniajiri Simón.

³⁵Aique ira pite Emaosati
icomantaigapëri icampë:

—Aisati naro, naniaigairi canta
abatsiquë. Yogometaigapëna caninasati
cara niáigasegui carari terai nogótiri.
Aique canta pongotsiquë itibatsaague-
quero pan ipaiguënaro, irooti
nigóontacari. Aito cara ipeganaca.

Jesus yoniagaigapari irogomere.

(Mt. 28.16-20; Mr. 16.14-18; Jn. 20.19-23)

³⁶Iroontita icomantaseguiro, Iriguito
yoniagaigapari Jesus, yaratingopë
aganguisatiquë irirojegui, icantaigapëri:
—Quero pitsorogaigui. Pomagoriasë
retaigue obirojegui.

³⁷Itsorogasantaiiguë irirojegui, te
irogótaigabaqueri. Ijitaigabitaca
iniaigabaqueri sërëtsi. ³⁸Aro icampë Jesus:

—¿Pairo pitsorogobitaiguë? ¿Pairo
pitsoingobitaiguëna Naanti?

³⁹Pinetsaiguero nobaco aisati naguiti
cara ipëicoquina. Potsagataiguena
pigóontëna aisonori Naro bocatsi; aiti
nobatsa aisati notongui, te aisa
nangantimaro pibega sërëtsi.

⁴⁰Aique yoniagaigapari ibacoquë
aisati iguitiquë. ⁴¹Iniaigabitari
icaninabentaigabitari, carari terainta
iragabiaigue irajitiri cara icaniantanai.
Cara iquenganeintasantaigasega,
yosamitaiguëri Jesus:

—¿Aiti poperi yaca?

⁴²Aro ipaiguëri sima iritasitaga.

⁴³Yáguëri yaaguëri cara inetsaigasegui.

Itsonque Jesus yogometaiiguëri irogomere.

(Irag. 1.4-8)

⁴⁴Aique icantaiguëri:

—Pinguengaiguero nanibare ora
nocomantaiguëmi cani: “Tojai
itsipiriacagaiguëna irógaiguëna,
omoncaraquema antagaisati
isanguenatocoquina Moisés aisati
comantantatsiri, aisati omoncaraquema
omagaro isanguenatocoquina David
cara sárimoquë”. Yamai omoncaraca.

⁴⁵Aique igótacagaiguëri ora ocanti Sanguenaripague, ⁴⁶icantaiguëri:
—¿Teco ongante Sanguenari,
“Iratsipirique Quirisito Agabisaicon-
tatsiri ingamaque, ongaraque maba
cataguiteri inganiatanae ingabirita-
jima; ⁴⁷aique iriáiguë iragátane
imarintëma Jerosarénquë ingomantë
gotaiguëri matsiguengajeguiquë cara
irojocajiro ora icantagueti te
ongomeite aroca inguemisantaiguëri
Jesos irabentëmari Tosorintsi, aro
Tosorintsi irisetaigaineri ora
icantaguetomoqueri quimingari quero
iquengairo aisati”? ⁴⁸Pigóiguëro ocanti
negaca Sanguenari. Yamai piniaiguëro
cara omoncaraca ora isanguenatocoi-
guëna jirai. Yamai nocoguini
pinguenguitsatocotaiguena. ⁴⁹Pinëni
yaca Jerosarénquë yamai queronta
ocosamaniti cara nagátaiguëmiro ora
icantasantaiguëmi Pabati, Iroonti
imagantëmi Isère Tosorintsi
inantaigapëmi coshoni ogaiguëmi.

Ogabiagagaiguëmi pingantaiguëneri
Pabati pairoraca ingocagaiguëmi.

**Cara yogainocanaa Jesus
Jonogaguitequë.**

(Mr. 16.19-20; Irag. 1.9-12)

⁵⁰Aique Jesus itsibataiganacari
irogomere irooti cara Betaniaquë. Cara,
itimagonaguitanaca ibaco jonoquë,
yamanaqueri Iriri icanque:

—Pabati, jerica nogomerejeguica;
pingantocobentaiguëri, pomitocotai-
guëri.

⁵¹Cara icantocobentaseguiri Jesus,
aito cara yáguëngani jonoquë
yogainocanaca, ipeganaca. ⁵²Aique
irogomere ipigaiganaja Jerosarénquë,
icaninabentasantaiguëri Atingomi.

⁵³Carari, omagaro cataguiteri
iátopiantaiguë cara oquibequë pongotsi
irasi Tosorintsi icantaiguë:

—Icaninatasanoti Tosorintsi.

Aro ocarati ora nasanguenaquemi.

Irocas